

上海游民習勤所敬送

觀世音菩薩。誓願弘深。慈悲廣大。隨類現身。尋聲救苦。世人凡遇疾病患難。若能以改過遷善恭敬至誠之心。常念菩薩名號。莫不隨彼誠之大小而垂加被。小之則逢凶化吉。遇難成祥。大之則業消智朗。障盡福崇。以迄超凡入聖。了生脫死也。惜世多不知。故特撰輯歷代史乘靈感事蹟。分類編錄。附於經呪之後。俾舉世咸知菩薩實爲痼疾之醫藥。凶年之稻糧。險道之導師。迷津之寶筏。伏願見聞此書者。各隨己力。展轉勸導。印施流通。俾一切同倫。息沐慈恩。共沾法化。庶不負菩薩度生之悲心也已。

新編觀音靈感錄

王君
書



目次

序	一三
普門品	一一〇
觀音偈	一一〇
心經	一一二
大悲呪	一一五
白衣呪	一六
十句經	一六
第一篇	一七
拔病苦	一七
第二篇	一七
救厄難	一七
第三篇	一七
與福慧	一七
第四篇	一七
度生死	一七
第五篇	一七
廣勸懲	一七
第六篇	一七
普示現	一七
近聞錄	一七

上海图书馆藏书



A541 212 0018 59608



南無大慈大悲救苦救難廣大靈感觀世音菩薩

乙亥仲夏 佛弟子 王辰 敬寫



印光法師序

觀世音菩薩。誓願宏深。慈悲廣大。以故分身塵刹。隨類逐形。尋聲救苦。度脫衆生。而于娑婆世界。更爲愍念周摯。拯救無遺也。而况近年以來。人民日日在患難中。雖欲逃避。直無可逃之地。亦無可逃之法。以近來世道人心。壞至其極。雖父母生育之大恩。尙公然提倡廢孝。與殺父殺母。爲大義滅親者。民生斯世。可不哀哉。由是凡有正知正見者。莫不研究佛學。修持淨業。以求出離此五濁惡世。速得上預于蓮池海會。庶可永離衆苦。但受諸樂矣。而觀世音菩薩。于斯時世。特爲興無緣大慈。運同體大悲。于種種苦難中。垂念護佑。稱其洪名。而得逢凶化吉。遇難成祥者。何可勝數。其紀載菩薩感應事迹者。散見各書。專紀之書。則有弘贊之觀音慈林集。周克復之觀音持驗記。尤惜陰之觀音靈感錄。許止淨之觀音本迹頌。聶雲臺之觀音靈驗紀。悉皆隨見隨聞。而爲紀錄。李圓淨居士。又復總諸書而輯之。名新編觀音靈感錄。可謂集

觀音靈感之成。而爲一切信奉持念者之依據也。雖然。須知觀音何以能靈感如是。以其能返聞聞自性。及照見五蘊皆空故。閱此編者。而能志誠懇切。念觀音大士洪名。念至念極情亡時。則凡一切煩惱惡業。當體皆空。回視一切苦樂境緣。皆不可得。于此不可得中。不妨興慈運悲。隨機接引。以觀音之心爲心。以觀音之事爲事。普令一切受苦衆生。同沐觀世音之恩澤。以及于未來世中。同行觀世音之道。以展轉救度也。是爲序。

中華民國十八年己巳季秋古莘釋印光謹撰

重印新編觀音靈感錄序

甲戌夏仲。族弟槐新。臥病滬南。江陰吳君直喃。往省之。談及病源。吳君曰。病由孽起。孽自心生。心淨則孽消。孽消則病退。吾佛慈悲廣大。普濟衆生。人能一心念佛。則心無罣礙。百孽全消。病魔何由而來哉。槐新首肯者再。爰時時披覽梵筴。得李圓淨居

士新編觀音靈感錄欣然曰。此悔過遷善之階梯。段成式金剛經鳩異。不能專美於前矣。已而養痾淨慈寺。寺正興建大殿。木石山積。工匠雲集。有農夫牽牛赴屠肆。牛至寺門。奔馳入寺。盤旋曲折。竟達觀音殿。農夫挽牛出寺。牛又狂奔。繞他道。至殿前。屹立不動。方丈欽亮和尚曉之曰。汝前生造孽。今生受罪。孽報牽纏。絲毫不爽。汝今畏死。求救於佛。吾輩仰體佛心。解脫汝厄。遂向大衆募錢。給還農夫。牛始從容出殿。若不勝其愉快者。未幾遊莫干山。偶有感冒寒熱交作。卽發宏願。印施靈感錄。病卽良已。秋深返滬。重至遊民習勤所。宣述種種因果。所民咸歡喜讚歎。各願出金襄助。以廣善緣。翌歲六月。槐新去世。吳君偕所民誦經七日。後一月。靈感錄印成。吳君屬余序其緣起。夫佛理真詮。固不僅福田罪果。然爲下等人說法。則感化較易。居士此錄。繁徵博引。推演救苦救難之意義。洵足以闡揚佛教。挽救人心。余喜吳君之善與人同。所民之同證善果。而悲槐新之無祿早世。不獲覩此錄之行世也。於是乎書。

中華民國二十四年八月上海秦錫田謹敘

觀音齋期

正月	初八	二月	初七 初九	三月	初三 初六
四月	初八 廿二	五月	初三 十七	六月	十六 廿八
七月	十三	八月	十六	九月	十九 廿三
十月	初二	十一月	十九	十二月	初八 廿四

每月朔望及閏月同前

平日須戒殺生。最好持長齋。能於齋期購買活命放生。功德更大。

妙法蓮華經觀世音菩薩普門品

爾時無盡意菩薩。卽從座起。偏袒右肩。合掌向佛。而作是言。世尊。觀世音菩薩。以何因緣。名觀世音。佛告無盡意菩薩。善男子。若有無量百千萬億衆生。受諸苦惱。聞是觀世音菩薩。一心稱名。觀世音菩薩。卽時觀其音聲。皆得解脫。若有持是觀世音菩薩名者。設入大火。火不能燒。由是菩薩威神力故。若爲大水所漂。稱其名號。卽得淺處。若有百千萬億衆生。爲求金銀琉璃。磲磔碼碯。珊瑚琥珀。珍珠等寶。入於大海。假使黑風吹其船舫。飄墮羅刹鬼國。其中若有乃至一人。稱觀世音菩薩名者。是諸人等。皆得解脫。羅刹之難。以是因緣。名觀世音。若復有人。臨當被

害稱觀世音菩薩名者。彼所執刀杖。尋段段壞。而得解脫。若三千大千國土。滿中夜叉羅刹。欲來惱人。聞其稱觀世音菩薩名者。是諸惡鬼。尙不能以惡眼視之。況復加害。設復有人。若有罪。若無罪。桎械枷鎖。檢繫其身。稱觀世音菩薩名者。皆悉斷壞。卽得解脫。若三千大千國土。滿中怨賊。有一商主。將諸商人。齎持重寶。經過險路。其中一人。作是唱言。諸善男子。勿得恐怖。汝等應當一心稱觀世音菩薩名號。是菩薩能以無畏施於衆生。汝等若稱名者。於此怨賊。當得解脫。衆商人聞。俱發聲言。南無觀世音菩薩。稱其名故。卽得解脫。無盡意觀世音菩薩摩訶薩。威神之力。巍巍如是。若有衆生。多於淫欲。常念恭敬觀世音菩薩。

便得離欲。若多瞋恚。常念恭敬觀世音菩薩。便得離瞋。若多愚癡。常念恭敬觀世音菩薩。便得離癡。無盡意。觀世音菩薩。有如是等大威神力。多所饒益。是故衆生。常應心念。若有女人。設欲求男。禮拜供養觀世音菩薩。便生福德智慧之男。設欲求女。便生端正有相之女。宿植德本。衆人愛敬。無盡意。觀世音菩薩。有如是力。若有衆生。恭敬禮拜觀世音菩薩。福不唐捐。是故衆生。皆應受持觀世音菩薩名號。無盡意。若有人受持六十二億恆河沙菩薩名字。復盡形供養。飲食衣服臥具醫藥。於汝意云何。是善男子善女人。功德多不。無盡意言甚多。世尊。佛言。若復有人。受持觀世音菩薩名號。乃至一時禮拜供養。是二人福。正等。

無異於百千萬億劫不可窮盡無盡意受持觀世音菩薩名號得如是無量無邊福德之利無盡意菩薩白佛言世尊觀世音菩薩云何遊此娑婆世界云何而爲衆生說法方便之力其事云何佛告無盡意菩薩善男子若有國土衆生應以佛身得度者觀世音菩薩卽現佛身而爲說法應以辟支佛身得度者卽現辟支佛身而爲說法應以聲聞身得度者卽現聲聞身而爲說法應以梵王身得度者卽現梵王身而爲說法應以帝釋身得度者卽現帝釋身而爲說法應以自在天身得度者卽現自在天身而爲說法應以大自在天身得度者卽現大自在天身而爲說法應以天大將軍身得度者卽現天大將軍身而爲說

法應以毗沙門身得度者。卽現毗沙門身而爲說法。應以小王身得度者。卽現小王身而爲說法。應以長者身得度者。卽現長者身而爲說法。應以居士身得度者。卽現居士身而爲說法。應以宰官身得度者。卽現宰官身而爲說法。應以婆羅門身得度者。卽現婆羅門身而爲說法。應以比丘比丘尼優婆塞優婆夷身得度者。卽現比丘比丘尼優婆塞優婆夷身而爲說法。應以長者居士宰官婆羅門婦女身得度者。卽現婦女身而爲說法。應以童男童女身得度者。卽現童男童女身而爲說法。應以天龍夜叉乾闥婆阿修羅迦樓羅緊那羅摩睺羅伽人非人等身得度者。卽皆現之而爲說法。應以執金剛神得度者。卽現執金

剛神而爲說法。無盡意。是觀世音菩薩。成就如是功德。以種種形。遊諸國土。度脫衆生。是故汝等。應當一心供養觀世音菩薩。是觀世音菩薩摩訶薩。於怖畏急難之中。能施無畏。是故此娑婆世界。皆號之爲施無畏者。無盡意菩薩白佛言。世尊。我今當供養觀世音菩薩。卽解頸衆寶珠瓔珞。價值百千兩金。而以與之。作是言。仁者。受此法施珍寶瓔珞。時觀世音菩薩。不肯受之。無盡意復白觀世音菩薩言。仁者。愍我等故。受此瓔珞。爾時佛告觀世音菩薩。當愍此無盡意菩薩。及四衆。天龍。夜叉。乾闥婆。阿修羅。迦樓羅。緊那羅。摩睺羅伽人。非人等。故受是瓔珞。卽時觀世音菩薩。愍諸四衆。及於天龍人。非人等。受其瓔珞。分作二

分一分奉釋迦牟尼佛。一分奉多寶佛塔。無盡意觀世音菩薩。有如是自在神力。遊於娑婆世界。爾時無盡意菩薩。以偈問曰。

世尊妙相具 我今重問彼 佛子何因緣 名爲觀世音
具足妙相尊 偈答無盡意 汝聽觀音行 善應諸方所
弘誓深如海 歷劫不思議 侍多千億佛 發大清淨願
我爲汝略說 聞名及見身 心心不空過 能滅諸有苦
假使興害意 推落大火坑 念彼觀音力 火坑變成池
或漂流巨海 龍魚諸鬼難 念彼觀音力 波浪不能沒
或在須彌峯 爲人所推墮 念彼觀音力 如日虛空住
或被惡人逐 墮落金剛山 念彼觀音力 不能損一毛

或值怨賊繞

各執刀加害

念彼觀音力

咸卽起慈心

或遭王難苦

臨刑欲壽終

念彼觀音力

刀尋段段壞

或囚禁枷鎖

手足被杻械

念彼觀音力

釋然得解脫

咒詛諸毒藥

所欲害身者

念彼觀音力

還著於本人

或遇惡羅刹

毒龍諸鬼等

念彼觀音力

時悉不敢害

若惡獸圍繞

利牙爪可怖

念彼觀音力

疾走無邊方

虺蛇及蝮蠍

氣毒煙火然

念彼觀音力

尋聲自迴去

雲雷鼓掣電

降雹澍大雨

念彼觀音力

應時得消散

衆生被困厄

無量苦逼身

觀音妙智力

能救世間苦

具足神通力

廣修智方便

十方諸國土

無刹不現身

種種諸惡趣	地獄鬼畜生	生老病死苦	以漸悉令滅
眞觀清淨觀	廣大智慧觀	悲觀及慈觀	常願常瞻仰
無垢清淨光	慧日破諸闇	能伏災風火	普明照世間
悲體戒雷震	慈意妙大雲	澍甘露法雨	滅除煩惱燄
諍訟經官處	怖畏軍陣中	念彼觀音力	衆怨悉退散
妙音觀世音	梵音海潮音	勝彼世間音	是故須常念
念念勿生疑	觀世音淨聖	於苦惱死厄	能爲作依怙
具一切功德	慈眼視衆生	福聚海無量	是故應頂禮

爾時持地菩薩卽從座起。前白佛言。世尊。若有衆生。聞是觀世音菩薩品自在之業。普門示現神通力者。當知是人功德不少。

佛說是普門品時。衆中八萬四千衆生。皆發無等等阿耨多羅三藐三菩提心。

妙法蓮華經觀世音菩薩普門品終

讚

觀音大士。悉號圓通。無邊誓願。此方宏。苦海一帆風。方便無窮。手眼更玲瓏。南無觀世音菩薩 三稱

觀音偈

觀音菩薩妙難酬 清淨莊嚴累劫修 浩浩紅蓮安足下 灣灣秋月鎖眉頭

瓶中甘露常徧洒 手內楊枝不計秋 千處祈求千處應 苦海常作度人舟

南無普陀山琉璃世界大慈大悲觀世音菩薩 南無觀世音菩薩 百千萬聲

般若波羅蜜多心經

唐三藏法師玄奘奉詔譯

觀自在菩薩。行深般若波羅蜜多時。照見五蘊皆空。度一切苦厄。舍利子。色不異空。空不異色。色卽是空。空卽是色。受想行識。亦復如是。舍利子。是諸法空相。不生不滅。不垢不淨。不增不減。是故空中無色。無受想行識。無眼耳鼻舌身意。無色聲香味觸法。無眼界。乃至無意識界。無無明。亦無無明盡。乃至無老死。亦無老死盡。無苦集滅道。無智亦無得。以無所得故。菩提薩埵。依般若波羅蜜多故。心無罣礙。無罣礙故。無有恐怖。遠離顛倒夢想。究竟涅槃。三世諸佛。依般若波羅蜜多故。得阿耨多羅三藐

三菩提。故知般若波羅蜜多。是大神咒。是大明咒。是無上咒。是無等等咒。能除一切苦。真實不虛。故說般若波羅蜜多咒。卽說咒曰。

揭諦揭諦。波羅揭諦。波羅僧揭諦。菩提薩婆訶。
般若波羅蜜多心經終

大悲願

凡持大悲咒者
須先虔發此願

南無大悲觀世音

願我速知一切法

南無大悲觀世音

願我早得智慧眼

南無大悲觀世音

願我速度一切衆

南無大悲觀世音

願我早得善方便

南無大悲觀世音

願我速乘般若船

南無大悲觀世音

願我早得越苦海

南無大悲觀世音

願我速得戒定道

南無大悲觀世音

願我早登涅槃山

南無大悲觀世音

願我速會無爲舍

南無大悲觀世音

願我早同法性身

我若向刀山

刀山自摧折

我若向火湯

火湯自消滅

我若向地獄

地獄自枯竭

我若向餓鬼

餓鬼自飽滿

我若向修羅

惡心自調伏 我若向畜生 自得大智慧

千手千眼無礙大悲心陀羅尼

南無喝囉怛那哆囉夜耶。南無啊唎耶。婆盧羯帝爍鉢囉耶。菩
提薩埵婆耶。摩訶薩埵婆耶。摩訶迦盧尼迦耶。唵薩皤囉罰曳。
數怛那怛寫。南無悉吉唵埵伊蒙阿唎耶。婆盧吉帝室佛囉楞
駄婆。南無那囉謹墀。醯唎摩訶皤哆沙咩。薩婆阿他豆輸朋。阿
逝孕。薩婆薩哆那摩婆薩哆那摩婆伽。摩罰特豆。怛姪他。唵阿
婆盧醯。盧迦帝。迦羅帝。夷醯唎。摩訶婆提薩埵。薩婆薩婆。摩囉
摩囉。摩醯摩醯唎駄孕。俱盧俱盧羯蒙。度盧度盧罰闍耶帝。摩
訶罰闍耶帝。陀囉陀囉。地唎尼。室佛囉耶。遮囉遮囉。摩摩罰摩

囉穆帝隸伊醯伊醯室那室那阿囉唵佛囉舍唎罰娑罰唵佛
囉舍耶呼盧呼盧摩囉呼盧呼盧醯唎娑囉娑囉悉唎悉唎蘇
嚧蘇嚧菩提夜菩提夜菩馱夜菩馱夜彌帝唎夜那囉謹墀地
唎瑟尼那娑夜摩那娑婆訶悉陀夜娑婆訶摩訶悉陀夜娑婆
訶悉施喻藝室皤囉夜娑婆訶那囉謹墀娑婆訶摩囉那囉娑
婆訶悉囉僧阿穆佉耶娑婆訶娑婆摩訶阿悉施耶娑婆訶者
吉囉阿悉施夜娑婆訶波施摩羯悉陀夜娑婆訶那囉謹墀皤
伽囉耶娑婆訶摩波利勝羯囉夜娑婆訶南無喝囉怛那哆囉
夜耶南無阿利耶娑嚧吉帝爍皤囉夜娑婆訶唵悉殿都漫多
羅跋施耶娑婆訶

白衣大士神呪

南無大慈大悲救苦救難廣大靈感觀世音菩薩三稱三拜

南無佛 南無法 南無僧 南無救苦救難觀世音菩薩

怛只哆 唵 伽囉伐哆 伽囉伐哆 伽訶伐哆 囉伽伐

哆 囉伽伐哆 娑訶 天羅神 地羅神 人離難 難離

身 一切災殃化爲塵 南無摩訶般若波羅蜜

觀音十句經

觀世音。南無佛。與佛有因。與佛有緣。佛法僧緣。常樂我淨。朝念
觀世音。暮念觀世音。念念從心起。念念不離心。

新編觀音靈感錄

李圓淨編

第一篇 拔病苦

▲晉沙門竺法義。興寧中。住始寧山。精研衆典。弟子受業常百餘人。咸安二年。感心氣疾。得病積時。遂一心歸誠觀世音。忽夢一人爲劊出腸胃。湔洗臟腑。見有結聚不淨物甚多。洗濯畢。還納之。語義曰。汝病已除。夢覺。衆患豁然。宋尚書令傅亮撰其事跡。常云。其先君與義游。義每說其事。聽者無不肅然。太平廣記

▲元魏釋道泰。住常山衡唐精舍。嘗夢人告云。君命當終於四十二矣。至期。遇篤疾。慮必不濟。悉以衣鉢之資。厚爲福施。友人曰。吾聞供養六十二億菩薩。與一稱觀世音。得福無異。泰感悟。遂歸誠念誦觀世音。晝夜不怠。精勤四日夜。所坐帷下。忽有光明從戶外而入。見觀音足趺金色。朗然照屋。泰乃牽帷叩禮。奄然而滅。悲喜流汗。便覺體輕。所患悉愈。高僧傳二集

▲河西王沮渠蒙遜。歸正法。有疾。伊波勒菩薩謂觀世音菩薩於此土有緣。命誦普門品。病卽除。由是此品別行於河西。名觀世音經。法華傳記

▲劉宋邵信。吳興人。篤信佛法。患傷寒。無人敢看。乃悲泣念觀音。忽見一僧。云是杯渡弟子。於衣帶頭出藥散一合許與服。病卽瘥。高僧傳初集

▲劉宋尼玄藻。俗姓路。吳郡人。安荀之女。藻年十餘。身嬰重疾。良藥必進。日增無損。時太玄臺寺釋法濟語安荀曰。恐此病由業。非醫所消。佛經云。若履危苦。能歸依三寶。懺悔求願者。皆獲拯濟。君能與女洗滌塵穢。專心一向。傾誠籲懇。當得痊愈。安荀然之。卽於宅內設觀世音像。爲其女沐浴潔身。齋戒潔心。扶疾稽顙。專念相續。期以七日。至第七日初夜。忽見金像高尺許。三摩其身。從首至足。卽覺沉疴豁然消愈。旣獲靈應。遂求出家。精勤不懈。誦法華經。菜食長齋。三十七載。常翹心注想。願生兜率。元嘉十六年。出都造經。不測所終。比丘尼傳

▲劉宋長干寺釋曇穎。會稽人。少出家。謹修戒行。誦經十餘萬言。在寺善巧方便。宣揚大法。攝化無量。穎常患癰疾。積治不除。禪室之內。恆供養一觀世音像。晨夕禮拜。求愈此疾。一日。忽見一蛇緣壁上屋。須臾有一鼠從屋墜地。涎液沐身。狀如已死。穎望其再生。卽取竹片刮除涎液。忽憶人言。蛇所吞鼠。所得涎液。能療瘡疾。卽取涎敷癰上。所敷旣徧。鼠亦還活。疾馳而去。信宿之間。瘡疾頓愈。方悟蛇之與鼠。皆是祈請所致。於是喧傳遐邇。名震王公。終於是寺。享年八十有一歲。高僧傳初集

▲齊建安王患瘡。念觀音名。至誠無息。夜夢見大士手爲敷藥。明日瘡愈。見者聞者。驚傳異事。一時發信心者甚衆。感應傳

▲梁釋法橋。中山人。少年出家。樂於轉誦。苦發音不能清暢。於是絕食懺悔。歷七日夜。一心皈命。觀世音菩薩。虔誠無怠。刻求現報。同學苦諫。誓不改變其意向。至第七日。覺喉內豁然。卽索水洗漱云。吾有應矣。於是作三契經。聲徹里許。遠近驚嗟。悉來觀聽。爾後誦經數十萬言。晝夜諷詠。哀婉通神。至年九十。聲猶不變。高僧傳初集

▲隋沙門洪滿。安定人。初在俗時。因染時疾。雙腳攣蹙。常念觀世音。忽見一僧。執淨瓶前立。滿問曰。師從何來。僧答曰。以汝常相懇。故來耳。汝前身拘縛物命。餘殃致爾。汝但閉目。吾爲療之。滿如言求治。但覺膝上如拔去數寸釘。遂愈。開日起謝。失僧所在。因更精誠。誓不娶妻。後忽自通禪觀。安坐不動。輒經七日。開皇初元出家。住救度寺。高僧傳二集

▲史雋。才學軼羣。不信佛。嘗云。佛不足事也。後雙足病攣。不能下榻。醫禱無效。友人趙文謂曰。觀音大士。尋聲救苦。至誠感之。無不靈應。盍造大士像。雋以病急。如言鑄像。像成。夢見觀音。悔過奉法。拘攣之病。不藥自愈。宣驗記

▲唐釋神智。婺州義烏人。日惟一食。持大悲心呪。恆呪盃水。以救百疾。飲之多瘥。百姓相率以求。日給無算。號大悲和尚焉。大中年間。裴休女爲鬼神所祟。智持呪七日。平復。遂奏請院額。曰大中

聖壽。高僧傳
三集

▲唐麟德中。京師永興坊許儼。取魚爲業。後患疾。冥然若死。身赤如火。痛踰炭炙。自云。但見火車來燒身。冥官責其取魚業重。遣我現生受罪。已經數日。乍生乍死。親戚勸作功德。遂造觀音像兩尊。供養懺悔。更令合家茹素。病遂除。法苑珠林
及轉因錄

▲唐釋法朗。姑蘇人。誦觀音明咒。神效屢彰。龍朔二年。城陽公主有疾。沈篤。帝聞朗能持祕咒。理病多瘳。延至設壇。持誦信宿而安。高僧傳
三集

▲唐釋法通。俗姓關。京兆鄠人。少小出家。極羸弱。隨風偃仆。同侶輕之。通輒流淚。一日對觀音聖像。祝曰。通聞菩薩聖鑒。所願尅從。乞垂提誘。免斯輕侮。因誦觀音經。晝夜不捨。歲餘。歸家覲母。夢人遺三驢馱筋。方啖一馱。被母喚覺。自是體力雄健。肌膚堅韌。密舉大木石。不以爲重。寺有僧戡者。膂力稱最。通取袈裟安柱下。戡初不見。謂是神鬼所爲。通笑爲舉。梁抽取。乃大駭服。高僧傳
二集

▲唐王琦。山西太原人也。居滎陽。自童孺不茹葷血。大曆初。爲衢州司戶。性好善。常持誦觀音經。

自少及長。數患重病。至心念誦。無不痊愈。廣異記

▲唐知玄法師。俗姓陳。眉州洪雅人。敷演經論。僧俗宗仰。每恨鄉音不正。乃於象耳山誦大悲呪。夢神僧截舌換之。明日。俄變秦語矣。高僧傳三集

▲唐釋智益。長沙人。俗姓吳。嘗爲征蠻卒。好漁獵。得一白龜。烹食之。遂徧身患瘡。悉潰爛。眉鬚手足指墮落無餘。號呼未卽死。行乞安南市中。有一僧見而哀之。謂曰。汝可回心念大悲呪。吾當口授。若能精進。必獲善報。卒依言受之。一心念誦。自是瘡痍漸復。手指皆生。旣平愈。遂削髮爲僧。就伏波將軍故宅。建立精舍住持焉。太平廣記及轉因錄

▲唐靜之禪師。俗姓趙。雍州高陵人。年七八歲。樂阿彌陀極樂世界觀。依文修學。性樂出家。貞觀初。隱光化寺。凡十餘載。常坐茅宇。不居僧房。四方集者二百餘人。六時三業。精勤修持。不負光影。時鼻患肉塞。百方無驗。有僧令誦般若心經萬遍。肉鈴便落。高僧傳二集

▲唐釋智勤。俗姓朱。少小卽善行克己愛羣之道。每與衆周旋。發言無不歡洽。羣情雍睦。修省參究。精誠勇猛。凡有祈求。無不靈應。初母患委頓。爲母虔誦觀音大士聖號。以求康復。精誠所感。宅中樹葉之上。皆現化佛。合家並見。母疾立除。高僧傳二集

▲宋法師繼忠。字法臣。浙江永嘉邱氏子。初父母求嗣於佛前。同夢一僧授以好子。云螺溪尊者。寄汝養之。母娠。卽厭葷血。幼見佛像必致敬。八歲入開元。蒙恩得度。卽詣南湖依廣智學。勞苦得疾。乃行請觀音三昧。感大士放光。以水灌頂。其疾卽愈。既而洞悟教觀。無所凝滯。佛祖統紀

▲宋政和七年。有李八者。患大癩瘋三年。醫者云不治。初李未病時。誦觀音經滿三藏。一萬五千餘卷

日。忽有僧來。與藥一丸。李受之。不敢輕服。夜夢僧曰。吾念汝誦經誠謹。特賜汝救苦丹一丸。緣何不服。既寤。卽服之。凡七日。徧體皮脫。鬚眉重生。海南一海勺

▲宋張孝純有孫。五歲不能行。或告之曰。頃淮甸間一農夫。病腿足甚久。但日持觀世音名號不輟。遂感觀音示現。因留四句偈曰。大智發於心。於心無所尋。成就一切義。無古亦無今。農夫誦偈滿百日。痼病頓愈。孝純遂教其孫及乳母。齋戒持誦。三月而步武如常。兒患腿足者。誦之皆驗。有求聰慧者。亦悉獲果遂。觀音慈林集

▲宋淳熙五年。饒州都巡檢羅生。避水王茂才家。一婢名大喜。日久盲且痛。夢老僧喚之曰。大喜。賀汝有緣。倘不至此。定成廢人。我攜藥救汝。卽授一甌。婢飲之。頓覺雙瞳瞭然。叩問大師來何處。僧曰。我住是家久矣。聞汝喚苦。心憫相救。次晨。婢目炯炯復舊。而痛亦止。衆咸怪問。具道所夢。茂

才白其母。母曰。是觀音菩薩也。吾家歷年敬奉。急難叩求。靈應如響。靈驗記

▲台州僧處瑄。中年病目。常持誦大悲呪。夢觀音大士傳授法偈。令每日清晨。取淨水一杯。焚香念偈七遍。以洗目。處瑄如法行之。卽愈。壽八十八。記者病目匝月。醫師孫震元傳此。行之亦驗。不敢枕祕。謹誌於冊。偈曰。救苦觀世音。賜我大安樂。與我大方便。滅我愚癡暗。賢劫諸障礙。無明諸罪惡。出我暗室中。使我視物光。我今說洗法。懺眼釋罪狀。普放淨光明。願睹微妙相。繆良筆記

▲宋度宗咸淳丙寅三月。范太尉以目疾。遣子致禱潮音洞下。汲泉歸洗。目病立愈。復命子來謝。大士全現。淡煙披拂。猶隔碧紗。繼往善財洞。童子忽現。大士亦現。縞衣纓帶。珠璣交錯。精神顧盼。如將示語。普陀山志

▲宋王日休。借抄阿彌陀經。欲校刊廣傳。擗管時。右手有風。其指自掉。寫字不便。乃舉指念阿彌陀佛。與觀世音菩薩數聲。禱除風疾。成就心願。禱畢。指遂不掉。至終其帙。無恙。龍舒淨土文

▲宋侍郎邊知白。元豐二年。觸暑成病。忽夢白衣人以水灑之。自頂至踵。覺甚清涼。醒而頓爽。於是集古今靈驗事實。作觀音感應集四卷行世。佛祖統紀

▲元平江僧惠恭。病翻胃不能飲食。夜夢一貓入腹。從此病日甚。思食魚。恭忽轉念自責。知前念

係業報。遂發意誦觀世音菩薩百萬聲。日持大悲呪百八遍。後復夢至山中。遇一有道之人。曰。吾

與汝藥。俄有青衣童子籠一雞。至前。貓自僧口躍出。徑入籠擒雞。驚覺。而病頓愈。報應錄

▲元釋蒙潤。字玉岡。嘉禾人。年十四出家。因苦學嬰奇疾。修請觀音懺。七七。日。既獲靈應。疾愈。而心倍明利。又修法華大悲諸三昧。瑞應不可勝紀。高僧傳四集

▲元釋真淨。字如菴。江蘇華亭姚氏子也。母夢白月墮懷而娠。有異僧謂曰。乃兒海月法師再來也。九歲出家。依無極度法師。盡其性學。泰定間。輔相脫驩。舉住下天竺。淨有疾苦。夢白衣大士持瓶水灌其口。曰。汝病當自愈。已而果然。高僧傳四集

▲元千巖禪師。浙江蕭山人。俗姓董。幼多病。母禱於觀音大士前。許出家而始愈。習戒律於靈芝律師。傳心印於中峯和尚。隱居天龍寺。日有二蛇來遶法座。師爲說三歸五戒。蛇翹首低昂。拜舞而去。釋氏稽古略

▲明吳郡徐明甫。素供觀音大士。禮敬甚虔。子名鑛。十餘歲。忽遭危疾。夫妻二人於大士前。晨夕叩禱。至七日。夜夢菩薩告曰。無憂。汝子明日可起也。忽聞有聲震棹上。驚而寤。起視所供大士几前。果碟諸器。俱墮地。檢之無一損者。子口中喃喃微聲喚曰。菩薩救我。菩薩救我。問之不應。天明

詢其故。子曰。昨夜半。正憤絕間。見大士至。臥榻前。呼男曰。吾救汝。乃以水一甌。命飲之。冰涼徹骨。遂舉體得汗而爽耳。不數日。病果愈。徐氏庭訓

▲明天童僧照。素多病。洪武丙辰。病日篤。勉藏主勸其持觀世音菩薩名號。照如其言。日誦萬聲。明年十月十七日午時。自念病勢去死不遠。莫如改持阿彌陀佛號。方興此念。忽見一美婦人。身衣法衣。手持淨瓶。自戶外入。立其面前。照驚訝失措。既而定心諦觀。知是菩薩示相。照涕泣求哀。須臾不見。越五日。病盡脫。山卷雜錄

▲明澹凝居士王應吉。素虔奉大士。萬曆壬寅。患痰火疾。水漿不能嚥者七日。九月朔前子夜。夢乘肩輿。循大河滸。忽顛墮水中。鱗甲之類。種種當前。因念此輩吾嘗啖之。今乘此爲難矣。恍惚若有挾其兩臂起崖上者。仰首視之。則赤日懸空。觀音大士倚崖而坐。善財龍女鸚鵡淨瓶之屬。具列。以手捫衣不溼。因叩謝。大士謂曰。汝本善知識。轉身素虔奉我。故來相救。但汝殺業頗多。致有是病。若能戒殺。汝病卽愈。王曰。此夙心也。謹受戒。大士曰。我有醍醐。與汝飲之。王捧杯一吸而盡。其杯似玻璃。內外通明。醍醐色黃且碧。味殊清冽。不類世間濃郁。飲畢叩謝。倏然而覺。餘香猶在。唇吻間。偏身雨汗。移時清涼。心胸開爽。進粥飲之。精神頓回復。自後遂盟心戒殺。自作紀靈戒殺。

衷言誌其事。慈心寶鑑

▲明崇禎辛巳。當塗縣官圩。有山東一癱子至。以手代足。乞食於市。人多厭之。癱者負氣。被詈罵。輒不平。聞塘橋菴有修行僧名水谷者。往訴以乞食艱難之苦。谷曰。汝能發心出家。仗慈悲大力。或有施主。癱者從之。遂剃髮受齋戒。雖行乞。不茹葷血。雖被辱罵。安忍而受。谷又教之念觀世音名號。兼持準提呪。受持踰二年。戊子秋。忽夜夢一老嫗呼之曰。汝起。汝起。癱者云。我是癱子。何能起。老嫗以手扯其兩足。覺直而不拳。晨起。癱病遂愈。居然一昂藏之僧矣。取號曰半崖。遂有供養之者。唐宜之己求書

▲楊州一癱子。病數十年。一日。偶在池邊摸得一磁觀音像。供矮屋中。每五更東隱菴打鐘。卽對像禮拜。勤苦五載。夢老嫗按摩其體。呼之使起。答曰。吾何能起哉。嫗曰。無妨。今能走矣。醒而步履如常。遂於東隱披剃爲僧。江都令太夫人施貲。建菴曰存濟。供觀音像於其中焉。覺世經說證

▲明崇禎十一年戊寅。揚州僧垂髻。患脇痛。展轉號呼。不飲食者三十餘日。友人謂曰。汝平日每勸人念觀世音。今染此篤疾。何不皈命大士。以求自度。髻皆瞶問。聞言有省。急命具香燭。高聲持誦觀音菩薩名號不絕口。至四更。聲忽寂然。衆驚疑。以爲氣絕。啓門視之。髻正酣睡。午後。忽呼曰。

我饑甚。速爲具飯。食畢。卽能起行。衆驚問何緣得愈。髻曰。我初稱觀音菩薩名時。痛如刀割。久之。空中忽現祥雲。見菩薩以瓶中甘露。灌我頂門。清涼沁骨。汗流如水。因而熟寐。竟霍然病除矣。觀世

音持
驗記

▲清彭尺木居士。從子希曾婦姚氏。嘗患痞。因發心持大悲呪。一夕夢老嫗授以一枝花。姚氏欣然受之。頓覺身輕若葉。而病遂愈。一行
居集

▲清謝重華。崇信三寶。一女襁褓中偶感時疫。似痧非痧。病勢彌篤。無法施救。忽念觀音大士。慈悲普濟。虔叩必應。卽傾誠叩禱。並許願印送觀音經千卷。女入夜安眠。翌晨健全如恆。海南
一勾

▲清楊如雲。常向人述其父盛鳴。性剛直。樂善好施。虔誠供養觀音大士。年四十餘。偶患臃脹疾。腹部青筋糾纏。砭藥俱窮。一日夢見一老母。手執一鍼。曰。汝病難起矣。吾今與汝去之。以鍼自腹挑起。漸至頸項。遂用利剪。將筋剪斷。驚覺呼痛。家人訊其故。縷述如上。晨起。視腹筋果去。臃疾遂愈。戒切
勅錄

▲清何世傑。浙江山陰人。乾隆十三年九月。忽患蠱疾。其母田氏。在觀音菩薩像前。虔誠叩禱。許敬誦高王經千遍。印經千二百卷。至次年三月。蠱疾全除。觀音
靈錄

▲清葉健庵嘗患瘡甚重。寒熱交戰。苦不可言。醫言。下次當更重。憂懼幾不欲生。忽見書架有大悲呪一卷。自念持誦此呪。當可稍減痛苦。次日。焚香禱誓於佛前。攝心虔誦。瘡卽頓止。連日誦之。瘡竟不發。勸戒錄

▲清王漁洋云。京兆寶坻王敬祖。年十七失明。常誦白衣觀音呪。康熙己巳四月廿六夜。夢一婦人。素衣澹妝。手啓敬祖左目。以小鉗鉗之。出血筋長寸許。復啓右目鉗之。血筋亦出而中斷。謂之曰。爾目無恙矣。晨起視物瞭然。惟右目微有所障。自是合家持呪不懈。均甚虔肅。盤山拙庵禪師作王敬祖傳。詳記此事。以廣勸化。呪云。南無佛。南無法。南無僧。怛只哆。唵。伽囉伐哆。伽囉伐哆。訶伐哆。囉伽伐哆。囉伽伐哆。娑婆訶。居易錄○按上海佛學書局有印光法師鑑定白衣大士神呪刊行附靈感錄

▲清丁傳曰。祖母孔太君。雙目失明。二十年矣。乾隆壬子春。愀然謂傳曰。予但得隻眼寸光。桑榆之願足矣。傳曰。觀音大悲呪。持誦者有求必應。然呪語多。口授難熟。莫若專誦大悲觀世音菩薩聖號。眼當復明也。祖母深信此言。晝夜虔誦大悲觀世音菩薩七字無間。未逾月。而一目果明。自數掌上螺紋。復命家人立樓下。憑檻而觀。歡然微笑曰。兩孫婦入門。老人皆未識面。今并曾孫亦見頭角。非佛力慈悲不至此。囑刊布以廣告方來。觀世音持驗記

▲臨江丁兆禧。服賈於蜀。母葉氏。在家病足。數載不瘳。因虔祝大士。後鄉人來蜀。知母蒙大士顯靈示夢。病從某日瘥。卽禱祝之日也。數千里有感輒應如此。丁酉回鄉。值母六旬壽誕。薰沐敬誦觀音經一藏。祝母康強。後母享高年。精神健旺。兆禧生理亦順遂。勉戒切 要錄

▲福建泉州王某。髻齡病目幾瞽。一僧勸其虔誦白衣大士呪萬遍。當自愈。如言之。果驗。他日遭誣陷重案。日日持念。得解脫。後爲縣令。刻呪印施。普諭部民。白衣神 呪徵事

▲王道行。江陵席家口人。一日。於醉後墮崖折腰。調治弗痊。許誦白衣經一年。仍未愈。意謂經不驗。將中止。是夜夢神人叱之曰。汝誦經視爲具文了事。未見虔誠。反怨經不靈驗耶。自是洗心滌慮。虔誦逾三月。復夢前神。以手拍其腰。驚寤伸腰。健全如故。乃信持彌篤。時其室人四旬餘矣。連

生二子。觀世音 靈驗記

▲徽州程青雲。壯年嬰疾。勢將不起。許印施觀音經千卷。夢一神持沐盆。一神剖其腹而洗之。悸而覺。汗透枕簟。明晨病愈。自此膚澤神腴。非復疇昔羸弱比矣。海南 一勺

▲褚景賢南海慈航序云。賢向以誦經獲福爲妄。娶妻八年。不育。婦翁謂印觀音經持觀音齋者。歷昭顯應。室人遵行。得夢兆而孕。次年將生。又夢一媪與之子。且錫嘉名曰積。及生。符所夢。遂以

命名。予猶笑而不信也。厥後疾病危難中。有所祈求。每著靈異。乃疑信參半。甲戌。次子病吐瀉。藥不納。肢厥眼垂。已無生理。予母哭失聲。予亦淚下涔涔。求救無路。因哀禱大士前。誓輯南海慈航。改過行善。甫禱。吐瀉立止。漸求乳食。尤可異者。室人素乏乳。更憂子病。數日廢寢食。乳無半滴。禱後。乳忽湧至。自惟涼德。竟以片念廣化之心。上動大士悲憫。誦經獲福。灼然不誣。幸輯成發刻。因記緣起以告閱是編者。南海航

▲荆山萬文玉。自言。予持大悲呪及心經。靈異不勝縷述。逢凶化吉。起死回生。實親身歷驗者。憶先慈病篤。喪具已備。予痛哭流血。跪於菩薩前。虔誦大悲呪一遍。先慈漸氣暖。能言動。繼思飲食。數日獲安。佛法無邊。洵非虛語。觀音靈感錄

▲劉山英言。余自壬辰冬。讀袁公了凡四訓。俞公淨意竈神記。深信天道福善禍淫之理。命自我立。福自己求。欣然於癸巳歲朝。上疏悔罪。每日跪誦觀音準提各經呪。以祈母算。於濟人利物。歡喜奉行。余母痰火氣疾。忽并發。勢勝曩時。謂余曰。我病起於三十一歲。時發即愈。今爾跪誦經文。而病加重。豈老人福薄。不能消受耶。余泣曰。實兒誠心未至。妄念未除之咎耳。即焚香對天。叩頭流血。誓除諸妄念。俾母早痊。時余母未進勺漿者五日。至是忽思糜粥。余夜夢所奉大士。招母同

坐授綠水一杯。令母飲之。次日病減半。不數日全愈。三十餘年痼疾。自後永除矣。益信感應之理。如響應聲。自此誦經益虔。信心錄

▲清屠潛園太守。浙江錢塘人。辛巳秋得危疾。病中自誓以利人濟物爲懺悔地。一夕觀自在菩薩感應入夢。謂太守夙世爲楚中某官。遇事公而刻。殊傷仁厚。雖無私。亦減祿位。又多戕物命。宜得短命報。幸病中誓願堅固。念念以利濟爲懷。無毫髮怨尤。冥中以他福德折除。當可益算。陰律惟救生可延生。且加祿。當益勉之。寤後。遂舉家戒殺。且買物放生。明春病頓愈。放生錄書後

▲清鄧承詔。號實峯。廣州番禺人。早受歸戒。康熙戊申五月。長媳黃氏。忽喉生雙鵝。困苦移旬。偶逢弘贊和尚還山。舟過其門。承詔述其長媳危狀。問何法能救。答謂觀音大士威神不可思議。能以無畏施於衆生。卽授以觀音救生經十句。其文曰。觀世音。南無佛。與佛有因。與佛有緣。佛法僧緣。常樂我淨。朝念觀世音。暮念觀世音。念念從心起。念念不離心。承詔持歸。教媳自誦。經置牀前。病者夜睹字大數倍。次日身爽神定。誦至次日夜半。其瘡自決。膿血大潰。卽歡呼曰。我病愈矣。遂索水漱口。向大士像前虔誠禮拜。平復如故。舉家欣慶。一時遠近喧傳。大士慈力感應之神速。觀音集

慈林

▲安徽休甯汪居敬。十歲時。患險痘。醫云莫治。其兄居仁。於觀音像前。焚香跪誦觀音聖號。自暮達旦。居敬恍惚中。見白衣人。手握塵尾。徧體拂之。不藥而痊。休甯新志

▲江西新建縣西鄉李姓。聚族而居。不下千餘戶。歲戊寅。其鄉痘疫熾發。十損八九。惟某合門迪吉。衆疑之。訊家傳必有異方。曰否。家中惟虔奉大士。許施白衣經千卷而已。於是衆人爭效之。此後遇痘疫者。俱得慶無恙。白衣經近驗

▲山東周華卿侍御。年四十後。得子二。岐嶷不羣。同時患痘症。凶險異常。漸無起色。夫婦仰天痛哭。曰。若死。必與之俱死。夜夢一僧謂之曰。汝夫婦不聞人有回天之力乎。若印施觀音經一藏。可保無恙。明日。遂誓願洗心改過。力行方便。卽刊經施送。二子痘症俱全愈。自是信奉日虔。印施甚廣。後二子俱登第。南海慈航

▲安徽婺源西鄉岩前。戴生鴻澤母鄧氏。平日禮大士。歲虔製救苦神膏廣施。道光十七年六月間。鴻澤族姪某。年六歲。痘忽黑陷。左目已瞽。其母夜夢一媪入室。言此痘非世人能醫。惟求觀世音菩薩得救治。問何地所供奉者。曰。鄧氏心誠。得感通者已三年矣。爾何不往鄧氏家求救。苦神膏乎。次早。氏奔赴鴻澤家。哀祈大士。許願求至。醫詫其妄。用燈火治瞽目。俄而睛突出。筋懸未墜。

盡室驚惶。醫逸去。氏復懇禱大士前。夜夢前媪命念心經二千遍。限二日念滿。氏未能誦經。鄧氏代念如數。仍貼膏。左睛漸入。瞽而重明。痘亦愈。海南一勺

病苦至劇。不能忍受者。當于念佛回向外。專心致志。念南無觀世音菩薩。觀音現身塵刹。尋聲救苦。人當危急之際。若能持誦禮拜。無不隨感而應。卽垂慈佑也。
印光法師復鄧伯誠書

第二篇 救厄難

▲晉時。西域一商主。泛海失路。與其侶同聲稱觀音名。見一僧杖錫陵空引導。不踰時而至本國。唐西域記

▲晉呂竦。字茂高。山東兗州人。寓始豐縣。縣南有溪。流急岸峭。迴曲如縈。又多巨石。白日行者。猶懷危懼。竦恆向人述其父嘗行溪中。去家十餘里。日向暮。大風雨。晦暝不知東西。自度必遭覆溺。唯歸心觀世音。且誦且念。須臾。有火光來岸。如人執火前行。火光遠射。照見溪中了了。火常在前。後去船僅十餘步。竟得安然歸家。竦友郗嘉賓。曾聞其備細而記之。冥祥記

▲晉徐榮。山東琅琊人。嘗至東陽。還經定山。舟人不習水道。誤墮洄洑中。垂欲沈沒。榮無復他計。

惟至心稱觀世音名。須臾間。如有數十人齊力引船。踴出洄洑。沿江而下。日已暮。天大昏暗。風雨均厲。前駛不知所向。而浪湧轉盛。船幾欲覆。榮至心誦佛經不輟。忽望見山頭火光透亮。迴舟趨之。安然達岸。既至。卽不復見。明日。問浦中人。昨夜山上是何火。衆愕然曰。風雨如此。火何自來。乃知佛力冥佑矣。榮後爲會稽督護。名士謝敷恆口述此事。與榮同舟者沙門支道蘊。謹篤人也。亦具將其事巔末。爲傳亮言之。與榮所說同。冥祥記

▲晉沙門竺法純。居山陰顯義寺。元興中。行經太湖。忽遇暴風。船小水入。命在瞬息。乃一心憑觀世音。口誦不輟。忽有大船。泛流至前。因共扳舷而上。衆甫度盡。回視小舟。應時淪沒。大船隨波鼓盪。俄焉達岸。訪船無主。須臾不見。道俗咸歎神感。高僧傳初集及法苑珠林

▲劉宋釋道罔。陝西扶風人。弘治十八年。師道懿病。遣罔等四人至河南霍山采鍾乳。入穴數里。跨木渡水。三人溺水。炬火又滅。罔素誦法華。惟憑誠此業。又存念觀音。有頃。見一光如螢火。追之不及。遂得出穴。於是進修禪業。頻作普賢齋。並有瑞應。後與同學四人。夜乘冰渡河。中道冰破。三人溺死。罔又歸誠觀音。乃覺脚下如有一物。復見赤光在前。乘光至岸。高僧傳初集

▲劉宋顧邁。吳郡人。元嘉中。自都還廣陵。發石頭城。江行遇風。舟人勇進。既至中江。波浪方壯。單

船孤征。進退失據。邁憂危無計。誦觀世音經。約十遍。風勢漸歇。浪亦稍小。既而中流屢聞奇香。芳馥不歇。邁心感慰。益堅誦不輟。遂以安濟。冥祥記

▲劉宋沙門竺惠慶。廣陵人。元嘉十二年。將入廬山。乘船至江。暴風忽起。飄颻江心。風急浪湧。勢必淪覆。惠慶正心端意。誦觀世音經。洲際之人。望見其船。迎颿截流。如有數十人牽挽之者。逕安然抵岸。冥祥記

▲劉宋伏萬壽。平昌人。元嘉十九年。在廣陵爲衛府參軍。假訖返州。四更初涉江。長波安流。至江心。風起如箭。時又極暗。莫知所向。萬壽奉法。唯一心歸命觀世音。念念無間。倏爾與船中數人同覩北岸有光。狀如村火。迴船趨之。未日而至。問彼處人。皆云昨夜無燃火者。於是方悟神力焉。冥祥記

▲梁釋法顯。俗姓龔。平陽人。晉隆安三年。與同學慧景等。發自長安。西度流沙。歷諸危險。至天竺國。獲諸經律。附商人大舶。循海而還。舶有二百許人。值黑風。水將入船。衆皆惶懼。卽取雜物棄之。顯恐棄其經像。惟一心念觀世音菩薩名。及歸命漢土衆僧。舶任風而去。得無傷壞。經十餘日。達耶婆提國。停五月。隨商船東適廣州。高僧傳初集

▲唐聖善寺僧道憲。開元中。住持江州大雲寺。時刺史元某欲畫觀世音七幅。以憲練行。委之。憲令畫工持齋潔已。調諸彩色。悉以乳頭香代膠。備極莊嚴。事畢。往豫甯。斫木排。造文殊堂。排成將還。忽然墮水。江流湍急。同侶欲拯不及。憲於墮水之際。急念觀世音。頓見水底有異光。注目凝視。見所畫七菩薩。俱在前。謂憲曰。爾但念南無阿彌陀佛。此厄卽解。憲在異光中。見已行李。因知己身現在水底。懼難免死。乃切心念阿彌陀佛。至第二聲甫出口。七菩薩並來捧足。將至水面。衣履不濕。與排相隨。俱行四十餘里。憲於天寶初滅度。今江州大雲寺七菩薩像現在。兼畫落水事。以廣勸策。廣異記

▲唐岑文本。字景仁。棘陽人。少信佛。虔誦普門品。嘗乘舟往江蘇之吳江。中流舟覆。人俱溺死。文本亦沒水中。俄聞有人云。能誦普門品。水難應免。如是者三。遂浮水面。須臾抵岸。一日。於家設齋。一僧後去。謂曰。天下方亂。君以善緣。幸不及難。終逢太平。致富貴。言訖不見。及徹齋。復於椀得舍利二粒。後仕唐爲中書令。佛祖統記

▲唐不空三藏法師。本天竺婆羅門。附舶南海。遇大黑風。衆商惶怖。各作本國法禳之。無驗。皆膜拜求哀。乞加救護。空曰。吾今有法。汝等勿憂。遂右手執五股菩提心杵。左手持般若經夾。誦觀音

大隨求呪一徧。卽時風偃海澄。又遇大鯨出水。噴浪若山。甚於前患。衆商甘心委命。同前作法。令慧辯誦娑羯龍王經。衆難俱息。高僧傳三集

▲宋徽宗崇甯間。戶部侍郎劉達。給事中吳棫。同使高麗。及還。自羣山島經四晝夜。月黑雲翳。冥蒙不知所向。舟師大怖。遙叩寶陀。俄神光滿海。四矚如晝。歷見招寶山。遂得登岸。普陀山志

▲宋徐熙載之母程氏。素敬奉觀世音。紹興四年。熙載館彭大任家。挈二子往。及歸。舟遇暴風雨。怒濤沸空。乃率同舟。齊聲持觀世音菩薩名。良久。遇巨桑一株。衆力挽之。急繫以絳。泊焉。侵晨視之。則在沙灘上。不見巨桑。抵家。母出迎。笑曰。昨夕夢媪導汝父子歸。今果然。始驗菩薩之垂救也。

夷堅志

▲明曹姓童子。江陰人。自幼持戒精嚴。嘗誓捨身。有所積。每轉施里中窮餓。萬歷庚戌二月。隨莊長老往普陀進香。至梅岑山。瞻禮觀世音金容。行童默於菩薩座前發誓。願捨身以報佛恩。既而舟出海口。到大蓮花洋。風濤驟作。行童遽合掌籲空。跳入波心。長老還山。便選日與衆僧廣修懺度。七月中。行童尋至莊長老處。具述所經。謂初跳入洋時。忽於下流數步外。見一胡僧。自水上乘一船板來。口稱吾度汝。輕疾如駛。倏忽已及舟山淺沙。挈投某漁翁家。便求寄宿。須臾不見胡僧。

其家推詢緣由。共相怪嘆。知是菩薩顯跡世間矣。明日送某於舟山鎮海寺。從首座披削。教習諸品經呪。歸故鄉。庵中不納。故尋訪到此。長老留之。挈還顧山庵。父母見而悲喜。由是遠近緇俗。翕然皈依。猗園筆記

▲明劉谷賢。黃州人。隸虎賁左衛軍。嘗從太監鄭和。使海外諸番國。舟經大海洋。劉忽失脚墮水。時風帆迅駛。不可救援。和令人登桅竿望之。遙見一人。隱隱出沒波濤中。相去數十里。咸謂無復生理。須臾。劉追及舟。舟中人大喜。速以物引上。見大魚長丈餘。悠然而去。人皆異之。劉曰。此魚載我至此。將沒者數次。魚輒以鬚鬣負起。故水不入口。舟中人問曰。爾平時作何善行。得此好報。劉云。但念觀音經耳。善餘堂筆乘

▲明釋弘濟。字同舟。號天岸。浙江餘姚人。俗姓姚。幼出家。常修法華金光明等懺。屢感神異。元泰定元年。住萬壽圓覺。明年。鹽官海岸毀。居民朝夕惴惴。丞相脫驩甚憂之。請濟禱於上竺大士前。復就海岸建水陸齋。濟入慈心三昧。取沙誦大悲神呪。帥衆徧撒其處。足迹所及。岸皆復固。衆欽若神明焉。高僧傳四集

▲明福州南臺寺。塑觀音像。將毀其舊。塑工林翁求歸事之。後數月。操舟入海。舟壞而溺。急呼觀

音曰。我嘗救菩薩。菩薩甯不救我。語訖。身便自浮。得一板乘之。驚濤接天。約行百餘里。隨流入小浦中。獲遺物一笥。頗有所資而歸。善餘堂筆乘

▲清潘國章。廣州順德人。歸信三寶。賈於端州。丙戌還鄉。至三水。遇風覆舟。國章一心念大士名。既不善浮。直沒海底。茫無涯際。惟篤念聖號。踏底信步而行。片時達岸。所攜路費仍在掌中。回首視之。始知此身從茫茫海波中出也。章後出家於日親山。字曰玄虬。觀音慈林集

▲清彭一乘。廣東南海佛山人。皈信法門。奉持六齋。康熙丁未臘月。自廣州還家。同舟六人。中途遇暴風覆舟。諸人善浮。得濟於岸。惟乘獨困舟內。不能得出。但一心虔念觀音大士名。須臾之間。水盈半腹。隨飲隨念。忽覺有人牽乘手出水上。遂挽船篷。順飄及岸。岸上人同詰之曰。頃者見白衣人趨篷到舟。今獨見汝。豈彼爲水所溺乎。乘曰。並無餘者。惟我一人耳。再三徵詰。始悟白衣者。大士垂救也。乘自錄此。求附入集。觀音慈林集

▲清秣陵黃土山劉氏子。母四十八歲。求子得之。出胎卽茹素。以母尙茹葷。不食母乳。粥湯糕粉餵長耳。己丑。劉朝南海。舟中發願求見觀世音菩薩。忽海水面先現二蓮花。如車輪大。一花中立一童。一花中立一女。隨見觀音坐大蓮花之上。劉卽禮拜。拜起仰視。菩薩與花俱不見。俄頃。風浪

大作舟覆。劉甫入水。覺眼前通紅。有一僧攜之同行。頃刻間忽到門。衣衫不溼。僧卽失所在。入門母出。劉尙如醉如夢。母以茶湯飲之。乃醒。爲母備述其事。方知觀音救拔之力。唐宜之已求書

▲清江西廣豐葉枚生。嘗述其叔岳陳廷培。平素奉觀音大士甚虔。日誦大悲呪。雖忙迫。不少輟也。道光癸巳秋。以郡司馬擢永昌守。由漢江入都。一日。偶出艙眺望。適榜人轉風帆。失足墮江。時值風緊。瞬息間。船已去里許矣。自言墜江時。浪花掀雪。水僅及膝。兩足如有物夾持者。不遽沈。亦不能動。惟袍襟飄蕩水面而已。急誦大悲呪。未三遍。而救者至。身以上未沾溼也。滄粟庵隨筆

▲清康熙二年。有漁艇泊小孤山下。夜聞山神命其屬曰。明日有鹽艘過此。速收之。及晨。果見鹽艘揚帆而來。風濤驟作。幾覆者數矣。久之獲免。是夕。漁艇仍泊故所。聞山神厲聲責鬼卒違命。答曰。奉命往收時。艘尾有觀音大士。故不敢近耳。次日。漁人追訊鹽艘。則一操舵者。持觀音齋也。萬善

資先

▲清孝廉程昭。江西浮梁人。因病久瘡。矢願持誦心經。瘡疾立愈。後早晚默念無間。道光癸巳北上下第。返權至大江。怒濤覆舟。漂蕩隨舟十餘里。蒼黃之際。一心念心經。遂得抱舷於覆舟下。若有物承其足者。藉以微坐。手力得不疲。及聞同伴岸上聲。乃急號救。得登岸焉。南海一勺

▲江甯徐方端。妻母莊氏。於方端家持觀音經歸。夫與其子不信。乃率女兒輩誦之。後遇征南兵過。虜其家資。羣女恐受辱。投於水。浮灘俱不死。兵四人攜資返舟。夜覆沒。敬信錄

▲東臺縣王媪。年六十餘。抱孫渡河。失足落水。時河漲湍急。媪抱孫立水面。如履平地。衆異之。急呼舟接登岸。詢之。云不知險難。但持觀世音聖號不輟耳。蓋媪平日持誦已久。宜爲菩薩所祐矣。

金陵西天寺慧山和尚口述。觀世音持驗記

▲江西南昌趙大成。聞白衣呪靈驗。每日誠心持誦。一日渡江。風濤忽作。同舟俱溺死。趙獨慶更生。敬信錄

▲晉有竺長舒者。本天竺人。專心誦觀音經。後久居吳中。一日。鄰居失火。相繼焚燬。長舒草屋正在下風。一心念觀世音。燄將及。忽風迴火滅。合縣驚異。有惡少訝其靈異。俟風急夜。以火投舒屋。四投皆滅。少年嗟感。叩頭請罪。舒曰。我無神力。常虔誦觀世音名。得菩薩慈護。每有難輒免耳。祥冥記

▲元魏釋法力。欲於魯郡立精舍。而財不足。與沙彌明琛。往上谷乞麻一載。將事返寺。行空澤中。忽遇猛火。車在下風。無得免理。於時法力倦眠。覺而火勢已及。因舉聲稱觀。未及世音。應聲風轉。

火燄盡滅。安穩而還。高僧傳 二集

▲姚秦釋法智。初未出家。嘗獨行大澤。忽遇猛火。四面俱至。生路已絕。便至心禮誦觀世音。俄而火過。澤草幾無遺莖。惟法智所容身處不燒。始乃敬奉大法。後爲姚興將。從征索虜。偶失馬落虜圍。乃隱溝邊叢棘中。僅得蔽頭。復念觀世音。心甚勤至。隔溝人遙喚後軍。指令殺之。而軍過搜覓。輒無見者。於是得免。遂出家。冥祥記

▲善邑卯田多火災。其地居民。莫不先後遭火厄。惟虞啓家屢獲免。交口異之。後有人於鄰近火起時。留心偵察。見大火燒至虞屋左廂。而自熄滅。累次皆然。好事者搜閱廂房。以覘其異。旋於天花板上。得舊刊觀音經板一副。始知免災有因。遂家家刻經齋誦。自是而後。其地遂斷火患。觀音經近

▲明徽人汪姓者。客居崑山王澄老對門。持齋三年。擬至普陀進香。元旦。束裝下船。忽店旁火起。急報促回。汪曰。吾積誠三載。方朝菩薩。豈以一店易吾志乎。縱被燬。吾不歸矣。竟揚帆而南。進香畢。回崑。見四面店屋及王氏大第。俱成焦土。汪店樓房獨存。萬人驚嘆。現果隨錄

▲清蔡思襄。奉委催漕運。寓黃河口東西壩。賃民房爲公廨。四圍無牆。與民宅連接。五月十一日。

西鄰失火。各家搶救什物。蔡安住不動。家人屢請出避。不顧。火至。竟越蔡解。更燒數家而息。人問何術。曰。我虔誦觀世音大悲神呪以度火厄也。人謂神呪固靈。但萬一不應。豈不枉喪其生。蔡曰。吾家自高祖以來。歷代持誦。其得脫離刀兵水火急難等厄。事跡不可勝數。卽我持誦二十餘年。凡遇急難。誠心敬誦。感而遂通。乾隆二十九年春。居京師。拐杖衝衝。南鄰火起。值南風。火猛迅。搬移不及。誦呪一遍。未畢。卽返風。火折而南。吾家獨無恙。故深知是呪可轉一切厄數。若信之不真。何敢輕生蹈險乎。

信心錄

▲朱文治。字少僊。餘姚人。清嘉慶間舉人。孝友諒直。任海甯州學正。其所著鐵簫樓益壽瑣言記云。道光四年甲申。九月七日。北鄰失火。與所居東側鐵簫樓逼近。余常誦白衣大士呪不間斷。因亟於火燄中誦之。火勢向北。而西鄰十餘間頃刻成焦土。時狂風大作。燄光南向我西樓。勢不可遏。余又誦呪。晴日中忽得驟雨一陣。風勢頓息。人力遂得撲滅之。舉家人無不膽落。是日。山間父老登高遠矚。見有兩白衣人長丈許。分立我東西屋脊。若爲遮護者。猶記戊辰仲冬晦日。海昌尊經閣後。民居失火。西北風挾火勢直撲閣簷。雖在嚴寒。窗櫺火逼而熱。余於閣下誦呪。轉瞬風寂。余得佛力之庇。今第二次矣。

聶雲臺耕心齋隨筆

▲晉蓋護。山陽人。繫獄應死。三日三夜念觀世音。心無間息。卽見觀音放光照之。鎖脫門開。尋光而去。行二十里。光明方息。觀音玄義疏記

▲晉竇傳。河南河內人。永和中。爲敵所俘。同伴七人。共繫一獄。鎖械甚嚴。沙門支道山素與傳相識。聞其被執。往候之。隔戶會談。傳曰。今命在頃刻。何法得救。山曰。若能至心歸命觀世音。必有感應。傳先亦頗聞觀世音尋聲救苦事。及得山語。遂專心默念。晝夜不輟。至誠歸命。積三日夜。觀其鎖械。如覺鬆解。有異於常。聊試推盪。忽然離體。傳復念同伴桎梏。何忍獨去。懇觀世音菩薩神力普濟。令俱免難。因復牽挽餘人。皆以次解脫。遂乘夜開戶走出。巡警莫有覺者。踰城行十餘里。天明隱身於深林中。須臾追者四出。搜覓殆徧。惟傳等所隱一畝許地。終無至者。遂得免難。衆還故里。敬信異常。道山後過江。爲謝居士敷具說其事。冥祥記

▲晉太原郭宣之。義熙四年。爲梁州刺史楊思平司馬。楊以害范元之等被執下獄。宣亦同受桎梏。唯一心歸向觀世音。晝夜敬念菩薩名號。一夕將眠時。忽覩菩薩現形。光明照獄。因叩首祈禱。久之乃沒。未幾。宣蒙恩赦。乃繪所見慈容。併立精舍。供養終其身。冥祥記

▲劉宋僧苞法師。京兆人。住祇洹寺。嘗於路行。見六盜被錄。苞爲說法。勸念觀世音。羣盜以臨危

之際。念念懇切。俄而得免。高僧傳初集

▲劉宋釋僧洪。豫州人。住持京師瓦官寺。少而修身整潔。後率化有緣。造丈六金像。鎔鑄始畢。未及開模。時當晉末。銅禁甚嚴。犯者必死。洪坐罪。繫於相府。惟誦觀世音經。一心歸命佛像。夜夢所鑄像來。手摩洪頭。曰。無憂。洪見像胸方尺許。銅色焦沸。會當行刑。相府參軍監殺。而牛奔車壞。因更剋日。續有王命。從彭城來。云莫殺僧洪。罪可原。遂獲免。安然還寺。開模。見佛像胸前。果有焦沸。

高僧傳初集

▲劉宋王球。字叔達。山西太原人。爲四川涪陵太守。居官愛民。元嘉元年。在郡失守。繫獄。防鎖堅固。球素奉法。精進不息。既入獄。見獄中百餘人。並多饑餓。球每食皆分施之。日自持齋。至心念觀世音。夜夢昇高座。見一沙門。以經一卷與之。題名光明安行品。併諸菩薩名。球受而披讀之。忘第一菩薩名。第二觀世音。第三大勢至。又見一車輪。沙門曰。此五道輪也。既覺。鎖皆斷脫。球心知神力。彌增專志。因自釘治其鎖。經三日而被原宥。法苑珠林及冥祥記

▲劉宋張興。廣東新興人。平居信佛。嘗從沙門僧融。曇翼受八戒。元嘉初。爲劫賊誣攀。避難在外。執其妻繫獄。既而縣禁失火。出囚路側。會融翼同行。偶經囚邊。張妻驚呼。闍黎何不賜救。融曰。貧

道無力可救。願爾勤念觀世音。庶獲免耳。張妻便晝夜祈念。經十日許。忽夜夢一沙門以足踏之。曰。咄咄可起。卽驚起。桎梏俱解。然閉戶嚴防。無由得出。慮有覺者。乃還帶鎖械而眠。又夢向者沙門曰。戶已開矣。覺而馳出。守備者俱酣寢。安步而逸。闔行數里。忽值一人。懼而仆地。已而相訊。乃其夫也。相見悲喜。乘夜投曇翼所。翼設法覆護之。遂獲免。冥祥記

▲劉宋張暢。常奉持觀音。南譙王構逆。暢不從。王欲害之。夜夢觀世音曰。汝不可殺暢。遂不敢害。及王敗。暢繫獄。誦觀世音經千遍。鎖寸寸斷。獄司易之。復斷。吏白其事。遂釋之。談薈

▲劉宋韓徽。居支江。與其叔俱繫郡獄。桎梏甚嚴。惶迫無計。徽本事佛。頗誦觀世音經。於是晝夜誦經。至數百徧。方晝。而鎖忽自鳴。若燒炮瓦石爆訖之聲。已而視之。其鎖自解。徽懼獄司謂其解。遽呼告之。吏雖驚異。猶更釘鑠。徽如常誦經。又經一日。鎖復鳴解。狀如初時。吏乃具告本官。官取鎖詳視。服其通感。乃釋之。冥祥記

▲齊彭子喬。湖南益陽人。任本郡主簿。事太守沈文龍。常誦觀世音經。建元元年。以罪被繫。文龍盛怒。必欲殺之。子喬憂懼。無復餘計。惟至誠誦經。至百餘遍。疲而晝寢。時湘西縣吏杜道榮。亦繫在獄。乍寐乍寤。忽見有雙白鶴。集子喬屏風上。有頃。一鶴下。至子喬邊。時復覺如美麗人形。已而

道榮起。見子喬雙械脫在脚外。而械痕猶在焉。道榮驚視間。子喬亦醒。共視械咨嗟。問子喬。有所夢否。答曰。不夢。遂以所見說之。子喬知必獲救。慮獄吏疑其欲叛。仍取械著之。經四五日而蒙釋放。法苑珠林

▲元魏孫敬德。天平中。直隸定州修士。奉法甚虔。嘗造觀音像。日夕敬禮。後爲刼賊牽累下獄。備受毒刑。忽夢一沙門。令誦觀世音經千遍。臨刑。適千遍數滿。刀斫。自折爲三段。頸膚不傷。三易其刀。三折如故。有司以狀奏聞。丞相高歡表請免死。及歸。覩其家觀音像。項有刀痕者三焉。冥祥記

▲元魏盧景裕。節閔初。爲國子博士。坐累。繫晉陽獄。至心誦法華觀世音普門品。餘力亦誦全經。俄而枷鎖自脫。主者以聞於朝。特見原宥。北魏書及法華感通

▲元魏釋超達。多學問。有知解。帝禁圖讖甚急。所在搜訪。有人誣超達有之。乃收付滎陽獄。以車輪繫頸。嚴防衛之。超達自度無生望。專念觀世音菩薩聖號。祈消夙罪。至夜四更。忽不見車輪所在。守防者皆大昏睡。因走出外。將欲遠避。以繫獄日久。兩脚乏力。不能健行。及曉。騎兵四出追之。達伏草中。騎來踏草並靡。惟從邊過。對面不見。仰看追者面。悉以牛皮障目。達一心待死。至誠稱念。入夜追者盡回。卽安然脫險。高僧傳二集

▲元魏釋僧明。北臺石窟寺主。時魏主疑忌沙門。收數百僧。互繫縛之。僧明居首。以繩急纏。從頭至足。尅期斬決。明一心念觀音。夜半覺繩少寬。私心欣幸。精禱彌切。及曉。索然都斷。因得脫逃。明日。獄監來覓。惟見斷繩在地。知爲神力所加。卽以奏聞。帝信僧人不反。遂一時釋放。高僧傳二集

▲唐董雄。河東人。貞觀中爲大理丞。自幼奉佛法。蔬食多年。與同列李敬玄王欣等坐李仙童事。俱繫獄。上震怒。使侍御韋淙鞠問甚急。雄專念普門品。日三十遍。鎖忽夜解落。雄驚告欣玄。欣玄視其鎖。堅全在地。而鈎連不開。相離數尺。卽告守者。御史張守一宿值。命吏燭之。而甚怪異。重鎖封記而去。雄但誦經不輟。至五更。又解。落地有聲。封題如故。而鎖自相離。欣玄素不信佛法。及見雄此事。乃深悟不信之咎。欣亦誦入菩薩名。滿三萬遍。晝鎖解落。與雄無異。不久俱免。法苑珠林

▲明熊開元。號魚山。指責周延儒。廷杖繫獄。當受杖時。默誦觀音大士聖號。血肉糜爛。不覺痛楚。在獄說心經。以佛法化獄中人。越一年。遣戍杭州。國破爲僧。名正志。隱蘇州之靈巖以終。居士傳

▲明姜琛與熊魚山同下獄。旣以盛暑保出。琛之母馳至京。求相見。未到前一日。遽還獄。琛大悲。慟問魚山有何方便得見母。魚山曰。觀音菩薩卽必應。盍誦普門品。琛因日誦普門品三十遍。越月。得出獄見母。後薙髮於黃山。居士傳

▲明萬歷間。浙江平湖陸五臺尙書。有僕與人爭毆。誤傷人死。懼而求救於公。公曰。殺人者抵國法也。我豈能徇情。爲汝求免。汝在獄中。宜專心誦觀音菩薩名號。三年。我來救汝。其人奉命。時時持念不怠。纔一年。遇赦而出。觀音感應記

▲清江蘇金壇孝廉虞庶顏。闔門奉佛。日禮大悲懺。誦金剛經。常刻施觀世音經。勸人持誦免劫。丁酉冬。以仇家誣陷。逮赴江甯。遠近無不寃之。庶顏但默持經懺不輟。既入獄。痛楚備嘗。如入禪定。獄卒極力掠其股脛。竟無所傷。惟有黑痕數纒而已。未幾。得昭雪。子山修甚孝。每夜爲父赤身露禱北辰。嚴寒不輟。直到事解方已。觀世音持驗記

▲倪樸老。名佳慶。因工部註誤繫獄。日夕精虔。頂禮大士。禮懺誦經。忽獄中滿壁繡出蓮華。不久得釋。後出家浪杖人座下。主席青原。號嘯峯和尚。現果錄

▲杭州王兩峯言。上虞米賈某。性好善。家奉大士畫像。崇禮有年。一日。將遠出。夢大士詔之曰。逢橋莫停舟。逢油卽抹頭。斗穀三升米。青蠅捧筆頭。寤而識之。明晨舟發。遇暴雨。舟子恩恩避橋下。賈忽憶前夢。令冒雨行。甫過橋。轟然震耳。回顧則橋中斷矣。越月返舍。叩謝大士。忽像前懸燈自墮。油淋漓徧地。猛憶大士語。急就地掬油。周抹於頭。是夕。其婦無故斷脰。斃於牀。蓋妻不淑。賈遠

販時與鄰子私。聞賈歸。鄰子頓起殺心。夜深。挾刀踰垣入。潛啓帷。賈頭油氣觸鼻。意謂婦之雲鬢也。遂捨之而殺婦。天曙。賈奔告婦家。婦翁詈堵之。無故殺妻。訟之縣。誣服畫供。忽有青蠅叢集筆端。磨之去。將下筆。集如故。令察其異。凝思良久。賈忽失聲曰。豈有誑人菩薩哉。因宣菩薩號不已。令詫問云何。賈述夢。并斷橋抹油事。令退衙。商之幕。一友曰。三升米。七升糠也。得非殺人者康七耶。飭役密訪。則賈比鄰果有康姓。行七其人者。一鞠服罪。立釋賈。博散軒叢談

▲河南滎陽人高荀。年已五十。犯殺人罪。被捕。鎖閉地牢。同牢人勸以努力。共念觀世音。荀曰。我罪至重。何由得免。同禁力勸之。荀乃發心。誓捨惡行善。專念觀音。不離造次。若得免脫。願起五層浮圖。捨身作奴。供養衆生。荀日夜用心誠切。鉗鎖自解。監司驚異。語荀曰。若菩薩憐汝。斬應不死。臨刑之日。舉刀刀折。奏聞得免罪。宣驗記

▲晉道汪法師。俗姓潘。長樂人。幼隨叔入京師。年十三。投廬山遠公出家。研宗經律。雅善涅槃。嘗行梁州。被羌賊所圍。垂失衣鉢。汪與弟子數人。至心共念觀世音聖號。有頃。覺如雲霧者。覆護道汪等身。羣盜窮索無所見。於是獲免。高僧傳初集

▲晉張崇。京兆杜陵人。年少奉法。太元中。苻堅既敗。長安百姓。望風驚竄。崇時歸晉。爲鎮戎所拘。

指爲游寇。與同伴五人。手足並械。半身埋土坑中。各相去二十步。明日將殺之。崇以生望既絕。惟潔心專念觀世音。夜中械忽自破。因得脫走。路經一寺。乃復虔念觀世音名。至心禮拜。以一石置前。發誓願云。今欲過江南。訴晉帝。理此冤楚。救諸人及妻子。心願獲遂。此石當分爲二。崇甫拜。石卽分裂。崇至京師。具陳冤狀。帝乃加宥。已爲人略賣者。皆贖爲編戶。智生道人目所親見。嘗向人述此事顛末。冥祥記

▲晉沙門開達。隆安二年。爲羌人所執。時值歲饑。羌胡日殺人而食。及置達柵中。將食之。先在柵中十餘人。皆爲所噉。達自被執。便默誦觀世音經。一刻不懈。明日常見殺。及晨。忽有大虎。突逼羣羌。奮怒號吼。羌咸駭怖遁走。虎乃前噬柵木。得成小缺。可容人過。已而徐去。達初見虎噬柵。意必遭害。既穿不入。心疑其異。知係菩薩慈悲救護。便卽穿柵逃走。夜行晝伏。竟得免脫。冥祥記

▲晉潘道秀。吳郡人。年二十餘。隨軍北征。戰敗被掠。轉賣作奴。欲歸不得。第自幼信佛法。恆至心念觀世音。每夢寐。輒見菩薩在前。後得問南奔。於窮山中。迷不知道。空際忽覩金身。指示歸路。虔誠作禮。倏失所在。遂出迷途。得歸故里。後精進彌篤。年六十令終。冥祥記

▲晉富平令欒苟。少奉佛法。嘗從征盧循。值小失利。戰舫遭火殆盡。敵又追逼。正在江心。風浪駭

目。苟甚恐怖。自忖必死。哀切念觀世音名。祈消夙罪。俄見江中有一人。挺然孤立。腰與水齊。苟心知祈念有感。便投水就之。體既浮涌。足如履地。俄而救兵至。遣船接應。遂得濟。冥祥記

▲晉尼令宗。俗姓滿。山西高平金鄉人。遇喪亂。為虜所驅。歸誠三寶。誦普門品。求訴得放。循路南

歸。行出冀州。復為賊所逐。倉猝登枯樹。專誠念大悲觀世音名。捕者前望。終不仰視。尋索不得。呼

嘯而散。下樹復向南行。晚達孟津。無船可濟。竭誠持誦大悲觀世音名。忽見一白鹿。下涉河流。宗

俯身鹿背。隨鹿而濟。曾不沾濡。因得達家。仍傾誠入道。學行精懇。年七十五脫化。比丘尼傳

▲苻秦畢覽。山東東平人。素崇事觀音。隨慕容垂北征。沒虜。單騎逃竄。虜追將及。覽至心念觀世

音名。既得免脫。入山。迷惑失道。又專心持念。中夜見一僧。法服持錫。示以途徑。安然至家。冥祥記

▲苻秦右丞相徐義。為慕容永所獲。械埋其足。將殺之。義誦觀音經。至夜半。土開械脫。於重禁之

中。若有人導之者。遂奔楊佺期。以為洛陽令。晉書

▲晉劉度。平原聊城人。同邑千餘家。並奉觀音大士。歲時誦經禮拜。值虜主木末時。此縣常有逋

逃。末大怒。將屠其城。眾皆震懼。度乃潔誠率眾叩禱觀世音菩薩前。頃之。末方治事。見有物從空

飛下。繞其屋柱。驚視之。乃觀世音經一卷也。末大歡喜。令眾共讀。因省刑戮。於是一城悉得免害。

▲晉南宮子敖。始平人。戍雲南新平城。爲獬狘虜兒長樂公所破。一城皆被誅害。子敖自度必死。但至心念觀世音。及加害羣刃交下。不能傷。持刀者反覺疲懈。四肢不遂。時長樂公親自臨刑。驚問之。子敖亦不知所以。因問汝有何能。聊且答云。能作馬鞍。遂得原釋。後脫險還故鄉。造一觀音小像。貯以香函。行則頂戴之。冥祥記

▲晉尼明感。俗姓朱氏。高平人。世奉佛法。爲賊所獲。欲以爲妻。備加苦楚。誓不受辱。謫使牧羊。經歷十載。常念三寶。兼欲出家。忽遇比丘。就請五戒。並蒙授觀世音經。晝夜持誦。願得還家。逃走東行。初不識路。逕入一山。見有斑虎。相去數步。初甚恐怖。少頃意定。遂隨虎而行。積日彌旬。得達青州。將入村落。虎便不見。比丘尼傳

▲北周京師大追遠寺僧實禪師。俗姓程。咸陽武陵人。素有道德。一日正午。忽登樓鳴鐘甚急。命衆僧各備香火。香至。衆問故。實曰。此刻江南某寺有講堂欲崩。將壓死千人。可各齊心念觀世音菩薩以救之。由是經聲佛號。響徹禪林。後數月。江南報至。云是日午刻。揚州講堂內說法。聽者盈千。忽聞西北異種香煙。及梵音經唄。從講堂北門而入。直出南門。衆皆駭異。尋聲走出。聽其所之。

人方走盡。堂已崩塌。無一傷者。梁主聞之。三度詔請。不至。以保定三年七月十八日示寂。哀動朝

野。高僧傳
二集

▲元魏末沙門法禪。一日偕法侶多人山行。忽逢強賊。法禪見賊人來勢兇暴。知難以理喻。惟虔念救苦救難觀世音名。賊追之不得。挽弓射之。欲放不得。賊大驚異。投弓於地。又不能得。認爲神人。捨命逃走。禪等遂安然過此險境。所在喧傳。高僧傳
二集

▲元魏沙門道集。行壽陽西山。爲賊所獲。縛之於樹。將殺之。集至誠念觀世音。守死不輟。及引刀。屢斫皆無傷損。賊怖走。集因得脫。觀音感應傳及
高僧傳二集

▲劉宋邢懷明。直隸河間人。爲大將軍府參軍。嘗隨南郡太守朱循之北伐。同遭陷沒。伺隙俱遁。覓路南歸。夜行晝伏。奔走三日。猶懼追捕。乃遣人探視虜營有何舉動。候數日不還。一夕將雨。天色陰暗。所遣人於天將曉時忽至。乃驚曰。向者遙見此地火光甚明。故來投之。那得至而反暗。循等聞言。驚愕不已。懷明奉法已久。自從出征。恆頂戴觀世音經。誦讀不廢。深夜亦暗誦。咸信此次免難。實荷此經神力。冥祥
記

▲隊長李儒俊。鎮虎牢。爲魏所圍。危急欲降。夜踰城出。見賊縱橫層駐。時皆酣睡。俊乃一心念觀

世音便穩過賊營。未幾敵軍來追。儒俊匿入草叢。未及藏伏。已呼哨掩至。儒俊驚恐。一心專念觀音經。忽得一良馬。捷馳而去。辨正論

▲毛德祖。河南滎陽人。平素合家念觀世音。初投江南。偷道而過。道逢虜騎。被其追逼。伏路側蓬蒿中。半身猶露。自度難免。俄而雲起雨注。虜騎避雨急返。遂免於難焉。辨正論

▲裴安起從虜。叛還南。奔至河邊。不得過。望見追騎將至。命在須臾。乃竭聲稱觀世音名。忽見一白狼。卽俯身抱之。狼縱身一躍。便過南岸。安起正驚異間。忽失狼所在。追騎相與瞠目失色而回。

觀音玄義疏記

▲劉宋慧和沙門者。京師衆造寺僧。元嘉之難。和猶爲白衣。屬劉胡部下。胡常遣將士數十人作諜東赴。和亦預行。至鵲渚。值臺軍西進。諜衆離散。和易野老弊衣。提籃負擔。若類田人。時諸游軍捕諜甚嚴。見和形色。疑而問之。和答稍謬。被擒發斬。和自散走。便一心誦觀世音經。至將斬時。祈懇彌至。旣而軍人揮刃屢折。驚而釋之。和於是出家。遂成精業。冥祥記

▲劉宋王玄謨。山西太原人。爲甯朔將軍。圍滑臺。魏主柘拔燾率大軍至。玄謨軍散亡略盡。主將蕭斌將殺之。沈慶之固諫乃止。初玄謨始將見殺。夢人告曰。誦觀音經千遍則免。仍見授。旣覺。誦

得千遍。將刑。誦之不輟。忽傳呼停刑。

宋書及南史

▲劉宋沙門曇無竭。與徒屬西行。至罽賓國。求得梵文觀世音受記經一部。復行向中天竺。屢經危難。惟繫念所齎觀世音經。未嘗暫廢。將達舍衛。路逢山象一羣。無竭稱名歸命。有獅子從林中出。羣象奔逸。又有野牛嗚吼而至。將欲加害。竭復歸命如初。忽見大鷲飛來。羣牛驚散。遂得免。

高僧

傳初集

▲劉宋車母。其子遭廬陵王青泥之難。爲虜所得。供役賊營。車母素奉佛。因燃燈七盞於佛前。每夜虔誠念觀世音。願子得脫。如是經年。其子乘隙南奔。在途晝伏夜行。不辨東西。惟遙見有火光七道在前。似村欲投。終不可至。歷七日夜。不覺到家。見其母猶在佛前伏地。七燈煌煌。始悟前因。

宣驗記

▲梁釋僧朗。爲魏所虜。與同學中途逃逸。然防守甚嚴。無路可脫。適有大樹。傍臨絕壁。遂以鼓旗竿繩繫懸而下。時夜大闇。崖底純棘。無安足處。欲上崖頭。恐爲所覺。捉繩懸繫。勢難久停。因相謂曰。今厄頓至。惟念觀音。以頭叩石。一心專注。須臾光明從日處出。通照天地。乃見棘中有得下處。因光至地。還忽冥暗。良久天曉。始聞魏軍警角將發。而山谷重疊。不知出路。候月而行。路值大虎

在前。朗語僧曰。我等有感。所以現光。今遇此虎。得非聖人示吾路耶。於是二人逕詣虎所。虎卽前行。若朗小遲。虎亦暫住。至曉得出。而失虎蹤。高僧傳初集

▲王乙。自幼卽勤持如意輪呪。開元初。徒侶三人將適北河。有船夫招呼。願載乙等。不論渡資。舟至河心。船夫出酒食。招渡客共飲。頻舉酒屬乙。乙屢聞空中言勿飲。心愈驚駭。酒雖入口。亦潛吐出。由是獨得不醉。入夜泊舟岸邊。以次睡休。乙慮有不測。默坐念呪。忽見船夫手持大斧。斧口鋒利。長五六寸。躍入艙中。先斷二奴頭。又斬二件。次當及乙。乙伏地受死。其燭忽滅。乙被斫三斧。背後有門。久已釘塞。忽有二人將門推開。扶乙投水。岸下水深。又掖之登岸。血雖被體。毫無痛苦。見風血止。瘡口自合。夜行十餘里。投宿草舍。越五六日。途人喧傳汴州獲賊。問所以自投法網之由。答云。正欲行凶。燭光忽滅。便失王乙。心緒恍惚。不知所之。遂致被執。王乙當時身中三斧。一瘡雖破。未損筋骨。未幾。平愈如故。廣異記

▲成珪者。唐天寶初。爲長沙尉部。運送河南橋木。始至揚州。突遭風濤。木遺失甚衆。州司謂珪盜賣。拷掠難堪。妄承破用。州司轉帖潭府。時班景倩爲潭府。遣校楊覲。至揚執珪。覲欲婪賄。非刑逼勒。陸路遞行至江甯。方入船。以鎖枷附於船梁。四面釘塞。唯開小孔通食。珪意若至潭府。必死。便

至心念救苦觀世音菩薩。恆一日一食。或不食。但飲水清齋。經十餘日。至滁口。旁晚。念誦懇至。枷鎖忽然開解。乃伺夜深。舟人盡臥。拔除所釘。湧身出船背。至覲房上。呼曰。楊覲。汝如我何。覲驚起。問何得至此。珪曰。當葬江魚腹中。豈甘死汝輩手耶。卽跳入水。初至江底。須臾。遇一木板。中有豎柱。珪騎木抱柱。忽得浮至水面。中夜暗黑。四顧茫然。珪至心念觀世音。憑浪送入蘆灘。天明。投村落中。居民送至滁州。官寮悉驚歎。爲備驢馬糧食等助其行。珪便入京。赴御史臺申枉焉。集異記

▲唐徐善才。陝西醴泉縣人。常齋戒。誦觀世音經。逾數千遍。曾往京城延興寺。修營功德。及還家。道逢胡賊。將所掠漢人。並向洪崖殺之。善才知不免。惟至心念觀世音經。當殺時。了不自覺。至初夜。方悟身在深澗樹枝上。去岸三百餘尺。以手摸項。覺微痛而無傷。漸下樹。循澗南行。可五六十里。天漸曉。去賊已遠。得路還家。琬法師嘗說其事。法苑珠林

▲吳郡陸暉。繫獄待死。命家人造觀音像。冀得免死。臨刑刀折。三易三折。官問故。答云。予近發心造觀音像。恐是觀音慈力所致。及看大士像。項上有三刀痕顯現。因奏聞獲免。宜驗記

▲唐光啓間。黃巢作亂。所過殺戮。城社爲墟。血流半天下。一日忽至杭。人民無所竄匿。哭聲震原野。所恃以爲捍禦者。惟錢鏐一人而已。老稚幾百萬人。泣拜觀音大士前。願乞慈祐。巢將入境。鏐

振兵拒之甚力。巢亦素聞鏐勇武。方欲格戰。聞空中有念佛聲。仰視雲端。旌幢寶蓋。擁護大士。其火首金剛天龍。修羅等衆。扈從無算。鏐兵見之。氣壯百倍。巢歎曰。此佛土也。戒戢羣下。遂踰日而去。由是鏐益篤信大士。天竺志

▲唐昭宗乾甯元年春正月。越州董昌作亂。焚府庫。殺官吏。浙人震駭竄匿。橫罹鋒刃者甚衆。鎮海節度使錢鏐。躬禱於大士之前。祈爲默佑。以免禍害生靈。乃仗鉞出兵。方對敵之際。空中忽聞萬騎馳驟之聲。昌一見褫魄。不俟接戰。卽全越底定。天竺志

▲太平州寇陸德謀反。燒劫居民。殺害官吏。蕪湖尉儲某。竄避不及。爲賊黨縛去。德自臨斬。見其頂有毫光三道出現。乃釋之。且令主邑事。付以倉庫。後盜平。因此策勳改官。儲尉每日誦觀世音菩薩千聲。圓覺經一部。故得慈護。夷堅志

▲宋鄱陽吏周世亨。謝役之後。虔奉大士。慶元初。發願手寫觀音經二百卷。施人持誦。齋戒繕寫。方及二十卷。正提筆欲繕寫時。羣鴉數十。鳴噪屋上。逐之不退。起禱於大士像前。而後出追。見一鴉中箭流血。衆鴉爲拔。箭不得出。以故悲叫。周速誦寶勝如來救苦觀音。以筆指之。箭自拔出。鴉飛入空。周讚歎間。箭從天井內擲落佛龕之側。靈異若此。轉因錄

▲宋太宗雍熙三年五月。大將曹彬有岐溝之敗。見辱於契丹。帝以兵敗寇迫。形勢險惡。憂甚。乃遣內使詣上天竺。傾誠祈禱於大士。以求解救。張齊賢遂有代州之捷。時諸將夜戰。遙見火光中有金甲大將。長數丈許。立於雲端。持赤幟指揮。軍心大振。虜騎望之。相率膽落。辟易奔潰。天竺志

▲江西廣信府觀音谷。俗傳宋時有人民在山取銅鑛。掘入空洞。深不可測。山將壓。忽有女子提籃而至。籃中盛金魚一尾。在洞口喚賣。坑中人爭出。山崩。女子不知所往。廣信府志

▲貴州脩文縣白水洞產水銀。官設場開採。夫役千餘。巖下居民數百戶。洞前二里許。有溪流且淺。忽來一美婦。浴其中。居民空室趨觀。甫近溪畔。忽轟然巖塌。廬舍俱陷。幸男女俱出。悉免於難。而溪中浴婦杳然無蹤。越三載餘。村民至墜石處。搜掘藥物。聞石中呼救聲。衆以爲鬼也。叱之。應曰。我寨西趙二也。昔年山崩爲石壓。幸當隙處。得不死。衆力出之。云自山初震塌時。昏暈不省。及蘇。見四圍皆石。僅足容身。無術可出。且苦饑。突有白鼠伏身旁。長尺餘。目光如閃電。照石上。歷歷有字。諦視乃觀音經也。鼠伸舌舐字。作吞咽狀。異焉。試效之。饑頓減。後每舐一字。輒果腹。累日。三年來經字舐滅殆盡。今只餘數行耳。趙爲人誠樸。信奉觀音經呪。每晨必盥誦數遍。歷數十年不衰。抵家取經展視。字迹大半滅沒。僅存後幅數行。宛石罅中所見也。異譚可信錄

▲河西六都吳士啓。畢生虔誦觀音經。年八十餘。歿後。置所誦經卷於空樓。童孫輩登樓嬉戲。往往失足墮。樓高而無恙。家人詢之。云見白衣姆從空抱之。始悟大士救護。乃合門禮誦。觀音經近徵

▲明雷法振。福建人。萬曆間。居深山。以燒炭爲業。家有鴨欄木。紋理細膩。法振偶發一念。欲刻此木爲大士像。役役於雜務而未果。一日。入山燒炭。獨行樵徑。突遇餓虎。忽見一綽約婦人。當虎叱之。虎懾伏。叩首而退。法振拜謝。叩其姓名。曰。身是君家鴨欄木耳。俄不見。法振大悟。遂擇吉如法雕刻。終身頂禮。不敢茹葷。南海慈航

▲清沈均安。字際可。江蘇高郵人。官江西蓮花廳。以廉潔稱。祖父文崧宰山東霑化時。有相契同官某。親老無子。將奉差西藏。崧慨然代往。聞者驚歎其高義。跋涉三年餘。始回內地。塗中冰雪苦寒。往往月餘絕人煙。隨僕二人。其一夏祥者。侍主最忠。每住營帳時。輒不見。少頃。必手捧粟至。炊熟奉主人。不知粟自何來也。一日晦霧。行至陡坂。下俯深澗萬丈。二僕墮澗中。崧馬足已陷。忽仰見雲霧中。大士手持青蓮花。向崧指導。俄頃身已越澗至平地。痛喪二僕。馬嘶不前。久之。曠黑。聞人語聲。急呼之。則夏祥獨至矣。云墮澗時。有綠毛人長丈餘。自澗中負出。主僕相抱大哭。崧歸後。語高文良公。高咨嗟動色。繪大士在雲霧中持青蓮花指導出險圖。書年月紀之。可信錄

▲清道光間。劉翼庭醫生。江蘇江甯人也。每日晨興。必在大士像前。持誦大悲呪七遍。閱二十年。如一日。嘗告記者曰。一日薄暮。聞剝啄聲。啓扉見一姥。意謂必就醫來者。延入客座。呼進茗敬客。家人懵然不解。蓋未之見也。姥云。汝今年十二月十四日有災。宜慎。遂出。及期。庭閉戶。不會客。晚寢起。溲仆地。右足陷入椅內。殊覺痛楚。默持大悲呪不輟。數日愈。觀世音持驗記

▲清釋智嵩。字靈岳。鼂陽人。住端州高要縣梁山。丁亥年兵伐梁山。執嵩擔連。復奪手中數珠。嵩抗之。兵遂拔刃斬嵩。嵩卽稱觀世音菩薩。刀下。兵爲衣袖所掛。其刃不落嵩頭。因而得免。嵩徒實際者。時匿棘林中。一心持念大悲呪。兵衆徧山搜捕鄉民。以鎗刺棘林。鎗將及際。兵卽顛蹶山下。觀音慈林集

▲山東濟甯南關有殿。向供觀音大士及關帝文帝像。歲久傾圮。庠生陳益修。字玉筍。募資重建。因與真教寺相鄰。同人楊生花輩乘機阻撓。欲毀廟以益彼寺。陳力訟之官。得制止。癸未春。流寇陷城。生花等集衆乘變。途遇陳。以前忿。衆回暈集。楛朴雨下。且劊雙目。擲屍其舍。魂見關帝慰之。謂當請觀音大士來賜汝目。旋見天女披白衣。備極相好。賜羊睛二枚。令吞之。並出甘露使飲。遂甦。家人見君生。駭甚。急移燭視。兩目復生。逮明。州民遍傳此事。回衆因亦悔懼。明年己酉。益修兄

弟與同事王宏王道俱同捷。修丙戌成進士。除貴池令。官戶部郎中。而生花爲流寇所戮。剜目剖心。慘莫比焉。兗州志及西河合集

▲清邵以貞。廣州府諸生。歸心佛教。戊子歲。穗城有新兵。強易於市。賈者與之抗言。兵遂告開府李公。謂民欲叛。以服短衿爲號。卽閉城捕執。但見衿短斬之。然嶺南之俗。內衿多短。李公不容分訴。如是已斬數十名。時貞在列。唯一心懇念大士名。次至貞卽止。而衆被枉者亦由是悉免。觀音慈林集

▲清釋行仁。字指一。河南光山張氏子。弱冠讀書白鹿洞。遇異僧戒曰。子有大難。能持大悲聖號可解。師矢心受持。崇禎辛巳。獻寇破縣。屠戮及師。刃忽自斷。賊異之。得不死。遂薙髮。甲申抵金陵。從千華昧和尚受具戒焉。法華感通

▲清黃可明。東莞富家子。海中被掠。執至寇巢。鎖連戶扇。賊行他劫。使婦守之。時明家延僧諷誦普門品經。其夜。賊婦見明邊有異色祥光。至日。詰之。明知獲祐。俟婦適鄰家。卽負扇而竄。離巢登嶺。見一樵人。求爲破扇脫鎖。踰數十里。始免。觀音慈林集

▲清麥傳晟。順邑麥村人。稟持六齋。康熙甲辰八月初二日。被擄至賊巢。以鐵鍊四條鎖其項脛。

晝夜默念大士洪名。專誠不亂。越四日。賊餽其食。無箸。折竹枝與之。鎖門而去。賊每日數數啓門檢視。是日卽失鑰匙。但門外窺探而已。晝卽劈此竹。試刺其鎖。連開者三。唯頂上一鎖難動。自知已被大士垂救。懇禱彌切。至初八日。復試以竹刺之。其鎖頓落。欲逃未決。乃以身畔所攜生薑爲校杯。禱曰。弟子蒙祐。拘繫頓釋。今欲逃去。恐復被執。則無生理。倘許卽行。乞連示五勝校。除我憂疑。果如所禱。卽攀升屋上。見隔溪乃岳父家。遽奔赴之。越溪及岸。復爲賊黨闌截。晝以兩肘掣開。如豕突羊羣。無能制者。卽投岳父家。賊共闌門索取。岳父告曰。晝家貧。乞宥旬日。當隨力策辦銀兩。踰日。官軍臨剿。賊徒奔潰。不費一文而免。晝叔連峯。素奉齋戒。亦於是年正月被擄。乘間逃入村邊空舍。以破竹匾蠶簿覆身。賊追繞村。告村人曰。有麻面鬍子。逃入汝村。可速獻出。不然卽蕩平村戶。峯親聞之。怖甚。切念大士名一聲。拔鬚數莖。遂併拔盡。竟不覺痛。忽有一人。從他處來。云鬍子已過山去矣。羣賊因散。峯乃出告空舍主人。主人贈以衣帽。認爲親故。買舟送歸。觀音慈林集

▲清劉藹叔。廣州順邑司李中雷公之子。幼承庭訓。敬信三寶。自述髫年被擄。自辰至午。卽獲脫免。順治丁亥秋。往香山。復爲寇所執。勒財不遂。推墜海中。自念唯菩薩可恃。卽至心念觀音名號。時手被縛。將沒海底。困苦欲絕。而彌加篤切。忽覺足拇抵沙。漂流移時。漸至淺處。賊見之。卽挽上

船暫留候贖。其賊沿河殺戮。藹竟獲全。越五六日。暴風大作。賊船投泊無處。遂回心釋放。且曰。想係汝合家齋戒所感也。時值世變。遭難者不可勝紀。獨藹家無虞。觀音慈林集

▲那連提黎耶舍

譯義爲尊稱

三藏法師。北天竺烏菴國人。年十七。發意出家。行化雪山之北。至於峻

頂。見有人鬼二路。人道荒險。鬼道利通。行客心迷。多尋鬼道。漸入其境。便遭殺害。昔有聖王。於其路首。作毗沙門天王石像。手指人路。同伴一僧。錯入鬼道。耶舍覺已。口誦觀音神咒。百步追及。已被鬼害。自以呪力。得免斯厄。因復前行。又逢山賊。專念前咒。便蒙靈衛。賊來相突。對目不見。循路東指。遠投齊境。天保七年。屆於京都。高僧傳二集

▲達摩笈多。

譯義爲法密

南天竺羅囉國人。聞支那大國三寶興盛。欲觀風化。利物弘經。便踰雪山路。

經砂磧。水草俱乏。乃專誦觀世音呪。夜雨忽降。身心充悅。尋迷失道。信步前行。跋涉積年。遂達茲土。時開皇十年冬十月也。高僧傳二集

▲唐李昕。善持大悲呪。家在東郡。客游河南。其妹染疾死。數日蘇。口述云。初被數人領入墳墓間。復有數十人欲相凌辱。其中一人忽云。此李十四郎妹也。今李十四郎不久到家。彼善人也。如聞吾等取其妹。必以神呪相困辱。不如早送還之。乃相與送歸。少頃。昕卽到家。一如所云。廣異記

▲唐玄奘法師。河南緱氏人。幼聰慧。有操行。發心往西域求大法。時國基初立。中外不通往來。凡諸關要。防察極嚴。屢經被執。咸蒙相諒。遂得前行。至莫賀延磧。寬八百里。古曰沙河。上無飛鳥。下無走獸。復無水草。惟一心念觀世音菩薩。及般若心經。初法師在蜀。見一病人。身瘡臭穢。衣服破汚。心甚愍之。施與衣服飲食之直。病者慚愧。乃授此經。因常習誦。至沙河間。逢諸惡鬼。奇怪異類。繞人前後。及誦此經。發聲皆散。惟絕水五日。瀕死不能行。臥沙中。默念觀音。夜半忽有涼風觸身。冷快如沐寒水。遂得目明。馬亦能起。進發。馬忽異路。制之不得。乃遇水草。人馬俱得蘇息。身命重全。傳本

▲唐歐陽璨。徐州人。素持誦大悲神呪。家在州南五十里。一日入城。薄暮方歸。約行二十里。忽值雷雨大作。路半有山林夾道。密陰邃谷。向多猛獸。璨心悸不已。既達山路。雨勢彌盛。俄見巨物出於前。長丈餘。色白。首足都不可辨。相去纔十餘步。同行不離。璨懼甚。欲誦大悲呪。口噤不能發聲。但存心默念。數遍後。方能朗誦。誦之不輟。怪忽隱滅。雨亦稍息。安然至家。轉因錄及玉堂閑話

▲宋洪洋。一日自江西樂平還所居。日已暮。二僕荷轎。一僕負擔。必欲以中夜至家。行至二更。微有月明。忽聞大聲發山間。如巨木數十本摧折者。心知其異。亟下輿。與僕謀所避處。望道左小澗。

無水。可以蔽匿。卽趨而下。其物已植立於前。長可三丈。從頂至踵皆燈也。洋素持觀音大悲呪。急誦之。多不計數。物屹立不動。洋亦喪膽仆地。然誦呪不輟。物稍退後。相去漸遠。遂不見。洋歸而病。久乃愈。擔僕亦然。二轎僕皆死。夷堅志

▲宋賴省幹。建甯人。素挾妖術。以人祭鬼。常於浙中。買十餘歲童女。養以供用。其母信佛。女隨之。習念心經。後當輪祭。沐浴裝飾。鎖空室中。女自分必死。一心誦經。夜半覺有物自天窗下。光燁燁然。怖甚。急念揭諦呪。女口中忽出光。物欲進復卻。良久。口中光漸大。出射此物。鏗然有聲仆地。值巡卒過。女大叫殺人。卒破壁取女。見一大白蟒死矣。捕賴及家人。鞫問伏罪。黥配海外。籍其家。後爲詹安撫居宅。談藪

▲宋張誠。江西吉水人。乾道元年。往潭州訪故舊。次醴陵界。投宿客店。主人一見欣然。延接加禮。供膳豐盛。張訝其無因。恐有他意。辭以不能飲。且長途困倦。遂早就寢。中夜忽醒。見堂上紅燭高照。起而竊窺。主人肅衣冠。設茗酒。拜祝畫像前。聆其詞。屢言張客。知必以己祭鬼也。不敢復睡。主人旣退。望畫像。雙睛大如盞。知非善類。誠素聞大悲呪能辟邪。平時早熟習。於是至誠持念。求解災厄。甫數遍。見一兇神自軸而下。狀猙惡可怖。乃閉戶。誦呪愈力。時聞戶外叩擊。欲入不得。久之

乃已未幾。天已大明。張急趨出。但聞店家聚哭。行二里小住。問塗中來人。云店主中夜暴卒。詰其實。蓋三世事妖鬼。歲祭一人。其法若無外人。則禍家長。湘中惡俗。往往有之。張自此杜門不復出矣。靈驗記

▲梁釋道融。獨宿逆旅。時天雨雪。中夜始眠。見有鬼兵。其數甚衆。中有鬼將。帶甲挾刀。形容壯偉。乃持胡床對融前踞之。便厲色揚聲曰。君何謂鬼神無靈耶。速曳之。下地。諸鬼卒將下手。融虔誦觀世音。一聲未畢。卽見所住床後。有一天將。長丈餘。穿黃色衣服。手執金剛杵。向鬼將擬之。衆鬼便驚散。甲冑之屬。碎爲微塵。佛祖統紀

▲梁釋慧簡。精脩戒律。虔誠勇毅。世罕其選。荊州廳事東。舊有別齋三間。由來多鬼怪。人不敢入。簡居之。自住一間。餘安經像。俄見一人。黑衣無目。從壁中出。卽便倚簡門上。時慧簡心中甚了了。但口不得語。遂於心中默念觀世音菩薩。良久。鬼曰。聞君精進。故來相試。今神色不動。敢相逼耶。倏然還入壁中。簡徐起澡漱。禮誦訖。寢處如常。當夜夢向人曰。僕於漢末居此。已數百年。爲性剛直。多所不堪。君誠淨行好人。特相容耳。簡住積載。安穩如初。若經他行。是室無有人能住之者。佛祖

▲清俞宗。上海人。一日。其妻忽寒戰譫語。曰。我婆媳兩人。道經於此。饑甚。速以食物餉我等。喃喃不已。審其音。無錫人也。邀鄰醫郁在中診視。醫者曰。病人無脈。此不可以藥治。疑有祟。盍延觀音堂僧誦經解之。即延僧爲誦心經及大悲呪。金剛經。甫一週。即聞病者誚讓云。我初不肯。汝欲來此。今如何。徧體飛刃刺我。痛不可忍。其速去。媳唯唯。已而寂然。乃不復寒戰。神稍呆。越宿而起。則已愈矣。陳茹征
質直談

▲湖北孝感程菽園進士。爲孝廉時。就秦中講院席。一日山行。宿野店。甚荒涼。因長途勞頓。不暇致詰。即就草榻臥。僕宿外間。程夢寐中。忽覺有物壓其足。心知爲邪魅。口不能言。窘甚。竭力欲起坐。而全身木強。不能轉側。未幾。壓且過腹。益大窘。思佛氏經呪。可以驅邪。而素未誦習。偶憶法帖中有趙松雪書之心經。尙能記憶。急默誦。至色卽是空二句。氣忽透出。大聲疾呼。而怪物遁矣。僕驚起慰問。遂定心神。誦畢。復誦數遍。始安眠。曉起。詢之店主。言殊支離。而鄰人言。是店固多鬼魅也。守一齋
筆記

▲江西浮梁桃樹嶺李菁園。講學於吳家墩。一日。由家詣館。淡月朦朧。覺舉趾多礙。心異之。乃念觀音經。甫七遍。始知荆棘中行。且誤登山椒里許矣。遂尋路抵館。向聞此地有崇迷路者。若非夙

習是經。此夕不知若何結果矣。陳懷績筆述

▲九江王曰光。偶至親戚家。見所印觀音經。持歸數卷。供香火龕內。時瘟疫流行。鄰舍徧染。惟曰光一門無恙。村落中人死亡過半。曰光夜夢大士囑曰。予憫此地劫難。汝速將經卷施散。每戶一卷。疫自除矣。醒而大悟。復乞諸親戚。又得若干卷。分到之戶。家中患疫之人。無不立愈。遠近效法。全活無算。觀音經靈驗錄

第三篇 與福慧

▲唐釋法通。自幼好參佛道。師事國蹤禪師。國蹤者。智藏之上足弟子也。居開元寺。法通將復智藏舊建之塔於龔公山。默念觀音。不食累日。精感山靈。靈泉湧出。遠近癘者病者。飲之輒蠲。獲施甚廣。其塔一歲而就。寶光塔碑文

▲唐潭州華林善覺禪師。裴休訪之。問有侍者否。師曰。有一兩個。乃喚大空小空。二虎從庵後出。師曰。有客且避。二虎咆哮而去。休問何法精修。感得如斯。師提起數珠曰。山僧祇念觀世音。山堂肆考

▲唐僖宗光啓三年。丁未。時中原鼎沸。黃巢李克用等屠戮生民。戰爭不息。浙江杭州臨安人錢

鏐。膂力絕人。有保障兩浙之意。起自草野。奮挺一呼。驍勇雲集。殺弘誅昌。吳越安堵。至是以屢建大功。立爲杭州刺史。從民望也。旣拜官。痛加砥礪。衆益欽戴。誓奠安東南。不使有一夫之警。猶豫未決。夜夢見觀音大士。曉之曰。汝有心慈悲。不忍殺人。將屏藩一方。百戰不衄。中原天子雖易五姓。汝之疆土固自若也。福祿遐永。子姓綿遠。珪組蟬聯。封王拜相。莫可涯涘。二十餘年。當覓我於天竺山中。鏐覺而異之。自是所向無前。屢有神功。種種響應。若合左券。故書之於策。昭示子孫。世崇祀。四世五王。與五代相終始。而大江東西。鹿苑寶坊。翬飛雲湧。數以千計。皆錢氏所創。而上天竺看經庵。則其所發軔者云。天竺志

▲後唐長興三年。壬辰三月。吳越武肅王錢鏐卒。中子元瓘立。素畏朱全忠之酷烈凶殘。不遑寧處。乃出居別館。齋戒浹旬。徒步拜叩大士。冀得夢兆。以破其惑。忽夢邑之山林。皆被錦綺。光彩晃耀。天日。瓘喜躍曰。此吾先王時事也。吾當奠枕鼾睡耳。彼胡其奈我何哉。天竺志

▲宋太祖建隆元年。吳越王錢俶。以太祖卽位。進止未決。乃禱於大士。以求指迷。齋宿殿宇中。夜夢紫衣神人。命金甲將校數十百人。持彩繩由揚子江北岸。以繩隔界。直抵豫章閩越而止。急呼俶詔之曰。此汝故物也。復與以袍笏冠冕。無算。覺而喜曰。吾無恐矣。卽擇日上表。獻圭璧儀物稱

賀。帝大喜。賜宴。詔使者曰。歸報爾主。朕將倚彼爲屏翰。以翊贊至治。當不負前勳也。已而毫髮不爽。王由是益感念大士垂示之賜。頂戴彌虔。聿新殿宇聖像。以答靈貺。天竺志

▲明萬歷間。包憑。字信之。浙江嘉興人。博學高才。累舉不第。留心二氏之教。尤信持觀音經。一日。游泖湖。偶至一村寺。見觀音像淋漓露立。卽解囊得十金。授主僧修之。僧告以工大銀少。不能竣事。復取松布四疋。衣七件與之。內紵褶係新製。僕請留。憑曰。但得聖像無恙。雖裸裎何傷。僧垂淚曰。捨銀及衣布。猶非難事。只此一點心。何可易得。工完。偶宿寺中。夢伽藍告曰。菩薩賜汝子孫享世祿矣。後子汴。孫檉芳。皆登第作顯官。鞭心錄

▲明沈見泉祖。游江蘇吳江縣之黎里羅漢寺。見後殿毀塌。觀音首頂箬笠。歎曰。菩薩能與人智慧。某願重修此殿。求吾子孫有一二讀書者足矣。歸謀之婦。婦曰。今有米數百石。速易銀。獨力完此功德可也。不日。棟宇法相煥然鼎新。其孫堯中。曾孫夢斗。相繼登第。鞭心錄

▲宋釋求那跋陀羅。譯義爲功德賢 罽賓國王族也。深入三藏。博通大乘。元嘉中。東游。欲講華嚴經。以未

通華語。深懷愧歎。因朝夕禮懺。虔禱觀音。以求冥應。忽夜夢神人執劍。持一人首爲易之。豁然便覺。自後華語無不通曉。遂講說至十數遍。聽者咸傾服。高僧傳初集

▲唐釋元康。貞觀中遊學京邑。先居山野。恆持誦觀音求加慧解。遂感鹿一首。角分八歧。厥形絕異。康撫而馴伏。遂豢養之。乘而致遠。曾無倦色。康辯才無礙。嘗於安國寺講三論。遂造疏解中觀之理。別撰玄樞兩卷。總明中百門之宗旨焉。高僧傳三集

▲宋智覺永明禪師。諱延壽。得法於天台韶國師。嘗行法華懺二十一日。夢觀音菩薩。以甘露灌口。因得無礙辯才。著宗鏡錄百卷。會融諸法。同入心宗。又著萬善同歸集三卷。發明空有性相之旨。提策真修。歸之中道。日課佛名十萬。專修淨業。居永明寺十五年。弟子千七百人。常與衆受菩薩戒。施食放生。悉皆迴向淨土。開化八年二月二十六日。晨起焚香告衆。趺坐而化。武林高僧事略

▲宋義寂法師。俗姓胡氏。溫州人。講諸經論。并造疏註。寓四明育王寺。夢登國清寺上方。有寶莊嚴幢座。題曰文殊臺。設栴挫闌隔。求入無由。俄覩觀音菩薩。從堂徐出相接。斯須覺已與觀音身混合不分。因而驚寤。自是樂說無盡。高僧傳三集

▲宋遵式禪師。台州葉氏子。其母虔禱於古觀音而生。學高行苦。專志安養。嘗力行般舟三昧。九十日爲期。素苦學嘔血。處道場中。兩足皮裂。師以死自誓。一日。忽如夢中見白衣觀音。垂手指其口。引出數蟲。又指端出甘露。注口中。覺身心清涼。宿疾頓愈。出懺。頂相高寸餘。雙手下垂過膝。聲

如洪鐘。皆與舊異。衆咸歎仰。師創下天竺寺數百間。建光明懺堂。每架一椽一爨。必誦大悲呪七遍。三經寇難。火皆自滅。由願力堅固所致也。著淨土決疑行願二門。及淨土懺法。金光明觀音諸本懺儀行世。時號慈雲懺主。武林高僧傳

▲宋蘊齊法師。錢塘人。俗姓周氏。號清辯。嘗患疫疾。百藥不治。遂力課觀音聖號。夢一人。以鑿開其胸。易其心。以手摩之而去。夢醒病除。疇昔所覽。靡不通記。走筆成章。悉歸典雅。咸謂辯才之證。

佛祖統紀

▲宋杭州靈隱寺明教大師契嵩。字仲靈。廣西藤縣鐔津李氏子。七歲出家。受具足戒。常戴觀音聖像。誦大悲觀世音名號。日十萬聲。博覽健記。作輔教論十萬餘言。著禪門定祖圖。傳法正宗記。並輔教篇。韓忠獻公歐陽文忠公咸稱道之。熙甯四年六月示寂。閣維。六根不壞者三。曰眼。曰舌。曰童真。并頂骨數珠五物存焉。所出舍利。紅白精潔。狀如大菽。有鐔津文集二十卷行世。佛祖統紀

▲宋熙甯中有重喜者。浙江會稽人。自少窮苦失學。不識字。日誦觀世音菩薩不少休。一日輒能書。又能作偈。偈曰。地爐無火一囊空。雪似楊花落歲窮。乞得苧麻縫敗衲。不知身在寂寥中。蓋得

觀音智慧力而解悟者。堅瓠集

▲清釋澍庵。江南人。少時粗獷。嘗居揚州禪寺。以與飯頭相競。穢罵無禮。主僧對衆呵譴之。且曰。如不速改當夏楚出院。師憤。思所以讎主僧者。中夜。忽自悔。已而思湔恥之術。惟在自修。而學道之方。自顧蔑如。於是輾轉終夜。天且曙。忽悟曰。吾聞至心持大悲神咒者。無不澈法源。證上果。吾雖無知。猶能誦此。奈何以無術自阻耶。明日。謁主僧禮謝。自陳願閉關三年。專持神呪。乞假靜室。且助衣食之費。主僧喜。從之。師遂移居藏經閣。朝夕持誦不懈。胸懸一牌。書曰禁語。有登閣者。欲與語。輒指牌以示。如是三年。乃出。則神采頓殊。抑抑自下。見者皆敬異之。客有析經籍疑義於師側者。相詰難甚苦。師爲諸客各誦所論書。且誦且解。娓娓不已。客相顧駭服。久之。乃知師於內外方策九流百家。下逮小說雜書。凡一切文字。不待涉目。無不能諳誦者。時儀徵阮文達公退職家居。聞師名。試與語。師亦酬對不倦。文達歎異之。謂師所證。超然於人天之表。非學者所能測云。耕王

心澍庵
大帥傳

▲宋釋宗淵。俗姓宮。山東高密人。孤潔耿介。凡俗不能造次求見。日誦普門品。蓋曾有善相人。言淵命促。勉令受持也。太平興國五年十月。預言終期。令木工作座。如鹿頂形。連促木工。言來日齋時需用。果坐終焉。年八十有三。高僧傳
三集

▲宋淳熙元年。吳江長橋側居民鄭氏嫗。年八十餘。日募錢於市。積之餅。蓋欲以修觀音像也。忽鄰火延燒。意謂餅燬。泣顧焦土。於燼餘中得餅。略無壞缺。而錢鎔成觀音聖像。高尺許。瓔珞瓶柳悉具。神工巧妙。世不經見。邑中有巨室王氏者。請像供養。留嫗長侍香燈。壽逾期頤。南海慈航

▲明蘇州黃彥士。娶婦顏氏。伉儷綦篤。偕避倭寇。相失道左。氏悽惶獨走。暮投荒祠。門內先有人。氏驚避。呼曰。娘子無怖。我尼也。因結伴焉。天曉。尼曰。少婦途中行。多不便。行囊中尙有女僧衣帽。可易妝。氏從之。隨尼前去。生失婦。度不免於難。苦訪三載。無消息。子身流離。傭書度日。適友人宦浙中。往省之。道出嘉興。值巡海兵至。舟子不敢渡。生登岸如廁。見枯楊隙中有物焉。探之得金一函。喜曰。此天賜我也。再探得緣簿一本。列布施者姓名。凜然曰。莫謂遺金可取。須念三寶中來。乃停舟候之。越兩日。有老尼頭頻觸樹而哭。生問故。曰。向者發願塑觀音大士像。募三十金。昨倉皇避兵。無處藏匿。納之樹腔中。今已矣。我其死於此矣。生急還之。尼拜謝曰。感君活命。不忍遽別。敝庵去此二十里。盍過一飯。當向大士前。陳君盛德。並爲祝福。生允之。及抵庵。叩扉而應聲出者。顏氏也。相持大哭。各述前事。流連數日。有鹽商汪姓聞之。聘爲館賓。後援例選授二尹。轉府判。生子二。一明經。夫婦俱上壽終。此嘉靖間事。海南

▲清康熙時。江甯呂叟。素行純厚。隱人惡。揚人善。每晨誦大士經呪百遍。年五十二。病篤。昏瞶不醒。盡室倉皇。焚香禱祝。是夕。叟夢大士語云。汝命當絕。因汝生平好善。諷經虔誠。增壽二紀。今後宜普勸世人。爲善獲祥。作惡降殃。報應之理。絲毫不爽。覺而病痊。行善益力。後享年七十六歲。無疾令終。南海 慈航

▲晉山東瑯琊王珉。無子。妻嘗祈觀世音以求嗣。珉後於途中遇一胡僧。甚敬之。僧曰。我死當爲汝子。未幾。僧亡。珉妻果有孕。生而能言。卽解西域十六國梵音。聰慧過人。器度不凡。卽晉尙書王洪明也。小名阿練。述前生事。歷歷分明。辯正 論

▲劉宋孫道德。益州人。素奉道。年過五十。未有子息。居近精舍。景平中。有僧謂曰。當至心禮誦觀世音經。子可冀也。德遂罷不事道。誠心歸命觀世音。一日得異夢。婦卽有孕。產男。冥祥 記

▲劉宋卞悅之。山東濟陰人。年五十。未有子。婦爲娶妾。復積載不孕。祈求繼嗣。發願誦觀世音經千遍。其數垂竟。妾卽有娠。遂生一男。時元嘉十八年也。冥祥 記

▲唐慈藏禪師。俗姓金氏。父名武林。無子。造觀世音千部。求生一男。後若成長。願發道心。度諸生類。母夢星墜入懷而娠。以四月八日生師。師年旣長。深體無常。於貞觀中出家。感二菩薩從天降

下。親與授戒。大弘佛法。廣利人天。如父所禱。高僧傳二集

▲唐萬迴師。河南閩鄉人。俗姓張。初母祈於觀音像而娠迴。迴生而愚。八九歲始能言。年長。父令耕田。迴直耕去數十里不轉。遇溝坑乃止。口中但連稱平等。其父怒擊之。迴曰。彼此總耕。何須異相。迴兄遠戍安西。音問久絕。父母謂其死矣。日夕憂泣。迴痛父母。跪而言曰。今爲兄憂泣無益。計兄所需者。衣服糗糧。請速備焉。我將候之。一日晨起。告親前往。晚卽返家。曰。兄甚平安。有書省父母。視之。果其兄筆迹也。一家異之。弘農抵安西。蓋萬餘里。以其萬里一日而迴。故號曰萬迴。先是玄奘法師向佛國取經。見佛龕題柱曰。菩薩萬迴。謫向閩鄉布化。奘師馳驛至閩。訪萬迴。師禮之。施三衣瓶鉢而去。高僧傳三集

▲宋翟楫。京師人。居浙江湖州四安鎮。五十無子。繪觀音像。虔禱。其妻方娠。夢白衣婦人。以盤送一兒。姿甚清秀。欲抱取之。一牛橫隔其中。竟不可得。既生男。彌月不育。又禱加虔。有聞其夢者。告楫曰。子嗜牛肉。豈爲是歟。楫悚然。遂誓舉家不復食。仍夢前婦人送兒至。果生男。後貴顯。廣嗣錄及觀音

慈林集

▲華庭相云。余堂弟敦三。畢婚十九年未生育。弟婦過氏。虔奉大士。常拜像前。啜泣哀籲。一夕。夢

大士抱男女各一。命氏曰。憐汝虔誠。以此付汝。次年生子。越歲生女。後不復娠矣。海南一勺

▲宋汴京張慶。祥符中爲司獄。常以慈愼自持。掃除監穢。暑月尤勤。飲食湯藥臥具。必加精潔。每戒其徒曰。人不幸罹於法。我輩若不憐恤。受罪者何從赴訴耶。生平持誦法華經。遇囚就戮。必齋素誦經一月。嘗教獄囚有罪當自認。毋誣良善。以重自己罪業。妻袁氏。年四十八。染疫死。三日忽甦。曰。我始至一穢所。忽見白衣大士。謂汝夫多陰德。子孫當有興者。今尙無嗣。乃以手挈之出。遂得甦。明年生子亨。後出仕。慶年八十二。無疾而終。六孫皆貴顯。觀音持驗記

▲宋徐熙載。江西樂平人。有一子。以淳熙甲午八月二十四日亡。夫婦慟甚。明年。徐在安徽宿松令鍾炤之館舍。值子亡期。詣南臺寺供佛。長老宗悟。爲舉唐顧况之子非熊。再生爲顧氏子事。且云。吾有觀音聖像。極靈異。今敬相授。更能誠心刊觀音經版印施。必獲美報。徐拜受之。攜歸書齋供養。明年。果以八月二十四日生男。繼又得兩男。海南一勺

▲元明善。家素封。因無子。奉大士甚虔篤。連產數子。招乳母撫之。有乳母白氏者。嘗於哺乳時戲元。元視若無覩。以避之。旋以他事遣之去。務保全其名節。後諸子俱長成。嗣續蕃衍。成爲鉅族。海南一勺

▲元南京大甯坊王玉。年踰四十無子。至元二年乙丑。於友人馬公酌家神前。見白衣觀音經。玉請回。專心持誦不怠。丁卯四月十四夜。岳母劉氏。夢白衣人。頭戴金冠。攜一童子來。曰。吾與汝送聖奴來。劉氏接抱。恍然而寤。明日。王玉之妻張氏。生一男。神氣超秀。果應夢言。卽名聖僧奴。夫婦遂發願刊施五百卷。以酬抱送之恩。白衣經 記驗

▲元念常禪師。號海屋。江蘇華亭人。俗姓黃。母楊氏。求子。禱於觀音大士前。夢龐眉老僧托宿而娠。誕生之日。瑞光照室。異香襲人。出家於平江圓明院。博究羣書。嗣法晦機熙和尚。有佛祖通載集二十卷行世。釋氏稽古略

▲元末寶金禪師。號壁峯。陝西永壽人。族姓石。父稱長者。母張氏。勤善弗倦。有持鉢僧以觀音大士像授張。囑曰。謹事之。當生智慧之男。未幾生師。臨產之時。白光照室。釋氏稽古略

▲明常熟嚴尙寶徵。字道徹。文靖公仲子也。年三十無子。置妾不選色。人爭笑之。偶過姻家。見一侍女。年及笄。未蓄髮。問其主。云。以瘖故。終成廢人。道徹惻然。曰。第令蓄髮。吾將娶之。其姻家未敢信。道徹卽爲申約。踰年果納焉。文靖聞之喜。云。吾兒所行。允合天道。必有後。繼妾皆生子。道徹素誦白衣呪。且堅持不殺戒。凡舉子多得白衣送子之瑞徵。感應篇 增註

▲明釋願登。字大猷。江蘇姑蘇人。母陶氏。禱於觀音大士而生。幼卽穎悟異常。依南京淨覺法師爲師。住持水西寺。著觀幻子內外篇。釋氏稽古略

▲明夢窗禪師。日本國勢州人。母禱觀音大士。夢吞金光而娠。生時祥光滿室。稽古略

▲明刑科李清。字心水。廣陵人。初有一子。痘瘍。母姜安人。追悼不已。日誦白衣觀音經。爲子祈嗣。未幾。心水夢一婦人抱兒入室。面帶痘痂。似將愈而未落者。晨起。適某生以繡觀音贈。抱兒如夢。

時夫人甫孕。果生男。觀世音持驗記

▲錢塘趙世珍室周氏。無子。至白衣殿祈禱。虔誦白衣呪。印施白衣大士圖萬二千卷。並實心行善事。後得二子。長子成進士。氏享壽九十有八。親見五代同堂。海南一勺

▲清黃擴生。廣州新邑諸生。家巨富。年五十而膝下猶虛。戊子歲。稟受五戒。而不茹葷。奉大士尤謹。晨夕必更沐百拜。稱念大士聖號。雖世務匆冗。不輟常儀。未週三載。妻妾連日各產一兒。及長。頗聰慧。觀音經云。若有女人。設欲求男。禮拜供養觀世音菩薩。便生福德智慧之男。黃氏是矣。觀音集

慈林集

▲清初江蘇常熟譚憲卿。字扶風。家頗豐。無子。合族聲言將來析產。憲卿立誓曰。吾甘心布施到

赤貧。決不爲汝曹分析。乃捐五千金。欲興大悲懺壇。卜地至元墓。見梵天閣後。地敞面湖。風景絕勝。乃陳願於剖石老人。老人許之。遂以香泥築地。創立懺壇。備極莊嚴。壇成。隨師禮懺四十九晝夜。是年回家。側室生一子。胞衣皆白。元配某氏。素未生育。亦發心捐千金。建白衣閣於元墓。祝願生育。未幾。亦生一子。胞白如初。現果隨錄

▲清何隆將。廣州番禺庠生。年逾知命。未得子。心已絕望。乙未歲。受持六齋。築別室。供奉千手千眼大悲像。朝暮虔禮。每晨必禮訖。方啜茶漿。歷數月。夢大士親手授與紅衣兒。次年果誕一男。三

載。連舉三子。觀音慈林集

▲清楊璜。字希周。當塗人。世居官圩栗樹墳。會兵擾其鄉。匿妻妾與子於林中。以身守壠。兵來。見墳內有衣冠者。將執之。璜急赴水死。子甫十齡。見父溺。亦號哭奔投於水。時順治丙戌三月十六日也。璜妻陸氏。悼夫無後。誓斷血肉。迎佛像於家。旦夕慟哭念佛。忽夜夢老嫗攜一子至。曰。贈汝。醒而歎曰。願妾張氏遺腹生子。則菩薩之賜也。歲暮。生女。陸氏泣曰。已矣。丁亥春。集族長告曰。夫既無子。薄畝當分諸姪。吾得粗給衣食。以撫此女。言訖復哭。族長不忍。云。俟小祥。爲璜作佛事。議分。及期。具會親族。散齋之夕。亦三月十六日。女哭不已。妾抱就枕。忽如夢魘。憤憤不醒。女怪啼益

甚。嫡疾呼始覺。抱女入手。則已不復是女身矣。陸大驚。衆人羣往。見面目依然。惟私處生長男根。其旁尙有血痕。衆咸詫異。始悟菩薩靈爽。前夢不虛。競至佛前臚拜。更名佛賜。次日。觀者闐門。縣令張公聞而取兒庭閱之。猶未信。問其家族。異口一詞曰。脫兒變非真。姪輩不願分其田宅耶。令乃釋疑。唐宜之已求書

▲江西新建傅國鎮。無子。其叔廣堯。多男。一日過叔舍。叔勸曰。予誦觀音經有年。汝何不效之。國鎮承命虔持。次年得一子。白衣重包。印施經卷二千有奇。復得一子。此二子後同科登賢書。海勺

▲安徽婺源余鄰文。室戴氏。乏嗣。持誦觀音經。順治十八年。叩許三千卷。至康熙元年。生一子。隨後又連生二子。持經不懈。兼行一切濟人利物之事。二十餘年。子孫繞膝。觀音靈感錄

▲清淮安庠士梁元徵。素崇釋教。中年艱於嗣息。且多病。因發心持長齋。日誦白衣觀音經。及大悲呪。仍刻袖珍小帙。硃印流通。室阮氏亦持準提齋。每晨虔跪諷誦。未幾。徵病悉瘳。阮氏連舉三子。觀世音持驗記

▲清馮錦。桐鄉望族。世植厚德。至公始顯。官山左。乞病歸。乏嗣。宜人孔氏。持大悲呪甚虔。方受孕時。鄰婦姚氏。夢一老母。手抱肥瘦兩孩。告曰。任汝取之。姚抱肥者。失手墮地而殞。還取瘦者。老母

曰。此當送馮家。汝烏可得。姚婦後果生子。肥而不育。孔宜人孕七月。生子浩。甚瘦怯。長漸魁偉。由詞林轉至御史。旋丁內艱回籍。凡里中有善事。無不忻然力行。浩年登上壽。夫婦齊眉。精神強健。有子三人。均登仕版。勸戒類鈔

▲湖南衡陽諸生譚用航。幼多疾。並厄於子息。因發願仗菩薩慈力。懺除夙孽。輯觀音經呪。并格言。及救急神方一卷。邀集同志。刊印廣播。其在會者。求願各殊。或求子嗣。或求功名。或求正當財利。或求拔除疾病。或求消滅禍難。在會諸人。各如其願。咸沾慈惠。凡有苦惱。皆得解脫。益陽熊天益。年過花甲。無子。見其事。欣然作見聞隨喜功德。亦齋誦印送。未幾。天益老妻得熊夢。喜相告語。然猶謂幻夢也。來春。竟生一子。恰與夢符。觀音靈感錄

▲金陵沈象賢。有志植德士也。五十無子。夙奉大士。忽一日見白衣道媪。曰。汝能勸千人不溺女。則陰隲無窮矣。象賢遜謝不能。媪曰。我有戒溺女歌圖。汝果能刊施。何止勸千人耶。爰出袖中卷授之。象賢正捧閱間。媪忽不見。心知菩薩示現也。因捐資印施千卷。未幾。連舉二子。皆英年登第。象賢年九十三。無疾令終。異香滿室焉。拯嬰錄○按此書重編本上海佛學書局印行

▲宋太祖開寶五年。夏五月。大雨。河決。帝禱於天地鬼神。益雨。羣臣中有稱述上天竺觀音大士

靈異之事者。帝卽遣使馳驛齋香虔禱。越數日。天卽開朗。河流亦復止寒。逮使歸詢之。卽至杭。既禱之明日也。嗣是凡水旱疾疫必禱焉。天竺志

▲宋處州鮑欽止。代郡守陳軒撰靈感觀音碑。曰。紹聖二年。軒自合肥移守錢塘。明年奏疏於朝。曰。臣所領州之西偏。湖山之勝。甲於天下。而天竺山有靈感觀音菩薩像在焉。臣自去秋視事。民方薦饑。今年春夏。雨彌月不止。父老日夜憂懼。臣卽率官屬躬禱像下。衝雨入山。衣帽霑濕。渠決壞道。從者皆涉。比臣之還。天宇開霽。纖雲不興。白日正中。清風穆然。既又輿致城中作佛事。與民祈禳。已而雨暘有時。農不告病。實茲佛之庇此土也。天竺志

▲宋英宗治平二年秋。八月三日。都城大雨。水泛漲。下詔求直言。宰相曾公亮因臚陳杭州沈文通奏。天竺看經院觀音大士。始自石晉至今。福天下。澤民生。前後靈跡甚著。上命禱之。水患立止。賜號曰天竺靈感觀音院。天竺志

▲唐善無畏三藏法師。中印度人。時印度大旱。請師求雨。俄見觀音在日輪中。手執淨瓶。注水於地。時衆欣感。得未曾有。高僧傳三集

▲宋哲宗元符二年夏。四月不雨。江西袁州守臣王敏仲。禱於木平山舍利石塔。精誠通感。巖中

放光。見白衣大士身金瓔珞。獲五色舍利。其大若棗。中有臺觀之狀。復往仰山塔所。見泗州大士。

維摩、羅漢、列居左右。已而大雨霑足。佛祖統紀

▲宋真宗咸平元年。正月。至五月不雨。徧行祈禱。而旱彌甚。時給事中張去華守杭。出其至誠。爲

民請命。迎大士像於梵天寺。率官僚拜禱之。甘雨驟降。四境沛足。歡聲動地。天竺志

▲宋理宗淳祐間。連歲苦旱。浙帥顏頤仲。虔禱洞中。見大士作歡喜狀。甘雨立沛。普陀山志

▲明景泰六年夏。兩浙苦旱。禾稼將槁。四民徬徨無措。時鎮守阮公。會藩臬重臣與兵部尚書孫

公等。齋戒沐浴。徒步親詣上天竺寺。奉迎聖像。至山林。建壇禱雨。卽時陰雲四起。至日晡。甘雨大

澍。明日如之。又明日亦如之。頓令兩浙境內。禾黍芘芘。枯槁立蘇。人民莫不歡忭鼓舞。由是阮公

大感靈貺。念無以酬。卽捐己資。重建行龕。並製冠服。及諸供具。而莊嚴之。仍奉送以歸。天竺志

▲明嘉靖二十四年。自春徂夏。天氣亢旱。米價騰踊。殍死蔽野。方伯九畹謝公。躬率百司。禱諸山

川社稷之神。復用諸方士符呪之術。而燔灼益甚。乃命郡別駕閻齋羅公。仁和令後岡程公。錢塘

令蘆溪龔公。素服徒步。入天竺佛國山。具儀仗。迎觀音大士聖像於海會禪寺。諭僧綱良縉。上竺

住持惠琳道顯。董諸比丘。昕晡齋沐。諷經。務期昭格。先是。祈禱皆以淨瓶滴水爲驗。越明日。瓶水

微湧。點滴如珠。果得微雨。又明日。水大湧出。遂果得大雨。天竺志

▲清知歸子彭際清。江蘇長洲人。嘗云。某年夏六月。蘇州旱。時寓文星閣。結三七期。誦大悲心呪。加持西方佛名。斷午後食。期滿。得雨半尺。海南一勺

▲晉釋道舟。俗姓管氏。朔方回樂人。出家於龍興寺。嘗刺血畫千手眼大悲觀音像。時值亢旱。絕食瞑目。要期降雨。方議充腸。中和二年。聞關輔擾攘。乃於城南念定院塔下斷左肱焚之。供養大悲像。願早見弭兵。又嘗截左耳爲民祈雨。復斷食七日請雪。皆如其願。世壽七十有八。遺骸不散。如入禪定。遂加漆紵焉。高僧傳三集

▲宋眞宗祥符九年九月。飛蝗蔽天。羣情震駭。帝以連年苦旱。蝗蟲爲災。至是時來勢益兇。多方捕蹙。不見寸效。乃遣中使禱於大士。是月晦日午時。赤日杲杲。忽黑雲起自西北。迅雷掣電。雨雹疾於矢石。聲如銃礮。蝗蝻堆積川陸。頃刻聚殲。帝甚神之。士民信向。益見宏普。天竺志

▲晉西河離石縣劉薩何。遇疾暴亡。心下猶暖。因未殯殮。經十日。更蘇。說云。有兩吏見錄。向西北行。不測遠近。至十八地獄。隨報輕重。受諸楚毒。見觀世音語云。汝緣未盡。若得活。可作沙門。洛下齊城丹陽會稽。並有阿育王塔。可往禮拜。若壽終。則不墮地獄。語竟。如墮高巖。忽醒悟。因出家。名

慧達。遊行禮塔。發見育王所藏佛舍利焉。梁書

▲唐孟知儉。并州人。少時病忽亡。見衙府如生時。不知已死。逢故人之爲吏者。問因何得來。具報之。乃知是冥途。吏爲檢閱簿錄。尋曰。君平生未修福。何以得還。儉曰。一生誦般若心經。及觀音經。雖不記數。亦有三四萬遍。重檢獲之。爲白冥王。遂放還。吏問。爾欲知前程乎。曰。甚願。遂以簿示之。內云。孟知儉合運出身。爲曹州參軍。轉鄧州司倉。卽掩卻不許看。乃前行。至荒榛間。誤入一黑坑。遂驚醒。不知運係何事。尋有敕募運糧。因選授曹州參軍。任滿。授鄧州司倉。去任。又選晉州判司。未至任而卒。朝野僉載

▲宋淳熙間。饒州董母李氏。病卒忽甦。述云。初入冥。行曠野數里。至城。聞人聲嘈嘈。而黑暗如漆。自念吾誦普門品三十餘年。今入鬼錄。菩薩豈無救援。於是大聲呼救。苦觀世音菩薩約百聲。恍有手把吾左臂而行者。漸覺光明如白日。見大士現婦女身。瓔珞被體。璀璨照耀。異香芬郁。相好端嚴。因乞救命。大士云。汝數已盡。緣夙具善根。故來援。宜急歸。更半紀。重相見也。吾禮謝。則舉步愈高。冉冉向西方去。遙睇幡蓋前導。金碧晃朗。震心眩目。豁然蘇矣。越五歲。無疾而逝。法華感通

▲宋李郡君。素著賢德。有老嫗李氏。持珠至其家求售。旣去。珠遺於地。一日復至。曰。向所貨珠。歸

途失去。原主不時逼索。傾家不能償補。憂鬱成病。幾不能起。郡君即取還之。嫗祝謝不已。後郡君感疾垂危。夢青衣人驅車出野。至一大官府。見兩偉人巍然上坐。引問姓氏。郡君方知爲冥司。平日素持大悲咒。遂默誦之。堂廡搖動不已。左右皆驚怖欲仆。偉人立語曰。勿誦。放汝還矣。吏持簿書至案。偉人問曰。記得還李嫗珠事否。郡君曰。有之。一偉人執筆曰。增汝壽二十年。其一人曰。毋太多。執筆者曰。婦人能不愛珠寶。不昧心貪財。已爲難事。況有持經功德乎。即命送還。後果歷二十年而卒。

感應篇
增註

▲宋淳熙末。建昌走卒楊亮病。見兩吏持符追己。亮與俱出。俄到官府。王問生時有何功德。對曰。身供趨走之役。每遇差使。不敢違程限。王曰。不問此事。別有何陰騭。亮始悟爲冥司。曰。但念得觀世音經。又問。既誦經。曾行若何善事。對曰。小人那得一善可稱。但知守本分。不害人耳。王命檢籍。如所言。遂得再生。

善餘堂
筆乘

▲明台州王立穀。字伯無。領萬歷丙子鄉薦。夢其父士性公諭曰。汝當十年五死。惟植德禳災可遇救。已而見驗。遂於嘉禾三寶前。誓奉長齋。受天台殺盜淫妄四戒。後官江西新淦令。此事遂廢。戊午入覲。啓行之夕。復夢其父諄諄儆戒。心竊憂之。一日。舟次荻港。夜二鼓矣。忽見二青衣持符

追攝驟至冥府。同攝數千人。滿立庭中。有著械者。有衣冠者。王冕旒正坐。左右二冥官。據案側坐。侍者狀殊惡。王呼立轂名。厲聲叱曰。汝陽算盡丙辰八月。延至今日者。齋戒力也。奈何棄之。擲示以簿。覩名下年月日皆有注。至丙辰八月空之。轂覽畢。叩首曰。居官勢不得不爾。王曰。奈算盡何。命驅入獄。卽有鬼來掙。左坐者起立請曰。試取破戒後事稽之。須臾侍者負兩巨籠至。皆令淦文卷也。凡一揭一束。并平日偶書片紙俱在。各有氣騰上。青白赤黑不一色。王命各檢一處。先檢黑與青成聚。次檢白聚赤聚。已而青者漸隱。黑者縮小如箸。而赤者赫然獨熾。轂旁睨赤聚中。乃平日所刻金剛般若經。及好生編社倉卷。王覽竟。色稍和。顧左右曰。是尙知植德者。損五官。全其軀命可乎。乃命鬼抉其目。置殿柱上。光炯炯然。轂念目已抉。安能復視。忽然昏暗。官殿隸卒。杳無所覩。覺有人拍肩促之曰。去去。一跌而寤。時已雞鳴。聞家人環哭聲沸。問之。云自二更魘不醒。手足冰冷。口齒堅合。醫曰。中寒厥。灌藥七度矣。轂張目。見燈光如刺。了不可開。是夕。夢前日攝魂鬼以釘釘目。痛楚滋甚。遂卻醫藥。決意乞休歸里。後棄家修淨業。虔誦金剛法華經。朝夕不倦。庚申七月。禮懺幽溪。夜夢大士以楊枝灑甘露。點其睛。晨起。豁然見物。兩目復明。後歷游雲棲博山之門。眞參實證。再生者十二年。號壁如大師。

▲明萬歷甲寅。歙縣吳奔德。隨叔正鵬。受業臨塘寺。鵬叩普門大師有省。遂皈佛法。且晚率諸生。持齋頂禮西方。奔德尤深敬信。發願書大悲經五十卷。金剛經三十卷。五月二十九日。浴琴溪。暴病氣絕。掖歸。臥屍於牀。忽言曰。我乃佛前左護法關。奔德因誤殺宿冤。攝入冥府。以彼奉佛許經善念。特來護之。鵬可爲念佛諷經。候其初七還魂。書經酬願。藉此功德。怨鬼得超度矣。初七日。奔德果甦。自捧其腰。連呼跌痛。叔問故。告曰。浴溪時。見兩人執牌來喚。遂從之往。望署額曰森羅殿。我至。持頭鬼無數。奮前毆擊。覺念佛則痛可忍。繼知前生爲將。誤殺人八百命。今業滿索償。泣訴以王事所致。閻君怒曰。大辟應烹。卽有火面碧身鬼卒。昇大鑊沸油。束我將投。殿前倏現金光一道。幽黑皆明。見韋馱與關帝在空中。韋馱舉杵入鑊。鑊中滿生金蓮華。閻君合掌叩禮。隨放我歸。命兩黃幘者送之。經峻嶺。黃幘者撲我下。故腰跌痛耳。叔扶起。拜謝佛與大士及韋馱關帝。至誠施寫二經。合家欽奉三寶云。金剛果報錄

▲浮梁處士嚴習之。名守貞。持誦金剛經觀音經。三十餘年無虛日。每勸人持誦。疑信者半。常爲予言。道光十五年六月二十三日。其房姪元法之子瑞能。病悒憤中。忽被攝至一署。上堂甫跪。喧傳大菩薩降臨。官避席趨迎。見白衣大士披蓮花霞帔。後隨一黑面老叟。大士上坐。左顧官曰。查

嚴瑞能陽壽未終。何故攝此。官卽訊役。怒其誤攝。杖四十。大士曰。瑞能家中三代不食牛犬。且合家男女持觀音齋。誦觀音經。現有此老在渠家可證。瑞能乃悟老叟爲司命神也。諭畢。帶瑞能出署。率觀確舂獄。見獮鬼捉一婦投確中。每下一舂。血肉飛濺。大士諭勿近前。汝生魂不可沾此。因舉袖代遮之。次引觀拔舌剉磨等獄。竟導之歸。諭汝今回陽。須囑家中持齋念經者。務要虔誠。齋期不可藉事移借他日。亦不可屆期遺忘。今日乃齋期。汝家俱忘却矣。以後牢記。歸白汝祖。金剛經。渠已持念多年。此經功德。不可思議。慎勿惑外人言。有始無終。汝病無妨。勉做好人。俄至其家後門。拍之使醒。曰。汝已至家矣。遂醒。醒後。具道其事。浮梁鄧達元述

▲清柏萬安。江蘇常州人。名天佑。平生樂善奉佛。嘗向彭尺木先生述其母曹氏。以大士慈力卻病事。其母年六十四。病熱。萬安得信。自蘇馳歸。視母氣已絕。惟胸前微溫。家人爲治棺衾悉具。萬安悲慟。禱於白衣大士前。誦白衣呪一萬二千。願減己壽一紀以益母。涕淚并下。至明日。母索飲。閱數日病起。言始死時。爲兩吏所引。歷土地城隍諸司。尋詣東嶽府。府君言。汝有子爲汝誠禱。仗大士力。延汝壽命。命吏引出放還。萬安遂勸母修淨業。除一室供佛像。母遂長齋。日以初中後分入室。搢數珠。誦西方佛名。輒千計。居十二年。年七十六。九月旣望。晨興。謂其子曰。吾將去矣。可召

諸親屬爲別。明日親屬畢至。母悉與款語。戒諸子女臨去時勿哭。日飲湯五六盞。至第三日昧旦。起坐。洗沐畢。易衣就枕。安詳而逝。一行居集

▲清章開元。江西南豐人。嘉慶二十五年三月十九日。以騎射課徒。用力太猛。仆地。衆扶返寓。呻吟牀蓐。見一吏執票。鐙。負槌來。曳之行。忽身後一人挽而呼曰。此人持觀音經甚虔。並於敬信錄內。摘易犯者數條。抄寫十餘本。給人解說。且許心願刊印。若仍短壽。何以勸善。役曳如前。而挽者益力。役釋手去。挽者曰。渠去必又至。吾指引汝到南海。求救於大士。章慮蹣跚難行。曰。但合掌端坐。誠心念南無阿彌陀佛。及大慈大悲救苦救難觀世音菩薩聖號。倘睹可愛者。切勿動心。致墮惡趣也。章如教。覺身如風中葉。飄空而起。未幾。見深巷當壚者。皆佳麗。爭來勾引。牢記所囑。冥情勿顧。則又無所見。而奔濤接天。海立眼前矣。章伏岸宣佛良久。見兩三白鬚叟。攜一人下山。貌肖己。身後人謂曰。此汝魂也。速禮菩薩叩謝。乃導遊陰府。遍觀善惡兩途。且曰。汝歸去。當堅持前念。自修以訓人。毋怠厥志。章唯唯。遽然而甦。卽披衣步門外。疾頓失。同舍咸驚異。因果實錄

▲清鉛山蔣心餘。乾隆某年十一月十五夜。夢隸持帖請至一處。有尊官接見。服飾擬王者。曰。冥司事煩。我任滿當去。此座公瓜代矣。公曰。我母老子幼。事未了。不能來。王曰。世上事要了便了。要

不了便不了。我已舉公。無可挽回。俄而醒。一燈清熒。四肢如冰。四鼓沉睡。又到冥間。殿上設五座。案積如山。四座有人。獨空第五座。一吏指告曰。此公座也。蔣隨行至三座。瞻之。房師馮靜山先生也。急前揖之。丐師代辭。師曰。事至此。不必多言。速歸料理身後事。今日十五。二十日是汝上任日也。拱別而醒。蔣與王方伯興吾善。晨往訣別。且託身後。王曰。勿怖。誦觀音大悲呪。可禳之。乃建壇齋戒。合家誦呪。及期。環守之。三更後。蔣見空中飛下轎一乘。旗數竿。輿夫數人。宛來迎者。衆同聲誦大悲呪。逼之。漸近漸薄。若煙霧消散然。達曉。竟無恙。逾三年入詞林。沈紹述

▲江西奉新北鄉。比部員外金光斗室帥宜人。夙奉大士。年逾六旬。病歿。家人以胸口猶溫。不忍斂。三日重生。云至冥府。見大士對閻君曰。此婦在世。誠誦觀音經。且多印施功德。應放還陽世。加壽半紀。閻君卽命回生。初詣地府時。目擊受苦男女甚多。不能悉記。惟記羣鳥啄人目。血流被體者。問冥吏。云此人生前戕害禽命。故得此報。又見螺殼成山。羣鬼剗人肉填螺殼。又問冥吏。答曰。此人生前買食螺螄。故得此報。此內子冷氏聞於帥宜人者。帥與冷氏母家比鄰。兼屬戚誼。因悉其詳。鄱陽吳育學述

▲溧水湯聘爲諸生時。家貧。奉母孝。忽病死。見鬼卒數人拘之。遇普門大士。聘以老母無人侍奉。

哀訴求生。大士曰：此孝思也。且查某年月日聘買舟詣如皋。舟人少女。美姿善謔。意欲就聘。聘正色拒之。當前程遠大。可急令還魂。鬼卒曰：彼死數日。尸已腐矣。奈何。大士命善財往西天取牟尼泥。鬼卒護尸。乃告聘曰：見汝遇色不淫。故來相救。汝宜信心樂善。今日人心險薄。鬼神伺察極嚴。向者功名富貴。生來便定。近則善惡冊籍。一月一造。無俟後日來生始有果報。善財往越三日。取牟尼泥回。泥色若梅檀。其香不散。因令善財同至其家。尸果腐爛。老母垂涕於傍。死既七日。尚無以爲殮也。善財以泥圍屍三匝。須臾臭穢漸息。腐爛者完好如常。遂有生氣。善財令聘魂從口入。尸卽蠕動。母驚而狂叫。鄰人咸集。聘已起坐。曰：男再生矣。母勿怖。因備言遇大士得再生之故。謂男本無科名。命限已盡。力求報父母恩。大士命持貪淫葷酒諸戒。與我科名壽算。男惟不能斷酒。餘俱如所戒。大士許男成進士。但命無祿位。戒勿仕而已。後聘舉順治戊午進士。不茹葷。聲色貨利泊如也。惟長齋繡佛以事母而已。迨母死。就眞定縣令。卒於官。

徐岳聞見錄

▲北周益州招提寺釋慧恭。與同學僧惠遠結契。後遊荆揚。訪道而歸。契闊三十年。夜話次。遠語如流。師默無所對。遠曰：何不誦一經乎。師曰：惟誦觀世音菩薩普門品一卷。當爲誦之。但至心聽。乃結壇升高座。始發聲唱經題。覺有香氣。久之。聞天樂振空。雨花零亂。經已方歇。遠敬禮謝之。僧

▲隋開皇初。有揚州僧。忘其本名。誦通涅槃。自矜其業。陝西岐州東山下村中沙彌。誦觀世音經。後俱暴死。同至冥府。王處沙彌金座。敬禮備至。處涅槃僧銀座。禮稍弛。僧不平。因問沙彌住處。既蘇。從南來至岐州。訪得沙彌。具問所由。沙彌云。每啓誦觀音經。必衣淨衣。燒名香。呪願畢。乃誦。日久如是。不敢稍怠。僧謝曰。吾罪深矣。所誦涅槃。威儀不整。身口不淨。於今驗矣。法苑珠林

▲唐王弘之。貞觀中。爲山西沁州和川令。有女適博陵崔軌。軌病歿於和川。經數十日。王家忽於某夜聞崔語云。軌是女壻。不合於妻家立靈位。然而苦無所依。能爲置立以棲吾神。乃大感。妻從其請。朝夕置食。禁進魚肉等葷物。唯許進素食。恆以禮佛勸。又具說地獄中事。又云。人一生不免殺生及不孝。二罪甚大。自餘之罪。以次輕減。又云。軌雖無罪。然大資福助。爲軌數設齋供。并寫法華金剛觀音等經。各三兩部。以後卽不復來。王家一如其言。寫經設供。軌忽來愧謝云。今卽長別。舉家哭而送之。軌有遺腹子。臨去時。子已五六歲。軌云。此子必有名位。願善養育。自此不復來矣。法苑珠林

▲京兆劉子貢。五月二十二日病熱卒。明日蘇。言被錄至冥。遇鄰人季暉。曰。煩君寄語吾子。吾生

前坐罪被拘。速爲吾造觀世音菩薩像一尊。寫妙法蓮華經一部。則生天矣。又遇其父愼曰。吾以同光王生。得假在外。不然。罪苦不可言。因吾在生時。彈殺鳥獸。故每日牛頭獄卒。燒鐵彈數千。色赤如火。破吾身皮數百道。納熱彈其中。慘痛難忍。又見身存者多爲鬼。子貢以二十三日生。至二十九日而死。回生數日。宣傳冥事。以廣警戒。太平廣記

▲宋范文正公仲淹。母亡三七。夢泣告曰。我以陽世造業。受罰不堪。吾兒素孝。祈誦金剛般若經一藏。救拔母罪。公驚哭而醒。卽沐浴齋戒。躬就元墓山禪林延僧。諷經七日。至第六夜。禮懺將滿。又夢母曰。緣兒至誠禮誦。感白衣大士降凡。持經半卷。不但消罪。更得生天矣。明晨。兒入經堂。詢之自知。宜以厚贖。叩酬大士。公俟法事圓滿。拜謝衆僧。因問諷經半卷者爲誰。衆俱失色。答曰。所禮經典。一字不遺。豈有只持半卷之事。旁有一僧。從容白曰。昨大衆念經。山僧倚立默看。至第十六分。俟使君來拈香。便歸廚作務。今承問。敢以直對。公卽稽首下拜。僧言莫莫。忽騰空不見。緇俗無不瞻仰。公因是創建莫莫禪堂。以誌靈異。至今不泯。靈山勝蹟

▲徽州方巖秀。世植德。妻黃氏。歿於產。未幾。巖秀夢見之。自言生前叢愆。陰曹受罰。乞爲誦觀音經千卷。印施千卷。卽離苦超生矣。巖秀如其言。其繼室懷娠。恍見前妻入房。生子。名元亨。後成進

士。南海航

▲明釋如幻。有友夏治時。通內典。一日。謂幻曰。君脣掀齒露。非壽者相。宜禱觀音大士。誦其名號以求壽。幻從之。持名三載。容貌改變。高僧傳四集

▲清長洲朱兆庚。妻程氏。道光十二年。肝疾大作。遂作鬼語。懇兆庚誦大悲呪以資超度。因問與病者有夙怨否。曰。無。問病無妨否。曰。至心念佛。即可瘳。次年八月。病復作。廿餘日不納水米。念佛不輟。後昏不知人事。神遊冥界。見冥王審衆囚。善惡悉甚明晰。以程氏持齋念佛。念金剛經大悲呪。遂放還。乃詳說所見。兆庚記以勸世。冥遊確記

▲太谷程嘉猷。刻觀音經金剛經并感應篇等而未施。忽患病。水粒不入。夢大士諭曰。汝四十一壽盡矣。因刻諸經。放汝回。宜卽刷印流傳。程甦遵諭。病尋愈。勸誠類鈔

第四篇 度生死

▲晉釋慧虔。少出家。戒行精確。義熙中。住山陰嘉祥寺。苦身率衆念佛。後寢疾。專意傾向樂邦。誠祈大士。北寺有尼淨嚴。篤行宿著。夜夢大士從西郭門入。輝光照映。幢幡華蓋。七寶莊嚴。尼驚異。

作禮。問菩薩何往。答曰。往嘉祥寺迎虔公耳。是日。虔神色如常。侍者皆聞異香。泊然而化。高僧傳初集及

雲棲往
生集

▲齊釋法琳。晉原臨邛人。少出家。常祈心安養。每誦無量壽經及觀音經。輒見一沙門。形甚殊大。常在琳前。齊建武二年。寢疾。注念西方。禮懺不息。見諸賢聖皆集目前。乃向弟子述其所見。合掌

而卒。高僧傳
初集

▲唐釋僧術。并州人。年九十六。遇道綽師著安樂集。講觀經。始迴心念佛。恐壽將終。日夜禮佛一千拜。念彌陀佛八萬遍。於五年間。一心無怠。大漸。告弟子曰。阿彌陀佛來授我香衣。觀音勢至行列在前。化佛遍滿虛空。從此西去。純是淨土。言訖而終。高僧傳三集

▲唐岸禪師。并州人。歸心淨土。行方等懺。服勤無缺。微有疾作。禪觀不虧。見觀音勢至二菩薩現於空中。持久不滅。岸召畫工。無能畫者。忽有二人云。從西京來。欲往五臺。自樂輸工。畫菩薩形相。繪事畢。忽隱無蹤。岸知西方緣熟。告諸弟子云。吾今往生。誰可偕行。有小童子稽顙曰。願隨師去。乃令往辭父母。父母謂爲戲言。令沐浴著淨衣。入道場念佛。須臾而終。岸責曰。何得前行。岸索筆讚二菩薩曰。觀音助遠接。勢至輔遙迎。寶瓶冠上顯。化佛頂前明。俱遊十方刹。持華候九生。願以

慈悲手。提獎共西行。述讚已。別諸弟子。入道場。命門徒助吾念佛。端坐而終。高僧傳三集

▲唐懷玉禪師。俗姓高。丹丘人。執持律法。一食長坐。行懺悔法。誦彌陀經三十萬卷。每日念彌陀佛五萬聲。天寶元年六月九日。見西方聖像。數若恆沙。一人擎白銀臺從窗而入。玉云。我合得金臺。而銀臺却出。玉倍虔志。時佛光充室。至十三日丑時。再有白毫光現。聖衆滿室。玉云。若聞異香。我報將盡。說偈已。香氣盈室。海衆徧滿。見阿彌陀佛。觀音勢至。身紫金色。共御金剛臺來迎。含笑而終。高僧傳三集

▲唐慧日法師。泛海舶。達天竺。參訪知識。咨捷徑法要。徧問三藏學者。所說皆讚淨土。至犍馱羅國。東北大山有觀音像。志誠祈請。多得現身。師乃七日叩頭斷食。畢命爲期。至七日夜。忽見觀音現紫金色。坐寶蓮花。垂手摩頂。曰。汝欲傳法。自利利他。惟念西方極樂世界阿彌陀佛。迴願往生。到彼國已。見佛及我。得大利益。汝自當知。淨土法門。勝過諸行。言已忽滅。師回長安。因普勸念佛焉。高僧傳三集

▲唐釋自覺。住真州。常發願。願因觀音得見阿彌陀佛。於是鑄觀音像。高四十九尺。既成。至心祝願。夜三更。忽有金光二道。見佛自光中而下。觀音勢至左右隨之。佛垂手摩覺頂。曰。守願勿易。利

物爲先。寶池生處。孰不如願。後十一年七月望夕。見一人。形如天王。現身雲間。謂覺曰。安養之期至矣。遂於觀音像前。趺坐而化。高僧傳三集及往生集

▲宋釋了然。夢泛海。見觀音坐竹林間。以百偈讚之。自是辯才頓發。一夕。夢二龍戲空中。一化神人。自空下。出簡示生期。至期。同衆誦彌陀經。至西方世界而化。淨土聖賢錄

▲宋學士張抗。積善迴向。於佛前發誓。誦大悲陀羅尼十萬遍。求生淨土。年六十餘。寢疾。一心念佛。謂家人曰。西方淨土。只在堂前。阿彌陀佛坐蓮華上。翁兒在金地禮佛。其孫翁兒三歲而亡言訖。念佛而

逝。往生集

▲宋古鼎銘禪師。臨濟十五世孫。將示寂。謂其徒曰。觀世音持蓮花至矣。安坐而逝。火化。舌根齒牙數珠不壞。五色舍利無數。皇明名僧輯略及宋景濂集

▲宋都官員外郎呂宏妻吳氏。夫婦各齋戒清修。曉悟佛理。吳虔事觀音有靈感。每於淨室。別置瓶缶數十。以水注滿。手持楊枝誦呪。輒見觀音放光入瓶缶中。病苦者飲水多愈。所呪水。積歲不壞。大寒不凍。世號觀音院君。有二侍女。亦修淨業。其一奉戒嚴苦。或終月不食。但日飲吳所呪觀音淨水一盞。已而忽見佛及菩薩在目前。三年。得往生焉。龍舒淨土文

▲宋鄭氏。浙江錢塘人。日課觀音經。念佛不輟。後病中索浴。浴畢。西向坐。問家人云。聞磬聲乎。淨土諸聖且至。已而合掌喜躍曰。佛菩薩來。觀音手執金臺。如來接我登座。遂奄然坐寂。往生集

▲宋江西吉安王氏女。日誦觀音普門品。及彌陀金剛諸經。念佛求度。母死既殮。流血淋漓。女誓云。若我孝心。願穢氣不作。言訖。血即止。後父娶繼室。與同修淨業。臨終。請僧說淨土觀法。忽索衣。吉祥而臥。攬觀音手所執幡。寂然化去。往生集

▲元陶氏十六娘。常熟徐村人。年二十六。寡居無子。願生淨土。恆持念觀音普門品。忽夢白衣人。手持白蓮花一朵與食之。覺後。心神頗異。嗣裝一小閣。西向誦彌陀經。念佛甫三年。見佛現光明。經函上有火團如彈子大。氏恐燒經。手撲之。乃得舍利一顆。終時。化佛來迎。別衆而去。淨土善人詠

▲明尼成靜。廣州古岡人。自幼持齋戒。以貞潔自處。禮本邑真梵菴主爲師。及剃落。專課涅槃大乘諸經。事師敬謹。中年受具戒。棲心淨土。彌陀不輟於心口。慈祥好施。威儀範衆。嘗勸衆造梅檀千手眼大悲聖像於鳳城之大慈庵。越明年。得微疾。豫知時至。頻誨徒衆。與諸檀越訣別。翌日。語諸弟子曰。千手千眼大悲觀世音菩薩來此相接。汝等合恭迎之。吾往矣。即瞑目而化。觀音慈林集

▲明蔡承植。字槐庭。早年長齋奉佛。後官太守。禁民間殺牲祀神。晚爲念佛會。導諸賣菜傭。迴向

淨土。及疾。詣寺祝髮。歸見銀臺接引。連稱觀世音菩薩而化。

淨土聖賢錄

▲明劉道隆母李氏。年四十。長齋奉佛。不解誦經。修葺靜室。供奉觀音大士。朝夕禮拜。念佛千聲。雖盛暑隆冬不輟。刻施金剛經。聽人禮請供誦。竭資不恤。如此者二十五年。將終之前一歲。出督紡所餘。延名衲誦經。大修功德。事畢。夜夢所奉大士。持素珠一串示之曰。以此授汝。珠數乃汝往生淨土之期也。夢中數之。得五十三顆。不解其意。至庚子五月十三日。忽告家人曰。吾今日行矣。可舉家大聲念佛。助我西去。子婦輩相與坐榻前。同聲念佛。踰時面西端坐而逝。

金剛經靈應錄

▲清宋孺人。世爲江蘇長洲望族。年十九。歸太學生顧文耀。事姑何太孺人謹。太孺人素奉觀音大士。既謝世。遺宋磁大士像。孺人供奉日虔。十餘年如一日。已而其子晉芳。夢兩大士身衣破衲。如有所乞。且遇一舟子。攜兩軸求售。一舊刻吳道子畫僧相觀音。一繡像送子觀音也。急償以值。屬工裝新。送貯里中月聲菴。逾年。晉芳復夢兩大士云。將有行。急往視之。則皮置之壁間久矣。遂齋還家。張挂淨室。孺人日侍像旁。誦西方佛名。及諸經呪。瞻拜無虛日。一日。室中輒面忽現僧相大士。如道子畫。其後八日。又現一尊作送子像。善財龍女先後迸出。遂發軔刻像。金容爛然。自此一心淨業。臨終。訓勉諸子。各敦本行。命同稱佛名。勿哭。遂合掌至頂。誦所習呪。忽聞異香滿室中。

泊然而逝。時乾隆五十七年五月壬戌年五十四。一行集

▲清南濠鏡智道人。俗姓汪。歸李景熹爲繼室。年二十六而寡。發出世心。受菩薩戒。以佛法倡導鄉里。從而起信者百餘人。嘗刺舌血寫法華經阿彌陀經梵網戒品一通。年三十八。病痢。一日起。沐合掌。趺坐。念佛而逝。時乾隆四十九年也。後三載。同里何氏女病熱。言有羣衆執紅燈。以大轎舁我去。見靛面王者中坐。小鬼各執鋼叉銅鎚左右立。便命取鎚打我。慌惘之際。忽見金童玉女持旛幢自內殿出。中擁道人。離地丈許。戴青幘。搭條衣。握白拂。躡雲履。嚴潔無倫。視之。卽萬年橋李姆也。往嘗一宿其家。髣髴可識。然光彩迴絕矣。姆聲言止止。王遽釋我。下跪曰。謹如教。姆垂手援我。引入內殿。光明洞然。几席靚整。案頭供佛經。令設茗果餉我。果似蘋婆。香甚芳烈。云自西方來。引我歷觀地獄。謂人身難得。可勿持戒念佛。求生西方哉。可速歸。好好持齋念佛。一意西方。兼習經呪。時至迎汝。勉之勉之。仍命轎送我。蹶然而覺。一行集

▲湖州胡氏女。歸杭州潘某。潘向長齋。婚後。婦亦願長齋。未幾。潘病卒。四壁蕭然。婦遂屏棄衣飾。日費一錢買豆腐。蒸而啖之。不知饑。敬事大士像。持梵唄。法名寂念。外爲女紅。餘錢輒施僧。預置一龕。寄他處。康熙辛未六月既望。移龕至。請靈峯老僧來舉火。遂煎香湯浴畢。倩鄰婦扶入龕。手

拈香三炷。俄頃火延龕頂。出五色煙。香氣四達。男女送者數百人。共異之。時年四十有一。曠園新志

▲清袁簡齋言。余祖母柴太夫人。常述其外祖母楊氏。老而無子。依其女洪夫人。年九十七而卒。居恆居一樓。虔奉觀世音菩薩像。誦經弗懈。三十年足不履地。性慈善。卒前三日。索盆濯足。婢以向所用木盆進。曰。不可。我此去將踏蓮花。須將盥面之銅盆來。俄而梅檀妙香。空際繚繞。端坐跏趺而逝。香三晝夜始散。新齊諧

▲劉崇慶持準提咒。室中放白毫光。現大準提相。將逝。惺然見觀音出一物如滿月。恍示接引之意。遽起誦大悲呪訖。逝。廣信府志

▲清尼佛琦。造西方三聖梅檀像。高八尺。歲結七爲念佛會。將逝前三日。見菩薩現身。兩童子侍。或言聞菊花香。琦曰。此青蓮花香也。念佛而寂。淨土聖賢錄

▲清陵氏善益。行大悲懺。禮華嚴經。再周。晚專誦大悲呪及阿彌陀佛號。求生西方。一日。觀音大士現像。遂示疾。謂女曰。佛光滿室。吾行矣。淨土聖賢錄

▲清倪姬顯真。持齋念佛。村中有觀音像。早晚往禮。後數睹菩薩像。隨示疾。謂子數見菩薩喚我去。子云。菩薩既臨。當買蔬作供。曰。亦好。但恐不及。子歸。已坐逝。淨土聖賢錄

第五篇 廣勸懲

▲梁劉霽。有至性。家貧。與弟勵學。博涉多通。天監中。宰二邑。並以和理著稱。母明氏寢疾。霽年五十。衣不解帶者七旬。誦觀世音經。數至萬遍。夜夢見一僧曰。夫人算盡。君精誠篤至。當爲申延。後六十餘日乃亡。霽廬墓。常有雙白鶴馴廬側。梁書

▲明彭孝子有源。字信宇。湖廣益陽人。幼卽虔誦大士經呪。以祈親壽。父嘗病篤。刲臂肉療之。踰十年。父卒。奉母吳氏。家貧。勉具甘旨。崇禎丙子秋。母疾篤。不能起。又疽穿手掌。痛不能忍。源日夕憂思。夜夢大士諭以母壽將盡。得人肝服之。猶可愈。晨起視母。母正思羊肝。源曰。是菩薩啓我也。乃垂涕跪禱。願剖肝救母。至夜。夢大士諸聖幢幡而前。源驚醒。汗下如雨。乃澡身頂禮。舉手捫心。約得肺肝所在。持刀自刺。痛幾殞絕。稍甦。呼妻至。令速煮肝進母。母不知。欣爲下筭。病卽霍然而愈。事聞遠近。同聲讚歎。願瘡口未合。衆禱於大士。大士示夢曰。是孝子肝。收之無難。末世鮮仁孝者。欲出之百日。令世人徧觀之耳。孝廉王文南傳其事。啓禎野乘及觀世音持驗記

▲明江蘇吳江縣吳璋。十一歲喪父。母陸氏。永樂癸卯。以孀婦選給內廷。宣德丙午。隨親王分封。

廣東璋往覓母。舟中設觀世音像。日夕哀禱。願必見母。繼患痢。昏憤中猶呼母不置。遇僧蘊空。調理得生。及抵廣。王已改封江右饒州矣。奔馳沙磧。兩足俱裂。臥野寺廊間。遇焦道人施藥敷愈。一日過嶺。蛇嚙其足。暈地。復見前道人以藥塗之而愈。又投宿孤村。力拒奔婦。出門。雪深數尺。匍匐前進。得古廟憩焉。再見前道人慰之曰。爲母忘軀。真鐵漢也。天不負爾苦心。見母在卽矣。出餅與啖。天明尋路而行。至曉訪王府。母果在。璋屢啓乞母終養。不允。乃就府東賃一室。中書思親二字。旁帖云。萬里尋親。歷百艱而無悔。一朝見母。誓九死以何辭。王聞而賢之。允其請。母子終得相見。人謂璋孝思所感。然大士變化護持之力。亦彰彰矣。鞭心錄

▲明朱德貞。盱江人。益藩輔國常茫第三女。幼稟庭訓。性至孝。八歲。字儀衛王廷卿子重賢。十歲。重賢殤。聞訃卽素食縞衣。繡大士像。早暮焚修。默有所禱。及笄。有求婚者。始跪告父母曰。女王氏婦也。自重賢死而志決矣。父母怒責之。志益堅。且誓云。必不得爲未亡人。死而已。遂絕食自經。父母驚怖。不復議婚。天啓辛酉秋。屆重賢忌日。先叩二親。辭祖廟。於八月二十九日歸王。素絰執杖。舉哀設奠。遂掃除淨室。皈依三寶。晨諷普門品。大悲呪。晚課彌陀經。往生呪。一切詩文。誓不復拈。遇翁姑父母生日。及重賢忌。必設供禮懺。自昧旦至夜分。儀軌不忒。翁姑亦傾心茹素。一切果餌。

手整始饋。視疾問安必謹。甲子歲。父病沉篤。割股進之。父夜夢大士云。汝以女孝延年。病得愈矣。

盱江人無不頌其節孝。

啓禎野乘及觀世音持驗記

▲清黃叟。楚北人。篤孝樂善。家清貧。爲鄉塾師。年六旬。膝下唯一女。時年十四。慧而賢。幼隨父讀書。嘗絲繡白衣大士像。禮拜甚虔。一夕。夢大士呼曰。嗣姑。汝父孝義。不應絕後。我欲以汝子之。啖以紅丸。女覺熱氣一縷。由胸下達。昏瞶者七日。剡然而起。已化男身。萬玉山房筆記

▲清閔貞。字正齋。湖北廣濟人。天性肫摯。居漢口鎮。自幼失怙恃。稍長。見人歲時伏臘。懸父母圖像而致祭者。輒欷歔流涕。痛二親遺容不獲見也。或謂寫真家有追容之法。求生人眉目口鼻修短肥瘠之相似者。可彷彿得之。而楚中寫真。訖無佳者。因篤志學畫。描神攝色。期年而得長康之妙訣。朝夕虔禱。觀音大士前。謂天下人多如恆河沙數。豈無一二人與父母相似者。求菩薩神力。默使來前而圖之。鄉民咸笑其癡。有給之者曰。昨見翁媪。攜筐拄杖。與君家椿萱實酷類。聞有事往荆襄。計程可追而及之也。於是正齋屏息疾趨。一日夜行二百餘里。足皆重繭。果見翁媪。延之而返。寫畢。翁媪忽不見。鄉中父老見畫像。謂酷肖正齋之父母。里閭中交相驚異。歎息謂孝思所感。可通神明。若是其靈異也。夢廠雜著

▲清有孝婦劉氏者。湖北處縣人也。夫出。姑病噎。藥莫能療。氏割股。和粥進姑。姑食之愈。旬餘復作。氏又丸股肉奉之。復愈。但間旬仍病。氏默禱大士。願以身代姑。醫謂此非凡藥能治。若得人肝一片。根可除矣。氏深信之。卽潛以利刃刺脇下。肝長數寸許。垂於外。斷之。遂暈仆。恍惚見大士撫其體曰。兒苦矣。以丸藥敷傷處。遂甦。烹肝奉姑。又愈。自此病不復發。姑見氏舉動。恆以掌護脇。屢詰不答。薄而觀之。創痕宛然。惶駭問故。乃具告。姑失聲大慟曰。媳以我至此。我心何忍。喧傳遠近。觀者踵相接。氏深匿不出。族長呈於縣令李君。欲驗視。氏不可。曰。妾因姑病篤。故不惜餘生。非希表揚。無煩過詰真僞也。令肅然起敬。聞之大吏。請旌焉。乾隆己亥六月事。信異譚可錄

▲孫復儒妻金氏。性孝。江蘇武進人。翁好行善。金鬻奩田以供費。年二十四。夫亡。矢節。翁病劇。氏手調湯藥。六十晝夜不眠。病不愈。虔叩大士前。割股肉一臠。適翁思食米糲。遂以股肉煮湯和粉成之。翁啖五枚。卽安寢。寤而呼氏曰。吾不死矣。頃見白衣大士來。言汝媳誠孝格天。增汝一紀。未幾病愈。壽七十七。恰符一紀云。自求集

▲明紹興韓弘儒。四十八歲時。其妻金氏除夕夢亡姑曰。汝夫明年重九。大限至矣。金恐傷夫意。不敢言。惟虔禱白衣大士。以祈夫壽。明春。韓赴館於表姊家。見有老婢數人。從容語姊遣嫁之一。

月內俱得所配。寒食後訪一宦家子。几上多新傾色銀。韓正色曰。君生富貴家。宜輕財樹德。何貪小利。爲刻薄事。兄獲微益。而人受大損。在人祇損利。在兄卽損德。是損於兄者更大矣。宦家子爽然自失。誓弗再傾。端午歸。過一酒館。見宦僕手持錦袍。講息人命訟事。百端把持。一語不合。將袍毀裂。欲以激怒主人。韓隨往謁宦。詳述始末。指天設誓。宦素服其剛直。責奴遣之。七夕設宴。座有鄉紳。自言清正。某親冒勢爭座。某族冒勢構訟。一一批揭。與被害人。到官罰之。舉座讚歎。韓微哂曰。禁止冒勢。固盛德事。然親族情誼。亦何可傷。何如溫言受稟。詳詢曲直。而諭解之。爲兩得其平乎。鄉紳斂容稱善。九月初。門生五人中式來謁。韓謂曰。賢契已進一階。宜益修德。以祈上達。切勿輕言納寵。傷糟糠之情。勿疏遠故舊。致貧交之憾。勿多收僕從。啓生事之漸。勿過爲奢費。開妄取之端。諸生唯唯受教。是夜。其妻金氏夢大士曰。爾夫壽終九月。以近來勸戒良言。造福廣大。益壽二紀矣。韓重九歸。果無恙。妻爲述兩夢。自是益勉於善。後以明經作令。高年致仕。勸戒全書

▲明王文肅公錫爵。號荆石。江蘇太倉人。雖貴顯。終身不二色。好行善。梵宇無大小。皆欣然書額護持。晚年命工繪者。以金銀汁。畫大士像。手書心經在上。施人供奉。不記數。子緱山先生名衡。中榜眼。孫時敏。別號煙客翁。篤奉佛教。增修世德。儉歲首倡糶官米。兼煮粥濟民。請瓶窰聞谷大師

至妻。創興佛法。陸孝廉允升。夢至大寺。六人挑豆至。黃豆中雜蠶豆。旁立老僧曰。此皆煙客翁所積善果也。大善記一蠶豆。小善記一黃豆。得六擔之多。生子九人。次子揆。及第。八子揆。次房孫原。皆進士。一門厚德。鼎盛未艾。現果隨錄

▲明林翁。廣東潮州府刑房典史。矜恤疑獄。哀憫繁冤。偶有一人含冤犯死罪。林謀與伸雪。急切不得策。乃朝夕禱大士。冀示垂救之方。一夕。夢大士示曰。某按院議語致疑。某刑官招詳未確。乘此辨之。可見罪非其有。曉即代爲作詞上訴。果得寬釋。其人感林之德。知林乏嗣。欲以女謝之。林不許。醉林密室。肩女伺寢。林覺曰。不可。女以父母命強之。曰。不可。不可。毅然去。後遂不過其門。年五十。生大欽。嘉靖壬辰。由鄉薦入都。旅舍主人。夢大士曰。明日林三不可子來寓。新科狀元也。放榜。果符所夢。以告狀元。不知所謂。歸白諸母。方知父之陰德云。勸戒類鈔

▲清尼等齡。廣東番禺人。俗姓鄧。精勤禮誦。晨昏不怠。切念淨土。持誦大士洪名。不輟於口。庚寅七月二十三日。禮念至中夜。四壁寥然。惟自一身。恍如掌中有物。不覺納之入口。咽已。開拳。尙餘三顆。其色鮮赤。宛如硃砂。自此絕食。了無饑渴。禮念如常。厥後稍餌時果。而烟火食物。不復沾唇。膚體如常。精神轉健。住廣州嚴淨庵。觀音慈林集

▲清馮如京字秋水。爲雁門碩望。任廣東西甯觀察時。民亂討已平。將軍欲盡殲之。先生密爲請命。將軍不允。先生曰。天地以好生爲德。文字以止戈爲武。今叛人罪固可誅。然倡者十數人耳。現繫累殆數千人。其中或脅從。或無知。或老弱鰥寡。不分良楛。與渠魁共瀝血於白刃之下。忍爲之乎。若有變。吾當以全家坐之。再三言。於是止斬巨匪數人。軍徒流杖。及釋放有差。次夜。先生夢祥雲滿室。如世所繪觀音大士者。降其前。繡襍攜一子。謂公曰。君無子。以此賜之。公曰。吾固有子。何謂無。大士曰。彼非君之子。此乃子也。公手接之。則中間阻隔一牛。不得前。大士曰。君知之乎。君家食牛肉。誠之乃可。公遂發願。世世不食牛。乃接於懷。次年生子。卽給諫諱雲驢者是也。後長子某。中年沒。無後。嗣者皆給諫子。數十年夢徵。至是乃驗。柳崖外編

▲清吳門施陞錦。爲諸生時。聞友人云。某妻美。可餌以金。及見其婦。赧顏對客。睫縈淚痕。問之。因言貧乏。不能以自存。計以色售。暫救饑寒。實非甘爲此喪廉恥事也。問其夫何在。則避旁舍中。施呼出詰責。云將填溝壑。得五六金。卽可作小本經紀存活矣。施急歸。以十金與之。遂絕跡不至。婦家。而其夫感恩。常來探候。外人皆疑施與某婦私。非篤行士也。婦聞而羞憤甚。塑大士像。朝夕焚香拜祝云。予立志不端。受此不潔謗。夫復何尤。第恩人施生。周人患難。保全予之名節。反遭誣讟。

之言。願其必中解元。庶可昭雪。康熙庚子科。果中江南解元。勸戒類鈔

▲清澗南居士自記云。乾隆戊子。余客西江。與松江張孝廉良山同寓。每黎明。聞張朗朗唸誦聲。詢之。則曰。此心經。白衣呪。高王夢授等經。余三世信持。歷著靈驗。子盍持之。余曰。唯。因置一冊。逐日虔誦記數。後道出吳江。舟泊太子磯。登大士閣卜籤。籤云。勸君作事要心堅。三十四中良有緣。丹桂同根指日發。芹香有種次第聯。是年秋長兄領鄉薦。余旋補郡庠。姪輩亦相繼游泮。更奇者。兄榜名與予號次。悉符示數。益悚然於大士之靈應。因信良山之語。不余欺也。觀音經跋

▲當湖林某。有姊二人。適陸氏昆季。長生子某。次生子天錫。康熙戊午。林病歿。翌日再生。告家人曰。異哉。陸氏二甥一段因果也。適至一處。見宮闕壯麗。忽聞輿騎喧闐。一羣神人。送今科天榜至。詳查功過以定去取。王者出坐。卽有判官呈冊籍。解首乃甥陸某也。冊載母林氏詛呪口過若干條。上千天怒。王怫然色變。再查陸某自身。嘗犯財色二字。遂舉硃筆勾之。次查至二十一名。乃甥天錫。其母口過相等。王亦欲勾之。忽觀音大士宣諭曰。陸林氏雖多口過。然奉佛心虔。有善可錄。且查天錫籍中。註有友人逋賦當受杖。代爲完辦。其叔爲令虧帑。棄產補之。又拒一奔女。王欣然色霽。諭予曰。汝甥有此三大善。榜中當留名。汝祿未終。回陽。可勉其精進勿怠。無負大士意。予受

命而出。恍惚間卽歸家也。二甥適省病在側。自思平日所爲。俱舅氏所不知者。而冥司早歷歷知之。不勝駭異。是科榜發。天錫果中二十一名。陰臨文新編

▲直隸滄州插花廟尼。俗姓董。遇大士誕辰。潔治供具甫畢。忽覺神倦。隱几假寐。夢大士詔曰。汝不獻供。我亦未嘗饑。汝卽獻供。我亦不加飽。寺門外現有流民四五輩。乞食不得。困餓將殆。汝輟供具以飯之。所得功德。勝供我十倍也。霍然驚醒。啓門出視。果然。自是每年撤供具。皆以施丐者。曰。此菩薩意也。海南海勺

▲金陵上舍生陶衡峯。妻宋氏。崇奉大士。持誦嚴淨。衡峯年八十一。疾革。語宋曰。風鑑者謂予壽止此。言殆驗矣。宋飲泣。夜焚香中庭。禱大士。願折己算。以延夫年。既而取刀割臂肉。煎藥以進。次日。疾良已。遂持大士齋。供奉益虔。越十二年而衡峯卒。宋朝夕起居。若神明在左右者。晨起必誦呪一百八遍。至年七十餘。不少懈。會江南大疫。宋病危。恍惚出門。見衣冠者謂曰。汝當不在此劫。予導汝求大士。卽引至一所。至廳事。初不見菩薩。但見上坐古衣冠者二人。宋俯伏逾時。左者曰。此婦非當應此劫者。右者首肯。卽命婦出。導者曰。免矣。予送汝歸。入門而仆。卽驚寤。雨汗而病解。年八十。項骨不支。終日若俯視者。且患酸痛。每謂人曰。項骨倒矣。蓋俗所謂死徵也。一夕。夢老人

攜童子入。持茗具。與宋曰。奉大士命來。爲汝起項骨。飲此當愈。接視杯中。浮小綠葉。如藿香草。飲之。味甘美。覺項間無復酸痛。覽鏡自視。項骨起矣。後八十有五。無疾而終。異香彌室。宋次子松山。亦奉母教。信心不怠。持驗記

▲宋張奉直。江西浮梁人。有一僕。好宰牛。屢夢入牛羣中臥。張曰。汝造業已重。將墮畜生。非痛自懺悔不可。因教以誦觀音經。未幾。稍識字。能誦終卷。遂誓斷前過。凡十年。一日。遇屠牛者。見而心喜。分半體鬻之。越夕。夢如初。晨起。欲誦經。一句不能記。字亦不復識矣。惡病旬餘而死。海南一勺

▲明張叟。蘇州皋橋人。素尊像教。喜飯僧。萬曆辛亥春。將赴普陀。瞻禮觀世音。挈八齡孫以行。張叟乘一船。其孫忽見滿船人。悉繩縛手足。急從後牽衣止之。並白其異。叟大駭。登岸。換第二船。其孫復白所見如初。又登岸。更求第三船附之。問其孫曰。只前兩船怪異。餘無所見也。叟意未決。有二人立船首大呼曰。勿乘彼而來此。此船甚安穩。逡巡間。又若有人自後推之。遂挾孫登船。坐甫定。呼者推者俱不見。日暮潮至。雪濤山立。前兩船所載。並江湖賣技之流。舟人不善迎潮。應時覆沒。全船男女無一存者。張叟之船。安濟無恙。越三日。仁和縣令。出巡江口。檢閱溺死羣屍。每人腰纏中。各有兩大錫錠。小刺刀一枚。驗是釣淫之具。信知闡提無賴。爲菩薩所不宥也。繪園志異

▲明崇禎時。有少年趙某。蘇州閭門人也。富而驕。耽於色。每逢婦女燒香羅拜。必乘間跨之。時六月十九。值大士誕。入北寺閒遊。適一少女來。爲母病篤。伏地而禱。繼以涕泣。趙豔其艾。佯爲絆跌狀。從女頭上跳去。雲鬢幾亂。衆不知其詐也。亦諒之。而趙忽覺腎囊腫痛。旬日間。漸至斗大。蹣跚而行。羞入城市。腐潰數年而死。自求集

▲明萬曆中。焦甲以江陰縣吏。選湖廣典史。陞知事。離任三四程。泊舟江上。有一南僧自蜀江來。求附載。舟人不許。僧因吐情告焦曰。貧僧有募金六百兩。將往普陀爲觀世音建幢樹刹。幸附而南。此功德誠無量也。焦與偕行數日。忽萌惡念。一夕大風。竟推僧江中。發其篋。果六百金。悉入私囊。曉起。見僧從水出。向前索命。自是晝夜現形攪鬧。焦憂懼成疾。晝夜不甯。凡禳謝無所不營。而僧時至。病將一年。僧物已物俱已垂罄。忽一日。亡僧持刺造訪。謂焦曰。我也。非鬼也。去年游魂於風浪中。自料必死。倏見觀世音。自空中降。持一燈。引人蘆洲。遇漁人救脫。六百金雖爲君取。隨復募化。已足其數。今將至普陀。償此宿願。頃過江陰。人傳君病奇怪。特爾造見。爲君釋杯蛇之惑耳。僅享一飯而去。使人跡之。果乘海船往矣。從此鬼形遂絕。然焦病終不愈。數月卒。止生一子。少。有文名。方應舉。以親喪不能赴。偶步江干。忽躍入浪中以死。僧歸自南海。聞而歎息久之。感應篇增註

▲安徽休甯小南門外。有落石臺。懸崖峭壁。前俯深溪。巖中供銅鑄大士。天啓壬戌。有盜利其銅。梯絙取之。碎其法身。惟頭獨存。藏於袴。疾走。迷不辨路。往復稻田中。行人覺其異。詰焉。應答支離。羣搜得之。送縣究治。山僧奉其頭抄募。更鑄聖像。覺世經說證

▲嶺南沈香價廉。凡官廨公座。皆香所雕。市人製沈香佛像最精工。有妖人數十輩。扮僧人狀。借法像以逞其奸謀。命刻工雕刻沈香觀世音菩薩。其外裝成丈六金身。而空其中。施以關振。中藏刀斧等兇器。常駕像以出。幻惑男女。因而殺人。刼貨。無所顧忌。鎮江郡守某。初下車。忽夢見白衣婦人。詣前白狀曰。余腹中晝夜不安。楚毒甚矣。官人何術相救。既寤。心怪其事。升堂而問左右。境中得毋有婦女枉濫者乎。邏人巡兵從旁進曰。近日河下有香菩薩。從者如歸。足新府君之聽也。守立命駕車出郭。搜其舟中。盡得奸宄。於是決殺妖徒。蕩滅其黨。無一漏網。江左稱神明。衆口翕如。督撫中軍。向陳嘉謀道之。獢園志異

▲明正德中。王某爲江陰邑令。一日。召胥吏不至。怒甚。附近有觀音寺。寺中有沈香像。夙著靈異。是日胥吏鬻集。爲觀音會。令偵知之。焚其像。已而令人覲。中途忽心疼。迎戒僧懺其罪。僧曰。大士普照十方。幻軀猶捨。豈爲一像生瞋恨者。但護法諸神。欲彰現前之報。恐不免矣。陰騭文勸戒篇

▲明末有陳荆山者。爲兵道聽事吏。性暴戾。而嗜賭。家奉觀音木像。出博勝。則焚香禮拜。或少失采。則肆口呪罵。一日。負而回。怒甚。舉像投溷中。日以溺器蓋置家祠神位上。崇禎十七年四月廿七日夜半。鄰家失火。延及荆山家。荆山趨出。已而復入。端坐廁中焚死。蜩菴瑣語

▲明太倉徐秀才驥生。博學篤行。鄉里推重。其長子坤。小名佛舍。字成民。年甫弱冠。孝謹忠直。奉佛持齋。昆蟲草木。咸不忍傷。癸酉六月十二夜。被召至忉利天上。敕攝冥中第五殿事百日。嗣後每夜或赴陰府。或赴本殿。因念震旦衆生。積孽偏重。陰陽路隔。開導無由。悲思憫痛。運神通力。在彼研審。俾得在此聽聞。現身說法。普渡迷津。由是觀者如堵。毛聳股栗。或口傳。或筆錄。冥斷遂成帙矣。成民自言冥中光景。最爲悽慘。舉目縲紲。塞耳呼號。獄名十八。刑分萬條。諸佛菩薩阿羅漢及歷代祖師。時來救拔。然非其人。宿有善根。佛光必不能及。卽面與開示。惛然不醒。惟七月十五爲佛歡喜日。普天之下。禮懺施食。觀音大士親領衆囚赴食。法力所施。諸罪末減。活閻羅冥判○按上海醫學書局刊行此書改名死後之審判

▲明溫州醫僧法程。字無枉。少瞽。百方療治。均不見效。但晝夜誦觀世音菩薩名號。如是十五年。夢中聞菩薩呼之使前。若有物繫其足不可動。菩薩歎曰。汝前世爲灸師。誤損人眼。今生當受此

報。吾憐汝誠心。當使衣食豐足。遂探懷中。掬寶珠滿手與之。既寤。醫道大行。衣鉢甚富。後享高壽。

唐宜之
醫勸

▲山西張玉有女。名佛兒。好誦觀音經。年及笄。暴死。半日而甦。言被二冥役挾過。又嶺。見黑被先裹二人。納陳家。次裹佛兒以花被。曰。汝負渠錢一千五百。今應還渠也。有綠衣者前曰。此女念觀音經。姑舍之。因失足墮地。矍然而醒。白於父。明日。父訪又嶺。果有陳家。夜產三犬。二黑一斑。斑者斃。歸而取錢如數還陳。陳不受。以錢爲張作功德焉。南航

▲江西臨江諸生高蕃。少慧。十四入庠。娶樊氏。小字江城。美而悍。生昵之。未幾。陵夫萬狀。翁姑不能禁。遂析居。生不堪其苦。日就枯瘠。母見之。憂甚。忽夢一叟告曰。此夙世因也。江城前生乃淨業和尚所養長生鼠。汝子前生爲士人。偶至寺。斃彼鼠。惡報在今世。不可以人力回也。惟每早虔誦觀音呪百遍。當有效。既寤。述之於生父。夫婦咸遵其教。閱二月餘。女橫如故。益覺狂縱。一日。有老僧在門外宣佛果。觀者如堵。女卽奔出視。俄而僧敷衍畢。索清水一盂。持向女面。宣言曰。莫要瞋。莫要瞋。前世也非假。今世也非真。咄。鼠子縮頭去。勿使貓兒尋。宣已。吸水噴女面。涔涔沾襟袖。衆大駭。女殊不語。拭面自歸。僧亦去。女自是痛悔前非。覩然如新婦。承顏順志。勿衰云。聊齋志異

▲清徽商程伯鱗。久居揚州。奉觀音大士甚虔。乙酉夏。兵過揚城。程禱大士求救。夢大士謂曰。汝家十七人。十六口俱得免。惟汝在數。不可逃也。程醒。又復懇禱。仍夢云。汝前生殺王麻子二十六刀。今須償彼。可令家中十六口並住東廂。汝獨在中堂候之。勿遺累家人。程信之。越五日。兵至門。程迎問曰。汝卽王麻子乎。我欠汝二十六刀。可殺我。兵驚曰。汝何以知我姓名。程具告以夢。兵歎曰。汝前世殺我二十六刀。致我今世報汝。我今殺汝。汝來世不又報我乎。乃以刀背斫程二十六下而省之。唐宜之曰。記此事有三意。一者。見菩薩大悲。能回定業。二者。見宿業既熟。難脫如是三者。見目前所受。悉是往因。宜歡喜領受。不當怨尤。亦不必苦苦以趨避亂心也。唐宜之求書

▲清杭州凌聚吉女。忽遭奇疾。口中諄諄作聲。聚吉叩之。答曰。余倪姓。名瑞龍。揚州人。有地五十畝。被人占奪。汝女前身卽察院劉某。受我銀。復斃我命於獄。含冤六十載。今索命耳。言已。押女赴地府。已而口中喃喃述冥事。聚吉憂甚。命女虔禱觀音大士。日誦聖號三千聲。以求釋冤。女見鬼差示審期。及期赴審。倪懇受贓斃命狀。女力辯死非由己。神判曰。害命雖虛。而受財則實。理合科罪。仍命候殿訊定奪。越三日。被押赴三殿審訊。女惶恐乞命。王曰。念汝懺悔。持誦觀音。姑釋汝。但須力善。以延天年。仍令二鬼送女歸。(陸圻曰。按凌女之病。發於癸巳。距前六十年。徧查履歷。果

有一姓劉者。任淮揚巡按。名應龍。字在田。湖廣寶慶府邵陽縣人。中萬曆八年庚辰進士。初任崑山知縣。丙戌。行取四川道。戊子。長蘆巡鹽。己丑。淮陽巡按。自前萬曆己丑。係男身巡按。至今癸巳。女身遇鬼。通共首尾六十五年。又今乙未。則六十七年也。而轉變如此。吁。可畏哉。冥報錄

▲西湖靈芝寺。爲吳越著名香火。有觀世音木像一尊。高七尺餘。相傳爲行脚僧募造。造成而去。妙好莊嚴。甚靈應。殿基在正殿後雙銀杏樹下。爲杭州蕭秀才所據。秀才不信佛法。架屋爲書舍。十餘年矣。比丘無力興復。權以像供養三世諸佛下。余寓其寺。瞻禮興嗟。爲題募建殿緣疏。疏成。比丘將出募。先持示秀才。秀才執科舉未定爲辭。不數日。府榜落名。嘔血二斗。垂死。昇而歸矣。一日。管公子可成。自會稽來。余留膳宿。管具說所夢云。某昔年曾假蕭氏書舍。夜夢梵僧降神。敕速去。不去。明日有大禍。取某書劍。授僕從。裝而出門。既覺異之。遂不果留。某別去之夕。有豐城人來宿。中宵暴亡。獢園志異

▲蘇州孝廉戴星歸。行多蕩檢。吳中呼爲戴癡。既而受害者衆。控之工部。斃於獄。適本城某暴卒。已而甦云。見閻王命將戴付油鍋。平地上卽湧一油鍋。獄卒又戴下鍋。戴厲聲呼南無喝囉怛那哆囉夜耶。油鍋迸散。地上湧一蓮華。王曰。彼能誦呪。刑不成。須訪一行惡之家。令他託生自受報。

去。吏白云。嘉興一府吏某姓家。三世爲惡。適建醮求子。冥君卽令投胎。限日生。訪之嘉興。事皆不爽。現果隨錄

▲靈山普門寺一老僧。戒律精嚴。徒侶甚衆。有八僧常於附近人家。作普渡道場。輒焚所印心經三十張。煙灰風颺。散棄四野。中小頭陀。心知其非。而不敢言。一夕。夢陰府攝去。見寺中七僧俱跪階前。高座王者曰。心經汝何敢妄燒。字痕宛在。棄擲道途。蔑聖穢字。莫此爲甚。七僧服罪。復問頭陀云。汝何不言。應曰。我初入寺。不敢逆師父師兄也。諭曰。今姑饒汝。可歸去與長老說。今後切須禁止徒衆。不得輕褻經典。又曰。自來焚心經一頁。爲死者滅罪超生。惟道行高妙。灰飛上界。方可。俗僧戒行不端。焚一頁紙灰墮地。不惟無功德。且與自造萬千惡業何殊。汝速去。普告十方。念心經可。焚心經斷不可。頭陀驚醒。白之長老。未數日。四僧牆壓死。二僧死於水。一僧死於魘。頭陀因是信心勤修。後悟道。惜字全編

▲清游源。江西撫州諸生。父病癆瘵。母積鬱氣。源自幼患頭風。傷兩目。良醫不能治。娶室胡氏。年逾三十而艱於得子。氏見全家多災厄。日夜憂思。於乾隆己亥春。力勸合家老幼。齊心同願。虔奉觀世音菩薩。齋期誠潔。誦經悔過。遷善已而翁姑勿藥自愈。其夫源目病亦除。乙巳生一子。姑年

八十。病中咯血。氏於危急中。泣禱菩薩救護。其姑於垂危中。髣髴見一媪。周旋牀前。且云無妨。吾保爾。不日霍然起矣。自是年年施經不輟。南海慈航

▲清金桓。浙江紹興諸生。性孝友。康熙六年七月二十一日。夢長眉仙語曰。爾有夙孽。明年此日。當遭雷擊。桓寤。憂之。惟日禮大士。以求懺罪。次年是日。桓見晦冥。知不免。恐驚老母。豫往跪於文筆峯浮圖下。忽風雨大作。霹靂轟繞。家人驚泣。謂必死。既霽視之。訝猶生。桓曰。適如夢中。見大士露灑楊枝。復持鏡一照而去。俄然而醒。湖壩雜記

▲清康熙四年五月。有西洋人到山。住半月。盡攜鑄佛幡幢等物。運往日本貿易。得金二十餘萬。將歸本國。船忽失火自焚。俱溺海死。普陀山志

▲清康熙十一年壬子春汛。諸軍伍泊舟洛伽。即普陀入大士殿。清淨如平時。出門。毒蛇如蝟。張口噴氣。諸軍懼而奔避。又有獠犬。成羣出噬。進退無門。死傷無數。人以爲護法神靈。警誡無道軍人之報。普陀山志

▲江蘇崑山石浦鎮。有觀音堂。荒涼殊甚。康熙初。有鄉人逐兔至堂。殺之。欲烹而無油。旁一人指示佛前燈。遂取油以烹。食甫畢。兩目忽瞽。未久而殂。陰騭文廣義

▲湖州白雀寺弱庵律師。嗣蘇州報國茂林和尚。寺中建大悲殿。少階石一。施主潘姓者捐二十金。令完此公案。師以東園未成。衆僧不便。權借階石作窖。後施主來問。曰。吾已另作一好功德。再尋銀完階也。施主銜恨去。未幾師歿。事遂寢。後一沙彌忽病癲。主者錮之室中。輒逸去。問誰解汝縛。曰。弱庵和尚也。衆嗤其妄。師旋附沙彌體。曰。渠非妄言。實我也。因誤褻大殿階石。冥府常以大石壓我。若不勝言。汝徒衆速爲我起石。淨洗供起。并集僧誦梵網經。吾苦可脫。問何附此沙彌。曰。幸此沙彌。頂無火光。吾得借渠傳信。不然。受苦無期。徒衆如命起石誦經。訖。師乃去。沙彌遂清醒。

現果
隨錄

▲清邱魯。江西臨川人。雍正乙卯。見觀音經。喜而虔誦。連生二子。私謂未必菩薩力也。齊心漸弛。丁戌兩載。子並夭。乃瞿然悔悟。仍虔禱大士前。矢志普施經卷。庚申。其妻鄧氏。夜夢白衣大士。笑容可掬。抱一孩。置榻而去。次日生子。歲餘。鄧得夢如前。又生一子。南海
慈航

▲清查邦鉞。安徽婺源人。四旬無子。其姪起蠲勸。曰。觀世音經。祈子甚靈。已代請一卷。若虔誦一藏。並竭力印送。以謀廣化。則夙障消而福報至矣。遂自康熙辛酉歲。夫婦同誦。連得二子。但俱不育。自悔慳吝。未嘗印施廣化。故功力淺薄。致此。乙丑元旦。誠禱。倘再生子。送經二千卷。是年十一

月生一子。名佛賜。印經酬愿。子獲長成。南海慈航

▲明張貴。河南彰德人。乏嗣。宣德四年。從公於廣東。得白衣經。六年回家。偕妻田氏。發心施經求子。未幾得子。以多經事故。遷延時日。未酬所願。子十二歲。忽病卒。夫婦痛心追悔。焚香虔禱。施經千五百卷。丁巳。生子無恙。持驗記

▲施翁。蘇州人。散財好義。年逾四十。生一子。名之曰還。攜金至虎邱修大士殿。聞劍池旁哭聲。趨視之。乃幼時同視友桂某也。詢知負債被逼。來此畢命。卽以三百金授之。桂叩大士前誓曰。某荷施君厚恩。今生倘不能酬。來世願作犬馬相報。翁更以棗園一區授之居。桂生一女。翁約爲婚。未幾。桂於棗樹下。掘翁父埋金千兩餘。漸殷富。而翁家日替。夫婦相繼歿。子還無依。桂聽妻孫氏言。旣諱前負。且圖賴婚。竟徙會稽。還投之不納。因及三百金事。以無借券被拒。越數年。桂入京都謀幹。爲奸人所誑。誦耗家資過半。旅邸無聊。假寐間。至一大宅。旁有竇。不覺兩手據地入。見堂上燈炬輝煌。一老人據案坐。卽施翁也。桂慚甚。欲與拱揖。而手伏地不能起。繼至後園。見其妻與二子俱在。審視之。皆犬形。回顧己影。亦化爲犬。駭問故。妻曰。汝不記大士前誓語乎。復何言。猛然驚覺。夢也。急整裝歸。抵家。見旁停兩櫬。几上書二子位。益驚悸。趨入。而妻已病危。氣垂絕矣。桂呼之。妻

忽睜目作其長子聲曰。父如何。今日方歸。冥王以吾家負施氏恩。父有誓在前。吾兄弟與母三人。明早卽往施家投犬胎。二牡者卽吾兄弟。牝而背有瘻者卽母也。父俟來秋八月。亦當作施家犬。以踐前誓。惟妹與施郎。冥數合爲夫婦。獨免此難耳。言訖遂絕。桂聞言與夢合。驚痛交集。方欲襄殯。而火焚其家。三櫬俱燼。遂攜女至蘇。訪施子消息。知己登第。且娶支參政女。桂羞且恨。懇再三。始許一見。方入。三犬突從牆竄出。環遶哀叫。其一背上果有瘻。桂痛甚。向施泣拜。備述所由。且云。今已家破無歸。但願恩開一面。納女爲婢。吾亦忝廁僮僕。終身力作。以免犬報足矣。施惻然許之。是夕。夢妻子來辭曰。幸君悔罪。施氏先人已爲君乞免。吾母子亦幸離業軀矣。迨曉。聞三犬夜斃。桂踰年無恙。

自求
集

▲吳門王建。持躬謹飭。忽無疾晝死。隨青衣吏至冥府。閻君鞠係誤攝。應攝者山東王健也。建由是得生。出冥殿。見地獄黑燄蔽空。嗥叫聲如霆吼。三老僧跏趺大樹杪。每獄囚痛聲騰沸時。以淨水灑之。聲卽停寢。建近前詢之。則觀音普賢地藏三大士也。建與報國茂林律師舊相識。見在冥府。袈裟杖錫如生時。建著有回生記。

現果
隨錄

▲清光福庵東村李某。康熙三十三年正月間。忽發譫語。生平所作。無不吐露。時爲自言。時爲神

言空中聞揭紙聲。人問之曰。看簿子也。其惡簿內一事。有王姓女已適人。夫婦不和。李峻離之。另適西華人。女出門時。恐鄰里索詐。易服雜於男子中。踉蹌去。驚悸而病。越九日死。李曰。此事尙有爲首者。冥官曰。某於某月日自有報。閱惡簿畢。問可有善事。又聞揭紙聲。曰。某年月日。修觀音堂。冥官曰。某本合天誅。姑放回陽一日。李旣甦。謂衆曰。冥間不似陽間可掩。事不須審辨。已明悉無遁形。傳諸世人。慎勿作惡。卽惡念亦不可起。神一一皆見之。

陰騭文
新編

第六篇 普示現

▲中天竺摩竭陀國。迦布德伽藍南二三里。至孤山。其山崇峻。樹林鬱茂。名花清流。被崖注壑。上多精舍靈廟。頗極雕刻之工。正中精舍。有觀自在菩薩像。軀體雖小。威神嚴肅。手執蓮花。頂戴佛像。常有數人斷食。在彼一心求見菩薩。七日二七日乃至一月。其有感者。見觀自在菩薩。妙相莊嚴。威光赫奕。從像中出。慰諭其人。昔南海僧伽羅國王。清旦以鏡照面。不見其身。乃覩南瞻部洲竭陀國多羅林中小山上。有此菩薩像。王深感慶。發心尋求。旣至此山。實惟肖似。因建精舍。興諸供養。自後諸王尙想遺風。遂於側邊曠地之上。添建精舍。香花伎樂。供養不絕。

西域記

▲印度清辯論師。於觀自在菩薩像前。誦隨心陀羅尼。絕粒飲水。時經三載。觀自在菩薩現妙色身。問其所志。曰。願留此身。待慈氏。彌勒菩薩成佛。菩薩命往大安達羅國城南山巖。執金剛神所。至誠誦持執金剛陀羅尼。當遂此願。論師往誦三載。神乃授方而謂之曰。此巖石內有阿素洛宮。如法

行請。石壁當開。開即入中。可以待見。論師受命。專精誦持。復歷三載。初無異念。呪芥子以擊石壁。豁然洞開。是時百千萬眾。觀觀忘返。師跨戶告眾曰。吾久祈請。待見慈氏。聖靈警祐。大願斯遂。宜

可入此。同見佛興。聞者怖駭。謂是蛇窟。恐喪身命。再三告語。惟有六人從入。入已。石壁還合。唐西域記

▲劉宋尼僧端。廣陵人。家世奉佛。姊妹篤信。誓願出家。而母兄已許富室。婚期前數日。誦觀世音經。雨淚稽顙。晝夜不休。過三日後。於禮拜中見佛像語云。汝壻命盡。汝但精勤。勿懷憂念。明日。其

壻為牛所觸而亡。因得出家。比丘尼傳

▲唐法常法師。南陽白水人。課業行道。六時自勵。嘗於中夜。至佛堂中。見觀音菩薩從外入戶。上住空中。身相瓌琦。佩服瓔珞。晃發希有。良久乃滅。高僧傳二集

▲唐普明禪師。本名法京。會稽人。隨智者大師。適廬山東林寺。行觀音懺法。冬月身不衣絮。苦節行道。見一僧云。所名法京未善。可改普明。此名曉朗。照了三世。懺訖。啓智者。遂改名。高僧傳二集

▲唐釋曇藏。俗姓楊。弘農華陰人。年十五。占者謂其壽短。二親哀之。卽爲姻媾。旣非本願。遂逃亡山澤。莫知所造。但念觀音。值一人告曰。西行有寺。不遠當至。尋聞鐘聲。忽見僧寺。因求剃落。便遂本心。卽遣出門。行可百步。迴望不見。久乃天明。高僧傳二集

▲中印度羯若鞠闍國王子喜增。將嗣王位。於旃伽河岸觀自在菩薩像前。斷食祈請。感菩薩現形。諭以興隆佛法。慈悲爲懷。不久當王五印度境。王子受教卽位。號曰戒日。廣弘佛法。勤修善政。時唐玄奘法師曾受戒日王之請。親至彼國。西域記

▲唐釋僧忍。俗姓史氏。沛國陳留人。讀大悲經。究尋四十二臂。至無畏手。疑而結壇。浹旬禱請。自空中現其正印。雙手歷歷可觀。遂命畫工繪寫此臂焉。或有議謗者。忍再精懇虔告。畫工濯筆銅椀中。忽感寶性花一朵。枝葉鮮明。觀者驚歎。高僧傳三集

▲唐陳玄範妻張氏。精心奉佛。恆願自造觀音像。終身供養。力不能從。專心日久。忽見觀世音金像。光彩輝煌。長五尺許。現於高座。衆歎其精感所致。辨正論

▲唐文宗嗜蛤蜊。東南沿海頻年入貢。民不勝苦。一日。御庖獲一巨蛤。刀劈不開。扣之乃張。中有觀音梵相。帝愕然。命以金飾檀香盒貯焉。後問之恆正禪師。師曰。物無虛應。乃啓陛下信心。以節

用愛人耳。經云。應以菩薩身得度者。卽現菩薩身而爲說法。帝曰。見菩薩身矣。未聞說法。師曰。陛下信否。帝曰。焉敢不信。師曰。如此陛下聞其說法竟。帝大悅悟。永戒食蛤。因詔天下寺院。各立觀

音像。高僧傳三集及普陀山志

▲唐文宗御膳烹雞卵。忽聞鼎中羣呼觀世音菩薩。悽愴之甚。監宰以聞。帝遣驗之。果然。歎曰。吾不知佛道神力。乃能若是。敕自今不得用雞卵。宣室志及感應篇傳

▲五代梁貞明二年。日本僧慧鏢。從五臺山得觀音像。將還本國。舟觸新螺礁。蓮花當洋。舟蔽不前。鏢禱曰。使我國衆生無緣見佛。當從所向建立精藍。有頃舟行。竟止潮音洞下。居民張氏目覩斯異。遂舍所居。築庵奉之。呼爲不肯去觀音院。普陀山志

▲宋普明禪師。崇甯二年。八月旣望。在上天竺獨坐期堂。三月已滿。忽見一老僧云。汝當三乘演暢。頓漸齊行。便可廣度羣情。汝若如此。方報佛恩。師問將何法度人。僧云。吾觀此土人。與觀世音夙有因緣。可將菩薩行狀。略說本末。流行於世。供養持念者。福不唐捐。於是盡宣其由。言已。隱身而去。師因編觀音本行經。編成。忽觀世音菩薩現紫金相。手提淨瓶綠柳。在彩雲中。良久而滅。衆人皆見。罔不頂禮讚歎。觀世音本行經序

▲宋俞集。溧水人。宣和中。赴任興化尉。挈家舟行。淮上多蚌蛤。舟人日買食之。集見輒買。放諸江。偶見一筐甚重。衆欲烹食。集倍價償之。不可。遂寘釜中。忽大聲從釜起。光燄上騰。舟人恐。啓視之。一大蚌裂開。殼間現觀世音像。傍有竹兩竿。相好端嚴。衣冠瓔珞。及竹葉枝幹。皆細珠綴成。集令舟中皆誦佛號悔罪。取殼歸家供奉焉。感應篇傳

▲宋倭使入貢。船泊普陀洋。見觀音靈異。欲載入彼國。臨行。風浪大作。滿洋開鐵蓮華。風濤甚烈。船不能前。倭懼而還之。故名蓮華洋。又中官王貴等。奉旨齎送華幡寶香詣山。心竊自疑云。汪洋巨浸中。菩薩安在。皆人自妄信耳。方解維。滿海生鐵蓮華。風濤洶湧。舟不能行。衆人望山。號呼叩頭。風浪稍平。輒有白牛。隔山浮至。盡食其華。舟始可移。已而牛返水際。化爲白石。至今存焉。故名其地爲石牛港。觀音感應傳

▲元世祖至元十三年。丞相伯顏定江南。部帥哈喇歹至普陀山。進謁潮音洞。杳無所見。乃張弓引矢。射洞而迴。及登舟。忽見蓮花滿洋面。驚異悔謝。返山禱洞中。徐見白衣大士童子。綽約而過。於是莊嚴聖像。併構造殿宇於洞上。普陀山志

▲元成宗大德五年。集賢學士張逢山。詣潮音洞。見觀音大士相髻鬢在洞壁間。次至善財洞。童

子倏現於頂上瑞雲中。復覩大士寶冠瓔珞。手執楊枝。護法諸神。翼衛於前。張率衆作禮。祥光滿

洞。良久乃隱。觀音感應集

▲元妙嚴公主拜。雙趺隱隱。幾透軛背。此項神物。存潭柘寺。相傳妙嚴乃元世祖女。剪髮修淨業於此。日禮觀音大士不輟。時炳靈異。明萬曆壬辰。孝定皇太后聞之。欲求瞻禮。勅備花梨盒。迎

入大內。未幾。仍送還寺。宸垣志餘

▲明常熟畧里村媪。平居持齋念佛。甚虔篤。其子食力於黃時雨觀察家。萬曆甲寅秋。媪年六十有五。病將逝。索新裙不得。命取常著舊藍布裙。曝之中庭。其裙衣裏十二幅。須臾現出十二面觀

音像。每幅變相不同。竹林鸚鵡。各極生動之致。經一晝夜。媪化去。乃滅。徧村人皆見之。海南一勺

▲南郭顧善人家。素事佛。丙申六月十九日。大士現像於竹簾上。儀容儼然。觀者如堵。無何。有媯之者。相忽不見。善人追慕之。乃倩工繪其像。申供養焉。省庵禪師遺書

▲藍千秋迴龍庵記略云。江西宜黃水經博溪。溪北一洲。湧於中流。延袤不及一里。水四面環之。昔有人從宜黃舟載大士像往郡。至此舟重不前。卜於像曰。菩薩欲留此建刹耶。果得吉。里人構屋。供像其中。地非高阜。水暴漲。不能及寺址。咸異之。臨川縣志

▲清順治初年。海寇阮俊與日本僧合謀。將明萬曆四十九年所賜之大藏經載往日本。山僧照中。率數百人至舟山。哀求不已。阮怒曰。汝欲得經。當向龍宮水府求之。遂裝運東洋。舟至海面。大魚攔舟。不得動者數日。阮乃悔過。亟返。不半日。舟達道頭。僧衆得此消息。歡迎法寶。仍安藏殿。普陀

志山

▲清康熙三十年。茶山寶稱庵僧慧如。因大士像損壞。載募雲間。月餘無施者。一日夜深。私置中丞王公儼齋之門。是夕袁夫人夢一婦人。素衣淡妝。云自普陀來化衣。夫人告公。公亦得是夢。次早問闍人。知爲大士也。呼僧入。許爲新像。送至山中。普陀山志

▲清僧行義。由長安薦福寺。至定海普陀山。偕雲水僧七人。雨中炷香潮音洞。虔禱。願覩大士慈容。忽見洞中現五色光。光中有大士立像。旁有白鸚鵡像。莊嚴妙好。他僧見者。種種不一。久之乃隱。王漁洋於行義歸途相遇。因知備細。遂廣傳揚。居易錄

▲吳天章說。直隸滄州人張漢儒。嘗患大病。彌留。夢三梵僧以手三摩其腹。立愈。遂發願謁四名山。至普陀。謁大士畢。欲歸。見一老人於洞外掃除。因與語。曰。若遠來。甯欲見大士乎。張曰。四千里至此。得見大士。死無憾。然大士安得見。老人曰。但虔禱。當有所覩。張乃與同輩十餘人。跪禱久之。

忽見洞口有金光。老人曰。大士出矣。衆諦視。果見大士自石壁中出。唯見側面。又禱曰。既蒙大士現身。願覩正面頂禮。以便歸去摹塑尊像。大士卽又背洞面海。去人咫尺。紺髮卷鬚。高顴隆準。衣綠色。半身在雲氣中。不可見。衆歡喜稽首。一舉頭頃。入石壁中去矣。老人云。始余亦以得遇大士現身。故捨身於此。供灑掃之役。在此日久。屢見聖容。按耶瑛類纂。載元張光弼普陀山觀世音善財應現詩。蓋自昔有之矣。居易錄

▲梁寶誌大士。俗稱誌公。七歲。依鍾山僧儉出家。專修禪觀。宋太始初。漸現異迹。梁武帝甚敬禮之。嘗命張僧繇寫像。誌髻面出。十一面觀音。妙相殊麗。或慈或威。繇不能寫。陳征虜舉家事誌。爲現真形。光相如菩薩。其他靈跡。不可勝紀。高僧傳初集

▲洱海叢談載觀音七化。一、唐永徽間。化白鬚老人。戴紅蓮瓣冠。披袈裟。持鉢至蒙舍今雲南蒙化縣細

邏農家乞食。二、化梵僧持鉢。向饑婦乞食。三、化梵僧坐巍寶山磐石。前有青牛。左有白馬。朱鬣。右有白象。周遭覆五色雲。雲中二童子。一執鐵杖。一執方鏡。耕樵共見。良久。昇雲中而隱。四、南詔王蒙邏晟時。化一僧持杖擊鉢。牽白犬乞食。開南郡村民素爲盜。惡犬乃執僧支解之。須臾復生。談笑自若。民又害之。焚其骨爲灰。貯以竹筒。沈於波心。須臾。僧裂竹而出。形體無損。一村驚懼歸依。

五、化僧執楊枝。足躡木屐。向山而行。王樂等走馬逐之。不及。彎弓射之。箭皆化爲蓮花。六、化聖僧行化。至李作靈之界。騰空化爲觀音像。衆目眩光芒。不敢仰視。有老人云。吾能鑄此。乃範金肖像。至今奉祀。七、化西域僧菩提陁訶。蒙保和二年。入國。云吾西域蓮花部尊者阿嗟耶觀音。行化至汝國。於今何在。語訖。入定化去。卽觀音化身也。

▲唐僧伽大師。西域人。龍朔初。來遊此土。於安徽泗州臨淮縣信義坊。乞地立標。將創伽藍。標下掘得古香積寺銘記。并金像一尊。上有普照王佛四字。遂建寺焉。景龍二年。中宗遣使迎師入內。尊爲國師。尋出居薦福寺。常獨處一室。其頂有穴。恆以絮塞之。夜則去絮。香從頂出。芳馥非常。至曉。香還入頂。師常濯足。人取其水飲之。痼疾皆愈。一日。帝於內殿語師曰。京畿數月無雨。願慈悲解朕憂。師乃將瓶水。泛灑空中。俄頃。甘雨大降。帝甚喜。詔賜所修寺額。師請以普照王爲名。帝欲避天后廟諱。乃改普光王寺。景龍四年三月二日。坐化於長安薦福寺。今塔現存臨淮。後中宗問萬迴曰。僧伽大師何人。萬迴曰。乃觀音化身也。如普門品云。應以比丘比丘尼等身得度者。卽皆現之。而爲說法是也。師初至長安。萬迴禮謁甚恭。師拍其首曰。小子何故久留。可行矣。及師遷化後。不數月。萬迴亦灑然脫化。師化跡甚多。具載本傳。高僧傳三集

▲唐馬郎婦。出陝右。此地俗習騎射。不知有三寶名。元和十二年。忽有美女挈籃鬻魚。人競欲娶之。女曰。有一夕能誦普門品者。則吾歸之。黎明能誦者二十餘輩。復授以金剛般若。能誦猶十人。乃更授法華經。期以三日通徹。獨馬氏子能之。乃具禮迎歸。入門。女稱疾求止別房。須臾便死。體卽爛壞。遂瘞焉。數日。有紫衣老僧至葬所。命啓視。惟黃金鎖子骨而已。謂衆曰。此觀音大士憫汝輩障重。故垂方便。示現以化汝等。言訖。飛空而去。觀音感應傳

▲唐釋惠寬。俗姓楊。益州綿竹人。相傳爲觀音十世應身。生有異相。隨聞經律。一覽無遺。未聞之經。有難問者。皆爲通之。綿竹俗信外道。經寬教化。並捨邪歸正。瑞應不可勝紀。高僧傳二集及石門文字禪

▲唐道翊禪師。石晉天福四年。卓菴天竺山西北。草衣木食。高行絕塵。一夕。見前峯有光燭天。跡而視之。得異木焉。命匠人刻爲觀音大士像。夜夢白衣人曰。雕像已就。明日。有僧自洛陽來。隨身有古佛舍利。當求之。已而僧果至。如夢求之。得舍利三顆。納於大士頂門。其後舍利常現於頂冠肉髻。白光煥發。靈異大著。武林高僧事略

▲石晉天福間。僧道翊自陝西終南山至武林山內上天竺。結廬西峯。見瑞光發於前澗。覓得神木。高數尺。命刻工孔仁謙造大士像。聖像旣成。妙相莊嚴。白光煥發。夜亡列燭之光。晝掩太陽之

影。遠近崇信。天竺志

▲宋杭州雷峯慧才法師。於元豐元年三月。爲靈芝元照等道俗千人。授菩薩戒。羯磨之際。見觀音像放光。講堂大明。淨慈法眞禪師守一作戒光記。當時書畫家米元章書此記。辯才法師立石於龍井。以垂久遠。佛祖統紀

▲宋王琰。稚歲流寓交阯。彼土有賢法師者。道德僧也。見琰。授以五戒。贈與觀世音菩薩金像一尊。令琰供養。琰奉以還都。與二弟常盡誠敬。精勤不怠。後治改敝廬。無屋安尊像。寄京師南澗寺中。時人民競鑄錢。有盜毀金像以充鑄者。像在寺已數月。一日琰晝寢。夢像立於坐隅。意甚異之。時已日暮。卽馳往迎像還。是夜南澗寺十餘金像。悉遇盜亡失。未幾。此觀世音金像。忽於黑夜放光顯照。三尺許地。金輝秀起。煥然奪目。琰兄弟及僕役同覩者十餘人。冥祥記

▲元末至正二十年。杭城罹兵燹。西山寺宇盡燬。聖像不知所在。衆共追慕。丞相康里公出金旁求。乃於草莽中得之。遂卜日齋戒。徒步率僚佐士庶。自北關門恭迎聖像。安奉清平山之西天寺中。時聖像大放光明。照耀雲漢。分爲三道。其一遠屬東方。若向普陀山者。其一屬上天竺寺。其一徑屬今西天寺。一時咸睹。彌深欽仰。天竺志

▲清康熙五十年五月初一日。知府馬柱石到普陀山。啓建祝釐道場。感大士放金光。大圓光於清涼山岡。移時方散。兩寺住持有偈志其事。普陀山志

▲清張明達。順德人。母鄧氏。屢產不育。因禱觀音大士而娠。誕日。滿室光發。長未五歲而母亡。祖母余氏。撫之猶晚子。祖母臨終。私遺白金數鎰。值戊子歲荒。達以遺金施賑。全活無數。有讒於其父。寃以私竊家財者。達不辯也。後有從乞者。達以財贖。致虛彼求。逾日饑困而絕。達私念我以福薄。不能救彼危急。因願捨身。託身王家。博施濟衆。便登本處觀音巖。哀禮大士。證明加被。卽向數百仞懸崖。投身而下。不覺墮在山跟石上。穩然坐下。毫無傷損。自是持齋。發出塵之念。年十七。向父陳請出家。父怒責之。退思不已。惟專念大士。復求於祖父。祖父諭其父而俯允之。然猶有留難。越旬日。中夜夢白衣人。語曰。佛子行矣。母負好時也。達倏起出戶。時衢巷門闔。悉皆洞開。天雨晦暝。前途不辨。獨有數螢。傍達低昂。因逐之前進。經十餘里。始開曉。遂投鼎湖和尚。薙染。名曰開誦。居無幾。忽嬰沉疾。一日。神色俱變。息去不還。見者咸謂不起。誦唯一心正念。良久忽甦。以漸平復。知大士之冥加。因肅誠倩繪千手聖像奉事。繪像時。結壇持呪。日必更衣沐浴。畫者以紙兜掩氣。采色不用牛膠墨類。至於紙筆。各各皆加持呪法。像成之夕。大放光明。壇外林壁。金色晃耀。見者

莫不驚歎。觀音慈
林集

▲清釋弘贊。年十八。失怙恃。聞說持齋能資冥福。遂斷葷食。後閱六祖壇經。有所感悟。知人能作佛。於是出家。冀立身行道。以益先靈。每晨夕必禮懺。逢盂蘭。必追薦。丁酉春。以西洋白氈。繪千手千眼大悲聖像。舉高七尺。屏除皮膠。而用香汁和彩。仍令畫者每日沐浴更衣。像成。罄衣鉢資。延集僧衆。先爲講說大悲懺法宗趣。次乃三七日修禮。遂感大士身放金色光。手所執青紅二蓮花。頻放光異。縑素咸覩。異口同聲。嘆爲希有。爾後凡於像前修禮。蓮花白光常湧。見者莫不欣發大信焉。弘贊由是尋究三藏。檢諸傳記。據所見聞。編成觀音慈林集三卷。觀音慈
林集記

觀世音菩薩。於往劫中。久已成佛。號正法明。但以慈悲心切。雖則安住常寂光土。而復垂形實報。方便同居三土。雖則常現佛身。而復普現菩薩緣覺聲聞及人天六道之身。雖則常侍彌陀。而復普於十方無盡法界。普現色身。所謂但有益。無不興崇。應以何身得度者。卽現何身而爲說法。普陀山者。乃菩薩應迹之處。欲令衆生投誠有地。示迹此山。豈菩薩唯在普陀。不在他處乎。一月麗天。萬川影現。卽小而一勺一滴水中。各各皆現全月。若水昏而動。則月影便不分明矣。衆生之心如水。若一心專念菩薩。菩薩卽於念時。便令冥顯獲益。若心不

志誠不專一。則便難蒙救護矣。此義甚深。當看印光文鈔中。石印普陀山志序自知。名觀世音者。以菩薩因中由觀聞性而證圓通。果上由觀衆生稱名之音聲而施救護。故名爲觀世音也。普門者。以菩薩道大無方。普隨一切衆生根性。令其就路還家。不獨立一門。如世病有千般。則藥有萬品。不執定一法。隨於彼之所迷。及彼之易悟處。而點示之。如六根六塵六識七大。各各皆可獲證圓通。以故法法頭頭。皆爲出生死成正覺之門。故名普門也。若菩薩唯在南海。則不足以爲普矣。印光法師覆
鄺隱叟書

每日除了己職分外。專心念佛名號。朝暮佛前竭誠盡敬。懇到懺悔無始宿業。如是久之。當有不思議利益。得於不知不覺中。法華經云。若有衆生。多於淫欲。常念恭敬觀世音菩薩。便得離欲。瞋恚愚癡亦然。是知能至誠念彌陀觀音聖號者。貪瞋癡三惑自可消除也。又現今乃患難世道。須於念佛外。加念觀音聖號。冥冥中自有不可思議之轉迴。庶不至宿業現前。無法躲脫耳。印光法師復甬
江某居士書

●治肺病一良方

蕪菜佐膳久之自愈（此菜多產江浙湖澤中葉橢圓莖及葉背皆有黏液作羹甚美若治病勿同葷菜煮）枇杷葉去毛煎茶日日飲之一月後大便中見小蟲即愈

觀音靈感近聞錄

李 圓 淨 編

▲曹翰亭夫婦。向持大悲呪。民國十五年夏。翰亭患痢。一晝夜至二百餘次。數日水米不進。勢已危殆。羣醫束手。梓修居士勸其專持大悲呪。虔求加被。翰亭即在枕上默持。其婦則焚香朗誦。當夜即酣睡未瀉。次晨大便一次。病即滅。旋亦痊癒。王幼農記。

▲余胞姊昌和。適孫氏。在諦閑法師座下。受三皈依。常誦大悲呪。冬間。指上忽患千年瘡。形似螺螄肉。觸之痛入心肺。後來余處醫治。不效。徧求他醫。亦無效。心頗憂之。今春三月。赴普陀進香。至山巔。見一女醫。面皺髮白。貌若六十許人。坐地上賣藥。爲人治病。皆立瘥。男女環繞。途爲之塞。姊亦請醫。女醫向姊指上。持大悲呪一徧。與丸三粒。云汝還家。買放螺螄一元。三日可愈。姊禮佛畢。歸家。即以一元買放螺螄。至第三日。坐人力車。爲一身穿白衣人之袖口。在姊指上一擦而過。略覺疼痛。而所患之千年瘡。已不知去向矣。四月初旬來湘。余目覩其異。且無裂痕。足徵菩薩之靈感。實有不可思議者。故特誌之。周頌堯記。

▲李懷瑾。江蘇睢甯北鄉車家店人。素業農。習科舉未能成名。清末學堂興。改研醫。忽被惡風所吹。雙瞳反背。經歷年許。刀圭罔效。李自分罄廢終身矣。一日。憶某書載。無垢清淨光。慧日破諸闇。能伏災風火。普明照世間。四句偈。治眼疾有靈驗。我何不至誠誦之。乃設香案。以豆記數。每日出日中。日入三時。各跪誦三百遍。誦至九十餘日。見孟子二字。如車輪大。益誠懇精進。未及半載。兩目平復如本。民國六年冬月。李聞予自滬旋里。專誠來謁。具道所以。予曰。汝所誦。乃妙法蓮華經。觀世音菩薩普門品偈語也。經云。聞妙法蓮華經一句一偈。悉當成佛。汝之功德。已不可思議。倘能進而受持全品。或全經。綿綿不已。現生即當超凡入聖矣。李聞言大喜。予乃檢普門品一卷授之。李信受而去。現在津浦鐵路明光鎮。開藥肆以爲生。誦經不輟。丁卯五月。郭寅皋記。

▲張紹先。江蘇邳縣舊城市人。家道式微。僅給饘粥。幼習舉業。碌碌無所短長。惟於周易河圖洛書先後天八卦之理。研究深刻。喜靜坐。好談因果。酷嗜感應篇。陰騭文等。日必誦若干遍。里中惡少年。有呼之爲迷信者。不顧也。民國六年後。輾轉習得大悲咒。金剛經。歡喜無量。民國十一年春夏之交。瘟疫流行。張受傳染。忽昏去。恍惚間。見有穿僧衣道衣。及如王者三人。諭之曰。汝未合來此。速回去。一人問之曰。汝所習經。尙能記憶否。曰能。曰何不誦之以曉世人乎。伊曰諾。乃朗誦所

習之感應篇、陰騭文、大悲呪、金剛經等如貫珠。終而復始。聲徹里許。觀者雲集。歷兩日一夜。汗出如瀋。病愈而蘇。蘇後髮如髻。壯健異常。張今年五十三歲。夏初來見予。促膝談五日。予爲之剖解。普門品及彌陀經大意。并分別娑婆極樂之旨趣。大生歡喜。遂以大悲呪、普門品、金剛經、彌陀經、爲日課焉。丁卯五月郭寅皋記。

▲陸福廷。安徽靈璧雙溝鎮人。國民革命軍總司令部交通處長。家世書香。弈代孝友。幼常夢在廟中經行。婚後。其母太夫人病。斷指和藥以進。病頓瘳。某夜。夢一姥告之曰。汝母本不久人世。因汝誠心感格。延壽半載。以慰汝兄弟孝思。計自得病日起。至歿之日。凡七個月十天。與夢相符。陸于民國六年遇善知識。教以受持觀音名號。屢經戰陣。化險爲夷。敬信倍加增長也。丁卯五月郭寅皋記。

▲江蘇常熟趙氏。民國十二年春二月。與其兒婦隨里人至杭州上天竺進香。歸途。夢其孫在家患病。勢甚沉重。及至家。孫果病危。氏家人口甚衰。止此幼童。氏惶急仆地。不省人事。鄰人咸集。爭相營救。氏既蘇醒。搥胸曰。吾家止恃此孫。以撐門戶。孫危。吾命休矣。今惟有仰懇觀世音菩薩。慈悲援救耳。卽煮湯水。至菩薩像前。焚香叩禱。氏暗自慰。以爲孫兒飲此。必能轉機。時孫方灼熱。迨

進湯後。汗出病除。果如所料。鄰里驚傳。趙氏至誠籲呼。故捷得感應如此。

尊時室
筆記

▲吾宗六十四世祖程文姚公。字星若。昆季六。公最幼。祖妣余多弟孺人。沱川女。仁慈賢淑。妯娌間以公體弱。常私語曰。小郎恐難永年。姊在此恐作客耳。孺人置若罔聞。惟供養大士聖像於樓上。焚香禮拜。誓長齋以保夫壽。後公體轉健。壽至七十餘。并舉五丈夫子。今支裔猶於元旦除夕茹素。因遺命未能長齋者。須持年頭年尾兩日也。事載邑志賢淑門。程筱鵬記。

▲汪瑞嬋女士。婺源裔村人。僑居滬。未字時。卽供奉觀音。茹素。後歸同邑鳳騰程書堂公。虔奉如前。公五十九歲時。在滬患血症。每吐必傾盆。女士爲禱於道前街水仙宮大士前。兼發心持戒。公病漸愈。伊子紫東幼時。鼻常流血。甚險。忽夢見一戴冠者爲之診脈。醒而漸瘳。程筱鵬記。

▲上海佛教居士林每夜通俗宣講。概由各居士輪流擔任。某夜。值楊欣蓮居士主講。適患喉痛音啞。而不肯告假。將講時。先向觀音大士前拜禱。登台後。所患霍然若失。聲如洪鐘焉。居士
林刊

▲沈鮑淑和。體氣素弱。戊辰九月。懷孕將分娩。其父明蓮居士深憂之。乃於九月二十三、四兩日。早課時。至誠稱觀世音菩薩聖號。二十四午夜。見觀世音菩薩。授以蛋二枚。淑和受之。兒卽下地。

▲張奉賢。任十二圩鹽務稽核支所司秤。其妻懷孕數月。忽患癱軟。終日在牀。不進飲食。夜不安眠。圩地固無良醫。亦莫識病之所由。予聞之。送白衣咒一本。勸其至心持之。當獲靈感。張君回家。便焚香念誦。其妻當夜便能安睡。閱兩星期。飲食便進。癱病亦漸愈。起床行走。今則身體完全復元。非藉大悲之力。烏能如是。融空記。居士林刊。

▲杭州陳曼自述。余母中年操勞過度。三十後。得胃痛疾。發時胸腹脹滿。疼痛異常。甚至饘粥不入口。嗣延某醫。屢進極煖之劑。疾稍已。仍數日一發。母歎曰。余將遂以此終乎。余聞之。志忤不已。百端慰之。延至壬戌之冬。疾猶時作時止。一如故態。而藥亦竟不驗矣。偶於書篋中檢得金剛經。閱之。中謂受持此經者功德無量。因於蕪邑。請得金剛經與心經合本而歸。專供讀誦。并勸母受持。時余姨母亦憊憊之。因同發願。誓畢此經。余爲日授數句。乃至數十句。既卒業。又授心經。悉一一讀誦通利。余母之疾。霍然良已。竟不知於何時去其體也。自是年餘。而母之精力。日益強健。不類故態矣。敬信日深。更誦阿彌陀經。執持彌陀聖號。發願往生焉。居士林刊。

▲唐瑞庭族兄。向有便血病。初時服藥。愈而復發。積至兩三年。體氣漸衰。病發而藥不效。每大便時。鮮血淋漓。痛如刀刺。一日予自金龍山養靜歸。遇諸塗。談及痛苦。予因語曰。但從今日起。卽時

發心皈依觀世音菩薩。每日早晚跪像前。念菩薩名約一枝香久。餘時行住坐臥皆念。試行十日。定當見效。君聞言大喜。即日歸家照行。未越三日。前病痊愈。亦終不再發。君自此感菩薩大恩。常念不間。至今健康踰恆矣。唐大圓記。

▲族人田夫某。因事外出未歸。其妻蕭氏。與鄰居寡婦某。因口角相鬪。寡婦子助之毆。蕭氏受重傷。越三日。偃息在床。不飲不食。蕭本大族。寡婦知事急。遂泣投繯。被救得不死。其族無不慄慄危懼。男女相對環泣。余聞此變。思救蕭氏一人。可活數口。因爲焚香跪觀音菩薩像前。發至誠心。求大悲水一碗。使人持去。至則唇齒堅閉。僅有微息。以箸啓其齒。下水半杯許。食頃。卽開口說渴欲飲水。遂以碗水飲之。比夜漸鬆。翌晨能起坐食粥碗餘。予復求水一碗。方二日。起居飲食如常。於是人人感歎。發起信心。凡菩薩慈悲度生。其事之至艱危者。其發心必誠切。則其爲靈感也。捷如影響。屢試屢驗矣。或專念名號。或誦大悲呪。加持淨水。或念心經普門品等。皆有奇效。而予恆以持名及大悲水。所救濟甚衆。右述二則。尤奇而速。足以啓世人之正信也。唐大圓記。

▲錢永汀。曹行鄉河塔廟人。素以造屋翻樣爲業。遷居曹行鎮東南陳宅。與舍間相距數百武。賦性忠厚。行事不苟。後因日疾棄業。至誠茹素念佛。日疾得痊。於大悲呪。奉持尤虔。每日早課後拜。

誦一遍。寒暑不改。民國十四年九月初七日。由喬智如居士介紹。同余求滬上太平寺印光法師授三皈。依戒法名智懋。其妻蔣氏。素不信佛。每當作課。輒爲阻撓。十五年正月。蔣夢婦人抱一女。孩送之。不納。婦人堅與之。自後懷孕。迨產。果女也。遂不復誹謗。尤可異者。女自出胎。母若於食葷後。卽哺之乳。則嘔瀉立作。後乳上生癰數處。智懋誦大悲咒於淨白紙。貼患處。癰立消。惟一處不效。潰而流乳不止。醫者敷以良藥。爲乳湧去。蔣驚惶無措。趨至佛室。面佛合掌跪拜。取爐內香灰。少許敷之。如波之乳立止。蔣益驚佛之靈驗。願持觀音齋。而念佛矣。然以生女故。常懷不愜。十六年夏五月。又夢婦人謂曰。生女不愜汝懷。余來易之。越數日。女果病寒。發疹泄瀉。其勢險劇。似無生理。智懋甚恐。以爲年近不惑。倘果易之。再舉一子。徒增煩惱。且年將不及矣。乃堅求大士勿易。虔誦呪水。與女服之。不效。又在居士前發願放生。亦不效。乃爲其妻發持長齋願。遂效。蔣氏從茲亦進持長齋矣。金智勉記。

▲翟文選。任職東三省鹽運使。自述云。民國十四年夏。家母在籍患足疾。纏綿至七月中旬未愈。西醫診之。謂爲腎臟炎。勢甚危險。余牽於職事。未能回籍省視。倉皇無措。閱觀音靈異紀。見白衣觀音呪靈感異常。因同全家在觀音前發誓。朝夕虔誦。並施送靈異紀。及了凡四訓各五百卷。默

求佑護。此夏曆七月十四日事也。嗣得家書。知家母日見痊可。余旋於中秋節後。脫身回里。家母告云。七月中旬某夜。痛正難忍。忽見由堂屋來一白衣人。身量甚大。走入室內。惟時電燈未滅。驚駭而呼。家人齊至。倏已不見。是夜。足間奇癢。次早。腫消大半。未及旬餘。步履如常矣。蓋家母夜見白衣之時。正余在營口署中發願誦經之期。並未作書稟告。而家中感此靈異。以七十高年。病延數月。得此意外奇效。不日而愈。非蒙佛佑。曷克臻此。因再發願施送靈異紀二千冊。了凡四訓一千冊。並述此靈感。附印於靈異紀後。以堅信仰云。觀音靈異紀

▲乙丑夏。余之第五女病重。自恐不起。處分後事畢。忽牙關急閉。不能言語。亦不飲食。其母在危急之際。默禱觀世音菩薩。乞救之。俄而吾子大呼曰。速開房中窗。觀世音來矣。曳其妹夫潘杜若跪地迎接。兒叩首起。捧一杯清水。用匙開五女牙關。灌入喉中。未幾。五女吐痰及雜物不少。神識遂清。兒又進以水果一枚。五女食後。病勢頓減。兒又呼曰。觀世音菩薩去矣。速焚香叩送。遂與潘壻下樓至庭中。焚香拜謝。兒返至樓梯旁。忽自言曰。我方自外來。天氣甚熱。殊不可耐。旁人以前事問之。兒竟茫然不知。而五女之病。從此愈矣。設非觀世音菩薩特顯靈異。何以得轉危爲安如是之迅捷耶。此事闔家之人。衆目共覩。信而有徵。爰泚筆記之。以彰聖蹟。以堅信仰。丙寅夏陸欽

章謹識於北京西拴馬椿寓廬。

▲丙寅秋。潘杜若供職奉天。忽患膝眼風。且有寒熱。飲食少進。夜不能寐。呼痛不止。時五女在天津。得急電。赴奉侍疾。疊延西醫治之。無效。乃電招吾兒往診。舌苔黑而乾。煩躁異常。遂改服中藥。並求觀世音菩薩救護。立願印送觀音靈異紀五百本。夏曆八月二十三日夜半。房中忽聞異香滿室。兒與五女焚香跪求。未幾。左足稍能運動。香亦漸散。二十四日。病狀仍舊。二十五日夜後。又聞異香。兒與五女復虔誠祈求。並施手術。舉杜若左腿。左右上下。旋轉數次。從此可以自由伸縮。熱漸退。腫亦漸消矣。當杜若病重時。面色黧黑。神識昏迷。時時暴怒。甚或毆人。至二十七日而精神復舊。飲食漸增。並得安眠。危險之期已過。去年五女獲救。事實見前。今年杜若又獲救。何潘氏夫婦若是之有緣耶。豈五女常念觀音經。有以感召之耶。而皆假手於吾兒。則更奇已。然而起死回生。靈應顯著。固非憑空結撰捕風捉影之可比也。爰再記之。以見觀音菩薩之拯救世人。不知凡幾。特無人爲之記載。則亦湮沒不聞矣。兒自奉回。述潘氏夫婦二人之意。乞我爲文。表彰聖跡。故敬記之如左。中華民國十五年十月。陸欽章謹識於天津寓廬。

▲張星元。湖南長沙縣人。北京香山慈幼院學生。年十八。患腦神經衰弱及肺結核症。不眠。咯血。

甚劇。醫者束手。咸以爲不治。院長熊公希齡憂之。命余護送至城南龍泉寺暫住。冀其療養之餘。稍聞佛法。爲懺悔夙障地也。張生日聆寺主明淨法師暨孤兒院院長圓持和尚之教。遂發願持誦觀世音經。以求慈護。某日晝寢。夢一異人。體殊修偉。持藥令服。雖在夢中。以素昧平生。堅不肯從。強之再三。勉飲少許。及醒。身體輕適。沈疴頓釋。未期月。飲食步履。竟如平時。見者莫不稱異。謂非菩薩垂佑。其可得乎。民國十五年丙寅秋。無錫萬鈞謹記。

▲江易園居士云。持念觀世音菩薩名號及經咒。或供養禮拜。靈應甚多。予親見目疾獲愈者二事。其一外舅父汪士林翁年七十餘。病目。白翳六七。叢集黑珠。施藥無效。醫言必瞎。後得善知識教。每日取淨水一盃。以口向水。念南無觀世音菩薩若干聲。送近處河內。翳漸退。凡十餘日。退盡。而目疾全愈矣。其一外舅父之族弟蔭芳翁年七十餘。曩商於江西饒州。慷慨好義。辛亥光復。營業大損。憂鬱所迫。雙目忽盲。雖赤日當天。如在深夜。八年矣。已未余歸婺源。謁翁。勸茹六齋。日素戒殺。供養禮拜。持念觀世音菩薩名號。並千手千眼大悲神呪。心作觀想。大士放光照身。使我眼光復現。當堅信我如是語。眼必復明。勿稍疑貳。翁行之甚誠。一年紅膜盡退。復勸翁念觀音大士普門品之四句偈。偈云。無垢清淨光。慧日破諸闇。能伏災風火。普明照世間。月餘。復謁翁。翁視予

面喜曰。君風采甚佳。試以寸大楷書。了了能讀。今往來村中。酬應如常。翁言。自分此生不復得見天日。今及此。非意料所及。真大士恩賜也。發願重修村中觀音閣。以報慈恩焉。佛光社刊

▲南通張齋庵先生撰觀音岩記。言其夫人以求子嗣禱於狼山觀音岩。旋夢老嫗。縑兒授之而生子。滬上名醫夏君蔭棠爲予言。渠二十餘歲時。懸壺海上。而患肺病。咯血甚劇。數年不愈。其尊翁許願往禮天竺。禱於觀音。是時尙無鐵路。趁航船以行。同舟一僧。問以往杭何幹。告以爲子祈病愈。僧授藥草一裹。言三服病當愈。翁歸以藥授子令服。而夏君以不辨何物不敢服。數日後。翁詢知藥未服。怒甚。夏君乃煎服之。其湯無色無香無味。兩服後病竟已。自後血不再發。肺病自此健愈。一日。有邑紳延之診其女。適夏君赴閔行鎮應診。紳家頻遣人來問。家人詢爲咯血。告之曰。我家醫生患此數年。無法自療。乃服一僧所給藥而愈。今餘一服在此。曷持往試服之。紳家如言。服藥竟愈。夏君言。其草平淡而奏效若此之神。殆非藥力。僧當爲觀音示現耳。予亡室蕭夫人素禮拜觀音甚虔。每旬逢九持觀音齋。忽病子癩。胎墮後。血竭氣欲絕。口不能言。眼盲不能視。予守視臥榻旁。憂悶甚苦。忽聞急呼。詢予何在。曰。觀音菩薩在此矣。以手指窗際。呼予與子速拜。自是清醒能言。謂見觀音相貌甚清晰。所着袍。滿繡卍字紋云。目亦漸有光。旋卽復常。近日妹夫張子

武從喇嘛白尊者學三字真言。持咒時。輒虛室發光。屢函告予。予以不可著相告之。然渠之光日有增進。乃至不持咒時。夜亦發光。仍屢函予。堅囑陪舍妹往學咒。妹耳下有小瘤。欲乞尊者治之。予遂偕之往。尊者教持觀音心咒。卽六字大明呪。久之瘤當消。惟頰下有腫處。乃大毒。當潰。持呪可愈。毋懼也。妹歸。訪西醫。稱爲多頭疔。最毒。甚者致命。又訪中醫。言虎鬚疔。重症也。妹頗惶恐。專心持呪。三日疔潰。疔頭數顆皆出。次日卽能起床出門。以示予。則白肉光平。並無瘡痕。其愈合之神速。不得謂非呪力矣。又聞余壽平中丞。去年患中風。其公子某求白尊者。亦授以此呪。與家人共持念。數月而能言語行動。今能出門矣。民國十六年春。聶雲臺記。

▲拙荆鍾氏。法名蓮帆。民國十八年六月廿二夜半。猝患霍亂。嘔吐二十餘次。腹瀉三四十次。時在宵深。手足無措。施以手術。並服痧藥。毫不見效。形狀甚危。其時產後未滿兩月。予於無法中。默持大士名號。與大悲呪。並教病人亦默持聖號。不可間斷。次晨。吐瀉已止。惟腳筋抽搐。極痛。醫治無效。午後。復請本城婦孺醫院封育仁女士來診。注射清血針一。云係真性霍亂。人極虧乏。脈已沉縮。恐不治。時仍默誦聖號不絕也。薄暮。脈象竟有轉機。腳筋抽搐稍緩。廿四日。就姚曉漁先生診。服藥後。上身發痞無數。至是。始轉危爲安焉。氏於病殆時。自分無生望。既得全愈。極感大士恩。

發心茹素矣。王蓮航記。

▲葛元渭。年六十五。在紹興佛學研究會爲膳夫。長齋念佛。宅心忠實。作事勤儉。會中頗信任之。民國十八年七月初二日薄暮。忽患霍亂症。至夜。吐瀉四五十次之多。狀至危險。予於次晨聞訊。急至會中。雇輿送之。至紹興病院。予亦乘人力車往。院長裘士東云。殆矣。脈搏已無矣。姑爲注射藥水針。然無把握也。予因默持大士名號與大悲呪。教病者亦默念之。告以一心執持。大士尋聲救苦。定能轉危爲安。及醫生注射甫畢。脈象忽好。復伴之歸。病尋瘥愈。王蓮航記。

▲高姜氏。紹興昌安人。爲蓮社社員。予因同社而相識焉。時蓮社初創。氏逢常會輒到。頗爲虔誠。繼而半年不來。予偶詢其常所偕來之孫氏。孫云。氏所以不來者。因患半身不遂。臥床已久。困苦不堪。予聞之惻然。囑轉教以專念觀世音菩薩聖號。必能消宿業。免苦難。卽至臨危。念觀世音亦能往生淨土也。氏依法行之。尋卽全愈。現尙健在。此癸亥年事也。王蓮航記。

▲壬戌之夏。某日夜半。家慈猝病。欲吐不吐。欲瀉不瀉。胸間難受。予於次晨。取淨水一盅。就佛像前虔持大悲呪。奉母云。此菩薩楊枝淨水。請默持大士聖號。則慈光加被。靈驗極速。母領而服之。胸間豁然甚適。連進呪水三朝。所患全愈。王蓮航記。

▲丙寅冬月。本邑佛學會因北軍來。暫移貫珠樓之單氏空屋。屋與單宅毗連。可通出入。單君適之。於十二月廿四日病。日益增劇。嘔吐帶血。醫多束手。闔家震驚。予亦深爲之憂。廿七早課畢。爲持大悲呪水一杯。送令服之。教持大士名號。必能感應。單服大悲水時。其胸中之所苦。隨水而送至腹。病乃大瘥。旋愈。王蓮航記。

▲吾母禮奉觀音大士有年。民國十四年秋。食物不慎。致生疫疾。水漿不能嚥者十日。醫藥罔效。氣息將絕。予方任策秀學校教授。每夜歸家。侍奉左右。一夕。誠求大士。發願誦經三天。日間勞倦。忽爾昏沉。聞母呼予曰。大士撫我。我病愈矣。驚往視之。汗流如洗。形態清爽。越宿。漸進飲食。精神頓復。其靈驗誠不可思議也。萬梁記。

▲王少堂。紹興人。篤信佛法。修持頗切。丁卯年患臂痛。不能高舉。有類癱瘓。居士屏醫藥。專心誠求普門大士慈悲加被。未幾。霍然而愈。益深感發。遂出淨資。莊嚴大士聖像。以伸供養。而報恩德。偶然記。

▲民國十五年春。繼母病危。余適在吉省。公務羈身。欲歸弗得。承東省鹽運使翟熙仁公。贈觀音靈異紀一卷。謂朝夕誦此。當痊母疾。余如其教。日夜誠求。逾月而母病果瘳。爰印靈異紀及了凡

四訓千本。遍贈戚友。以證佛法真不可思議云。丁卯重陽。厲維城謹識。

▲拙荆姚氏。於本年夏曆五月十九日。產一女。產後患痢甚劇。中西醫皆束手。危急萬分。乃合家茹素。虔求觀音菩薩垂佑。至二十三夜半。家人見有白雲下降。光輝如月。時錫璋伴病人在室。忽聞異香撲鼻。濃郁非常。病人頓覺徧體清涼。精神一振。廿四夜。璋又在平臺上。焚香默禱。目覩白雲冉冉而來。籠罩全臺。逾半小時。漸散。今病人已轉危爲安。漸有起色。璋等感荷慈佑。敬將身歷情形。略述梗概。以彰靈跡。戊辰六月初八日。吳縣王錫璋謹識於天津寓廬。

▲丁卯三月二十日。余徒步新華門前馬路之上。忽有汽車自西來。急避之。忽倒於地。人事不省。適有行人過余側。呼余醒。并讓其車使余坐。詢其姓字。曰方耀廷。東安飯店經理也。登車行丈許。心中作惡。吐痰升許。歸家。急延醫。醫云。外傷三五日可愈。惟內傷甚重。腦筋受震。不急治。恐無救也。次日。頭大痛欲裂。請名醫同年友蕭君龍友方駿治之。痛稍減。然不能起坐。至四月初五日午。後三時。夢一女人着白衣立榻前。以紅丸示余曰。服此可愈。意者其爲觀音示現歟。昔吾師仁和陳藍洲先生豪。勤政愛民。病怔忡垂危。夢白髮老人。賜以紅丸。醒後。其丸在手。遂吞之。病卽霍然。壽八十餘而終。今我不德。夢醒藥渺。其能久乎。少頃。蕭君來診。以夢告之。蕭曰。大士豈欺人者。子

虔求之。必有以佑汝也。余謹受教。復夢見白衣人。舉紅丸入余口。嚼而吞之。氣香甜甘。從此病日輕。痛日減。病竟若失矣。因請友人朱君稼軒敬謹圖之。朝夕供養。丁卯九月之吉。信士弟子劉邦驥敬記。

▲民國十六年春。余知和龍縣事。接印甫旬餘。家書至。告以母病篤。家山數千里。省視非易。且有職守。不能擅離。卽離亦恐不及。正悲痛焦急間。忽憶觀音大士靈應。因焚香跪禱大士前。願減己壽五年益母。未數日。家書至。母病果愈。母年已八十有四。垂老病篤。竟占勿藥。非大士拯救之力。不至此。爰刊印觀音靈異紀千本。藉廣流傳。民國十七年十二月。和龍縣知事劉祖蔭謹識。

▲曹康甯。紹興曹漢清次子。甫三歲。由床墮地。右足脛脫骨。經年醫藥罔效。漢清偶招余宴。言及子苦。謂技已窮。詢其狀。則不紅不腫不膿潰。但日夜號痛而已。余言三歲稚子。未知造業。今若此。其爲前生業因可知。經言。一聲佛號。能解八十億劫生死重罪。君果信。當先爲發懺悔心。更與誠懇行持。兼濟貧乏。無不應驗者。因約於十月朔會晤。至期。漢清齋沐。挈康甯以俱來。厥狀瘦弱可憫。漢清定持大悲呪佛號各若干。助行善事錢五百緡。余爲作疏。漢清端楷細書。於午後二時恭赴大佛寺。禮佛焚疏訖。令女傭先負康甯歸。自至東街益豐隆店稍憩。日將晚。回家。甫入門。女傭

呼告曰。二少能步矣。入室。妻復迎告曰。二兒已能行地。卽見康甯由堂入室。漢清乃大稱奇。自是每日肯心念佛。今康甯七歲矣。見者笑謂康甯今真康甯云。黃覺記。

▲關闕惠羣。廣州人。寓居上海。內子圓明之從嫂也。夙奉觀音至虔。常就大士稟事行止。輒著靈異。闕氏常患足疾。遇風雨時節。酸痛難耐。夜不成寐。牽纏數歲。醫藥罔效。一夕。覺有人耳畔告之云。盍赴觀音廟一求靈丹乎。觀音廟者。虹口天潼路西段之小廟。供千手觀世音菩薩聖像。粵人最信奉之。闕以事冗未及往。一日。足患復發。猛憶前事。卽往虔求香灰少許沖服。宿疾爽然若失。後逢雨季。亦不再發矣。圓明爲余言之。李圓淨記。

▲民國丙寅春季。余患喉症。來勢至猛。延至第七日。茶水不能下嚥矣。垂危。乃至誠念南無觀世音菩薩。是夜夢有人告云。汝病須吃長齋。誠心念佛。卽愈。翌晨睡覺。而腫已消。能進白粥。感激涕零。因投佛教居士林發心長齋念佛。以報佛恩。慧通記。

▲薛鴻發。安徽人。供職滬甯鐵路。篤信佛法。主任上海世界佛教居士林放生部事。己巳夏月。其幼女文英。得險症。諸醫束手。後一醫云。此病有一單方敷藥。須用活鯽魚膽四只。田螺肉二只。加入藥中。敷臍上。尙有希望。家人正爲購備。薛適公畢還家。詰知其故。對家人云。我女病已如此。何

得更殺他命。冤冤相報。了無已時。有病正須戒殺放生。方可得救耳。自至佛堂中。誠求觀世音菩薩。並念大悲咒七遍。加持淨水。囑家人以淨水調敷藥。旋將魚螺置於佛前。代爲懺悔宿業畢。送至新開橋河中放之。沿途念誦觀音聖號。放訖回家。乃將敷藥塗女臍上。飲以大悲咒淨水。當夜身出大汗。翌日。吐一血球。如桃仁大。而病遂愈。從此閤家深感大士。禮誦甚虔云。楊欣蓮記。

▲黃世廉。江西興國縣人。性慈善。初入某鸞壇。民國甲子。退出。旋得龍舒淨土文。讀之。遂長齋念佛。然患吐血。體甚弱。次年乙丑。遇一素識比丘。爲述病苦。求救濟法。比丘見其氣喘形枯。恐將不久。教以放下一切。專心念佛。復教以禮念觀音之法。求減痛苦。聞而信受奉行。月餘。病體全愈。視未病前且加強焉。由是信奉益篤。至戊辰。七歲養媳王氏。於五月炎蒸之時。出痘。毒氣內陷。體熱如火。口已爛。舌已黑。百藥罔效。家人捕蟾蜍（俗名癩蝦蟆）五箇。將殺以製藥。謂可引毒外出。黃不忍。至佛堂中。跪誦大悲咒。求祐病人。復爲五蟾蜍持咒而釋之。越一夕。女痘盡出。熱退身安矣。德森記。

▲大士慈悲。救一切苦。年來余所身受及目擊之事。已不一而足。謹述之以爲世人告。先王母來歸之第三年。而先王父卒。明年。供奉大士。持觀音齋。誦觀音咒。守節撫孤。奉爲恆課者數十年如

一日。智章幼蒙熏陶。至民國十四年。機緣成熟。全家陸續皈依。智章既發心。先王母復進而長齋念佛。顧余夙患嘔血。十七年秋。在校病發。不能語。更不能動。動卽鮮血湧出欲死。自念病由業起。非藥力所能爲功。適圓通寺住持定恆老人臨視。爲誦大士聖號。翌日。復在寺中爲禮大悲懺。而諸戚友以校中弗便。移余入醫院。行至距校半里許。以一路布榻搖蕩。血忽湧起。氣爲之塞。正惶急間。覺涼風颯然。沁入肺腑。而血平氣舒。余心感菩薩慈祐。神爲之王。抵院。見耶穌救苦圖。復聯想我佛菩薩之無緣大慈。平等大慈。不禁感極而泣。後知是日闔家爲智章稱念大士聖號。亘一晝夜未間也。自此鮮血便止。但時嘔紫血。五六日後。所患竟瘥。至今年餘未發。雖精力未復。然非蒙大士慈護。早離人世。受諸極苦矣。此智章身受之恩也。尙有目擊三事。十八年秋。次姊齒痛。亘數月。痛極則徹夜呼號。仲冬余勸其日持大悲咒五徧。聖號若干聲。逾日痛減。三四日全愈。此一。從兄勤方家。於中秋後。每夜聞廳事中敲門傾茶。或庖廚內翻弄盤盞。不堪其擾。若海姪勸請佛菩薩像供養。余聞而爲捧大士尊容。往囑其子晨夕虔誦南無觀世音菩薩百聲。其怪遂絕。此其二。餘干縣東鄙李梅嶺。高可八百尺。上有梵刹。供西方三聖及許真君。附近百餘里。歲時來祈福者絡繹。十六年冬。邑人余仲嶼先生居山養疴。兼任廟祝。先生旣信佛。其弟叔堂。其女漢珊。長

齋修持。尤稱精進。既而病重歸家。命其子彭年往代。其山自鼎革後。常有匪徒出沒。至是忽圍攻。梵刹。彭年與其伴幸得隙跳免。山本峭峻。荆棘徧野。平時陟降猶難。而彭年倉皇逃竄。絲毫未損。其伴則面上傷痕。狀若水藻。衣褲盡裂。是日之晨。叔堂在家聞匪警。卽率全家稱念佛菩薩名號。其姪竟脫險而歸。經云。或被惡人逐。墮落金剛山。念彼觀音力。不能損一毛。今觀此事而益信。此其三也。鄒今生原名智章記

▲友人紀振綱。皖之英山人。其家奉一木雕大士像。高尺許。歷世五葉。疊著靈應。蓋自其高祖建屋時。於土中得之。由是香花頂禮。子孫相承。敬奉甚虔。清咸豐中。軍書旁午。全境糜爛。其家獨無纖毫之失。人咸奇之。曾祖時。家有病者。禱之旋愈。醫不入門。曾祖母胡太君。生平持誦大士聖號。壽至九十有七。祖性至孝。潛山之天堂鎮。向設布肆。事有非自往清釐不可者。念母老。不敢離。母促之曰。但去。有事喚汝歸也。不得已。遂行。在鎮月餘。一日薄暮。途遇老姥呼其姓名曰。汝母囑汝急歸。轉瞬已杳。祖驚汗雨下。知爲大士示警。時祖年將六十矣。卽夕篝燈就道。鎮去家二百四十里。徒步星奔。經一晝兩夜而抵家。母固健坐庭中。心大欣慰。述老姥語。相與異之。是日。胡太君仍率家人共飯如常。將寢。誠衆勿眠。至丑刻。竟無疾而逝。時光緒十五年六月二十四日也。辛亥秋。

革命軍起。振綱自江寧赴武漢軍中。歷百難而獲生。蓋其母夫人在家朝夕拜求大士護祐耳。其妻幼讀書教會學校。奉基督。因振綱處危而安。特製衣幔。自滬躬送至家供養。則信心亦油然而生矣。夫大士宏慈。但一念誠求。有感必應。况歷五世而信奉不衰者乎。紀氏之繩其祖武。家風淳善。實足多已。聶雲臺記。

▲應治平。瑞安人。向信佛法。戊辰正月廿八日。攜子趁新濟輪船。由瑞安駛永嘉。輪後拖帶盆湯船一。棚船二三。過帆游地方之轉匯。盆湯船纜。忽斷其一。船即傾側。乘客惶恐。羣起逃命。船更震動。遂致覆沒。論理。河如此深。人即出艙。或遇救。或溺斃。尙在不可知之數。至若猶在艙內者。則決定無生機矣。遇險時。治平不及出艙。則抱子力念觀音大士名。身已落水。念猶不輟。一面發願。倘若隕命。逕登蓮邦。最奇者。治平全軀淹沒。獨露頭項。在水中念大士名。約一小時半之久。聞救船至。乃推其子出窗。得救。已則身大窗小。不得出。久之。一救者以手探窗內。纔知有人。鑿窗引援。置身小舟。治平是時。以天氣奇寒。浸水過久。旋即昏迷。不省人事。救者載之家。飲以薑湯。清醒後。覓子不得。問之救者。答曰。我僅救汝一人。汝子則非我所知。治平聞言。悲疑交作。救者慰之曰。塔家有一孩屍。或係汝子。盍往一審。同去視之。果其子也。急灌薑湯。良久亦蘇。蓋塔救出治平之子時。

不知艙中猶有治平在。乃翁掉舟後來。見衆船攫物是務。置人命於不顧。乃曰。讓汝輩發財。我願救人。各處覓撈。無一獲者。無意中伸手艙內。觸得治平。始獲救。嗚呼險哉。此次死亡五人。未出艙者。無一幸免。獨治平父子。咸慶更生。感大士德。執持聖號。今尤勤懇云。周師壽記。

▲釋傳德。住持湘城慈聖禪院。民國十三年六月間。乘小舟。渡大河。狂風驟作。白浪掀天。舟將覆。心惶懼。急誦大悲呪數徧。風浪忽停。舟亦平。而離舟之一丈間。水面波浪。仍然疾湧。舟人云。自幼至今。從未得見半河有浪。半河無浪之奇事。真菩薩慈悲威力也。於是化險爲夷。安然而渡。周頌堯記。

▲民國十二年。日本大地震。同時大火。死傷人數達三十餘萬。空前浩劫。全球震悼。東京被服廠有大曠場。人民奔集避難者二萬餘人。而四圍火焰漫天。空中養氣燒完。幾全數悶窒而死。又某大銀行有避火牆。難民擁入。全被蒸死。吁。酷矣。淺草區一帶。幾全滅。公園池水亦爲燒乾。而園內有觀音堂。殿壁皆木製。最易引火。竟無隻椽片瓦之損。難民被火包圍。羣集於此者三萬餘人。堂內外皆徧。同宣觀世音菩薩聖號。悉免於難焉。民十四。余隨諸大德出席東亞佛教大會。親至淺草區。見其地皆新建之小木屋。惟古殿巍然獨存。堂內外伏地頂禮者踵相接。嗚呼。大士慈悲。曷

其有極。日本舉國上下鑒於如此巨災。而木壁觀音堂不損一椽。莫不驚歎。蓋事證確鑿。靈應昭著。雖欲勿信。不可得已。李圓淨記。

▲益田玉成。日本東京化學家。民國十年來華。遊南京之棲霞山。奉請觀音大士滿月面像。歸國供養。越二年。日本大地震。江戶雄都。百塵煨燼。君之四鄰。咸罹凶災。獨其家以供奉大士故。幸獲安全。難後。夢大士令其奉像還山。於是遣人以栴檀法供。遠自日京。航海西渡。既至金陵下關。其友鈴木增太郎。偕男女善信。恭送慈像。返於棲霞之故嶺。春山紺海。清淨依然。萬眾同瞻。傾心膜拜。是歲十月既望。余以鳳凰熊秉公之約。自燕京南下。同遊是山。展謁慈尊。獲聞靈異。方丈若舜禪師。屬爲記其因緣。以彰聖跡云。廖名縉記。

▲江易園。前南京國立高等師範學校校長。由原籍安徽婺源移徙滬上。卜居海甯路天保里三號。民國十二年臘月十四夜半。近鄰失火。勢甚危險。居士舉家持念觀世音菩薩名號。並千手千眼大悲神呪。心想觀世音菩薩。在虛空中。手執楊枝寶瓶。以大悲水灌至火所。火即熄滅。可以知菩薩神力。不可思議。衆生念力。亦不可思議。至誠而不動者。未之有也。尤惜陰記。

▲錢佛捨自述。民國十六年冬月廿六夜。西鄰失慎。轟然一聲。火穿屋頂。雜有子彈爆裂聲。頃刻

火焰逼我屋角。長三四尺許。當時火來迅速。莫知所措。急稱觀世音菩薩名號。旋有消防隊水龍齊集。以取水不便。且有房屋障礙。無從施救。危急萬狀。妻孥等亦虔持佛號。是晚西風頗勁。忽而轉東。計焚鄰屋十餘間。而蝸舍貼近。居然無恙。後知肇禍之由。由於前數日電燈廠修理機器。各處電燈。停止放電。而西鄰適駐某軍辦公處。案上燭燃將盡。熱氣傳至旁置汽車所用之軋司令油。數箱之多。一時爆裂。且有軍服軍毯助火之物。故火勢燎原。不可嚮邇。設非佛力。萬難倖免也。

居士
林刊

▲趙宴梅云。余住蘇州濂溪坊。民國十六年十二月夜。鄰居失慎。時在子夜一時。夢中驚覺。揭帳外望。但見窗外火球。如雨而下。闔家老幼。但知哭泣。起火之家。在東南隅。時正東南風極大。隔街亦延及。余急起視。囑家人弗哭。亦弗移物。移亦弗及也。惟有齊聲持誦觀世音名號。豈知靈異捷於桴鼓。突然風止。火勢遂緩。施救得熄。昨接舍親錢佛捨居士寄示觀世音菩薩感應近聞。所載反風滅火一則。事乃不約而同。悲喜感歎。不可不舉以勸世。

居士
林刊

▲葉慧真述云。甲子七月十七日子初。方矇矓間。聞警笛聲甚厲。驚悉居鄰失火。勢甚燎原。頃刻延及後簷。危急存亡之際。惟知默念觀世音。迄六時始熄。天已曉。骨肉重紮於道。入視祖先神龕。

玻璃均碎。惟香爐獨全。余家六世單丁。殆以暗示香烟不絕之兆歟。堂中器物焦灼。屏門戶檻皆燬。而同居所供觀世音則巍巍獨立於几上。及至余舍。惟先母在日所供佛龕並供品。一無所損。餘均灰燼。但於瓦礫中檢得祖先畫像。及其他字畫數軸。計被災者十餘戶。焚屋五十間。哭泣之聲。數日不絕。當火起時。余惟攜得考妣遺相。及禮九華山時所衣海青一襲。妻兒女所攜。單衣數件而已。幸蒙佛天憐憫。丁口無恙。親朋畢集。慰問殷勤。而同道師友皆曰。三界無安。猶如火宅。借茲警策。可以助道。聞斯明誨。敢不勉旃。

居士
林刊

▲前廣東討賊軍師長許濟。字佛航。與許崇智爲昆弟行。解組後。忽悟無常。慕武林山水之勝。徙家隱居。日寫金剛般若以自課。民國十六年秋。率其子女。先後分請招賢寺耆德如幻老人及弘傘和尚。授三皈依。持戒修福。孔誕前一日下午七時。其鄰開南腿店者。不戒於火。風助火威。許宅適在下風。勢將延及。一家老幼惟有皈誠觀世音菩薩而已。火忽超越而過。得免於難。經曰。若有持是觀世音菩薩名者。設入大火。火不能燒。予於許宅之先號眺而後笑信之。郭寅皋記。

▲朱智章。江蘇睢甯縣陶河鄉人。少就傳讀。因貧失學。勤儉操持。家僅溫飽。民國六年冬。從予聞地藏經。大感悟。在佛前發願長齋十年。請銅觀音像。在家供養。日持大悲咒及普門大士名號無

間。十五年南北交戰。防軍他調。土匪蜂起。民團聯合自衛。夜不安枕。刁斗之聲不絕。朱宅居村之西首。再西卽淤黃河。十六年正月廿三夜半。聞狗吠。朱開門出立宅下。手持念珠。口誦觀音。向西注聽。其析居之堂弟。綽號冒失鬼。聞狗吠。持毛瑟鎗。亦開門出。見有人在宅下立。疑爲賊。卽開鎗。智章急呼曰。我被你打倒矣。其弟大驚。趨視之。智章手按胸旁着彈處。啓視。僅棉袍上有凹痕。絲毫未傷。彈猶灼手也。持置佛像前。禮拜懺謝。倍生敬信。經曰。虻蛇及蝮蠍。氣毒煙火然。念彼觀音力。循聲自回去。豈不信然。郭寅皋記。

▲夏佑卿。江蘇邳縣河南營人。民國七年秋。被匪擄去。索款太多。家貧不能應。輾轉數月。遷徙無定。流離瑣尾。苦不堪言。先是夏曾受其戚黃佐震接引。受持觀世音菩薩洪名。至是。乃至心默念。嘗於夜靜更深。跪地發願。若得脫險完聚。當終身持齋奉佛。後遇官軍來勦。匪出應戰。以包裹一。附其背。令隨進止。值匪敗散。官軍旣獲夏。詢知爲肉票。又見其年老樸訥。斥其自回。及到家檢視包裹。則纍纍者。皆黃白物也。權之值四百餘元。闔家大喜。以爲佛佑。從此淨信。并令全家持普門品金剛經焉。郭寅皋記。

▲張俊章。江蘇睢甯陶河鄉樂羣學校校長。服務社會。以勲懇周摯。推重于鄉里。辛亥政變後。值

歲饑疫。全家老幼。相繼死亡。家產蕩然。子然一身。慟悼無狀。民國七年春。予養病家居。張來見。形容枯槁。顏色沮喪。具道所苦。予曰。君既了無罣礙。何不學佛。答以煩惱深厚。性缺誦持。爲宗祧計。仍擬續娶。以了下半生。公有何法以教我乎。予曰。當知如來有勝方便。如脩多羅說。準提陀羅尼呪。乃七俱胝佛母。不問在家出家。不揀淨穢。但至心持誦。求妻得妻。求子得子。求官位得官位。求長壽得長壽。乃至求大涅槃。得大涅槃。又誦此呪。水火不能焚漂。軍陣強賊。毒藥怨家。亦不能害。誦至一心不亂時。必得見觀世音菩薩。或金剛手菩薩。親爲授記。張聞言有省。請予傳授。復贈以袁了凡訓子篇。以堅其信。民國九年。張在商家湖設館授徒。青紗幃起。賊忽掩至。急起閉門。以身抵之。賊衆五人。撞以巨石。不得開。賊憤。向門開鎗。凡二十餘發。均洞穿。張仍抵門不讓。鄉團聞警來救。匪徒揚長去。張開門出。見鄉人驚喜。檢視彈孔。皆從張身旁過。張乃跪地謝佛。持誦益虔。民國十一年無意中得一少艾賢德之妻。翌年舉一雄。家運漸轉。十五年冬。張奉委視學。臨予家。縱談人生。觀。予答以非學佛。不能澈底解決。前事予已忘之矣。張爲縷述經過。予亦大喜。蓋張持此呪。已不知幾百萬遍矣。予曰。君持此呪。已得世間福。然尙未得出世智慧。望更益加誠敬。研習般若。隨力隨分。修行四攝。以報佛恩。乃檢準提焚修悉地寶懺。金剛經。普門品。授之。郭寅皋記。

▲蔡仁初。浙江鄞縣人。信仰三寶。樂善好施。營蔡仁茂玻璃號於上海天潼路。已五十餘年。戊辰閏四月十八日上午八時。蔡由東有恆路寓所出。將登自備汽車。突來四匪。均持手鎗。兩匪監視汽車。夫陳小福。兩匪挾蔡登車。疾駛而去。蔡惟一心念觀世音菩薩聖號。駛經蘭路時。忽車輪橡皮胎爆裂。匪仍御車疾行。而汽缸復炸。遽兆焚如。匪遂下車挾蔡步行。然恐路人注意。蔡得離匪稍遠。匪覺蔡有逃意。向之開鎗。蔡不自意高躍數尺。彈掠足而過。得不傷。匪亦逃去。家人正惶急。而蔡已乘人力車歸。按蔡車極堅固。不料車胎汽缸相繼爆炸。謂非菩薩垂護而何。見申報及聶氏旬刊

▲慧月自述。予於民國十一年冬月。由漢口附船回南漳省親。從襄河溯洄而上。河身廣狹深淺不一。上水全恃順風。否則拉絳而行。一日行至沙洋附近。同行之船四十餘艘。各船水手俱在岸拉絳。是日風既甚大。復無定向。忽而拉絳。忽而挂帆。加以各船受載輕重不等。絳夫人數多寡不齊。故或後或前。或進或退。遂致各船絳繩被風吹捲。扭成一團。膠固不開。各船互相磕碰。水流浪大。人力難施。正危急間。迎面復來一高廣大船。橫載巨木。順流而下。帆飽風利。疾駛如箭。撲近本船。退則不能阻岸。上絳夫之狂拉。進又不能覓得他舟解絳之機會。而撲近本船之高大橫木。勢將橫埽本船船桅。彼船既無術收轉。本船又無從讓避。况本船左舷業已半傾於水。則木船橫撞。

豈有生望。當是時也。情勢險極。羣衆失色。予惟至心稱念南無觀世音菩薩。卽見天際現金紫色雲一朵。一剎那間。砉然一聲。本船桅桿。從根折斷。壓於右舷。船身既正。而大船攔江巨木。適從本船篷背掠過。全船之衆。得慶更生。亦巧矣哉。海潮音

▲民國十四年乙丑夏。善後會議閉會。履中赴粵。與滇軍接洽南北統一事。某夜。忽被捕去。幾遭不測。因虔誦觀世音經數十遍。誦後。安然睡去。至次日。竟得脫險而出。出乎意料之外。回憶當時。身處刀劍林立之中。而此心泰然。且方泐然欲置之死。忽釋然而放其還。實非人力之所能爲。要皆大士慈護。鑒余素昔信奉之微誠。而後有以致之也。滇西吳履中謹記。佛光社刊

▲彭澤許止淨云。丙寅重陽之旦。潰兵圍余宅。撞門而入。予與兒輩避登柴樓。然實無柴爲蔽。於是竭誠念佛及大悲呪。匪等往來如織。并見僕婦攀梯上樓。亦不顧。旋擄弟子彥。姪壽生。穀善。秧生四人而去。壽秧二人之母。固長齋念佛者。壽生亦有信仰。閱一日卽放回。秧甫成童。被擄後。念觀音不離口。始終未受虐待。閱三日。匪見贖款未至。復挾所擄數人來宅。縛堂柱上。聲言將焚。子彥情急。默念救苦救難觀世音菩薩。兩句鐘頃。縛手之索忽自脫而逸。時尙有一匪在堂監視。竟未之見。噫。異矣。旋匪見人逃。大怒。紛入各室。翻箱倒篋。地下棄物。陵亂不堪。惟各佛堂內纖塵未

動。臥室內如眼鏡等均取去。而置於同處之內子念珠一串。上綴小金牌。乃棄而未取。尤奇者。被擄四人中。惟穀善全家不信佛。且加誹謗。而此次惟善受撻最甚。且最後放。觀此。固不可謂佛法無靈矣。聶雲臺記。

▲觀音頌所引念佛脫險愈病之事甚多。近事亦常有徵驗。按摩女醫馮氏。信佛甚虔。昨告予。渠家貼鄰失火。救火夫怒其搬箱出外。雙手推之。從樓梯連箱滾下。年近六旬。毫無傷損。惟念佛不輟。火亦不延燒。其媳其子皆勞損病劇。咸得愈云。友人吳君。行路時輒念佛。昨在途小解。有人家屋頂鐵皮及長竿飛下。掠其衣。稍近數寸。頭必傷。又廠友宋君。持觀音呪。一日大雨。坐處皆水。因離座。纔起身。一大水泥塊。堅如石。重數十斤。落下。擊痰盂粉碎。若早一分落。則頭破矣。聶雲臺記。

▲民國十二年廣州軍久困惠城。用飛機向城內拋擲炸彈。前後不下千枚。城內居民驚恐萬狀。諸善信于南城長壽庵虔禱觀世音菩薩前。自後飛機之來。恆有數白鶴迴翔其後。炸彈擲下。或落池中。或落曠地。甚少傷人。有一彈。落某舖廚房中。直貫水缸而下。缸破水流。而彈竟不知去向。又一彈。中水東街某香舖。落於香粉筐中。不致爆炸。否則舖內七八人。血肉橫飛矣。此皆菩薩加被之力也。事平。城中人釀資作佛事七晝夜。以表悲仰之忱。偶然記。

▲戊辰年。自夏徂秋。時局混亂。直魯軍既退。踞於唐山豐潤之間。各村無不被擾。且土匪蜂起。動聚數百人。縱橫蹂躪。直魯軍視若無睹。吾村毛家陀。擄掠殺傷之事。乃日日有之。村民因自練保衛團四十餘人。以自保。人衆費鉅。至七月初。已供給不足矣。初六日。家嚴囑友徐寶山。往唐山籌借。至晚未回。忽潘永和之孫來言。彼與徐同歸。行至瓦房莊南。距毛家陀十二里。遇匪。被綁。審知潘窮。釋之。而挾徐去。余聞耗。急爲禮佛。求加佑。家嚴則選團兵精幹者二十人。馳往救之。至瓦房莊。莊有王姓數人。亦被綁。正議價贖。已交二千餘元矣。因禁團兵緩攻。議至夜半。無成。王姓亦集壯丁若干。與團兵合。二時許。潛至匪窟。圍其三面。鳴鎗攻之。匪不知兵數之多寡也。立逃。入察之。則遺子彈數百枚。王姓被擄者數人。而徐杳然。至早七時。探知徐無恙。在瓦房莊陳姓家中。遂尋之歸。歸而徐自述曰。始被劫時。吾詭言他莊他姓。匪有識者曰。此毛家陀徐某也。匪首聞之大怒。連掌吾頰。戟指罵曰。毛家陀人。決不贖。謂其黨曰。先議王姓事。再斃徐。汝儕嚴守之。苟有忽。不汝宥。匪黨乃增以繩縛。吾用層布蒙吾眼。蓋自吾村練團。匪不得逞。故恨之深也。吾至此。惟有默念觀世音菩薩而已。至夜二時。悲從中來。然愈悲愈念。誦大士聖號不已。忽聞空中有聲曰。徐寶山。急走。如是者三。驚而張目。蒙布已脫。守我之賊。皆熟睡。吾起立。而繩縛亦自散委地。急逃。越十餘

田隴外。潛伏。卽聞槍聲。至天將明。投陳姓家。團兵尋至。遂歸也。余思團兵至瓦房莊時。設非王姓之阻。早抵匪巢矣。匪既恨吾村人。其去時。徐必不免於禍。乃遲至二時許始得攻捕。而徐已先逃。計其時間。相去頃刻。雖夙約亦不能如是之巧。至於空中有聲。繩布自解。嗟乎。佛菩薩慈護之恩。威神之力。其赫赫乃若此也。無邊熱惱。頓爾清涼。火宅中苦衆生。不三寶是依而孰依乎。張智導記。

▲民國十五年秋。武昌被圍四十餘日。時余家老幼二十餘人。無計出險。食糧垂盡。槍砲之聲。又震耳欲聾。人人以淚洗面。忽憶前任汝南道時。曾得中央刻經院印送之觀音靈異紀一冊。亟檢出。其中經咒。不易卒讀。乃擇最易持誦之白衣大士神呪。令合家諷誦。晝夜不輟。並發願印送萬本。三數日後。覺精神疲倦異常。羣思入睡。旋竟酣然高臥。一事不知。及醒。則城破已久。秩序早安。左右鄰居。被劫一空。遭饑餓驚恐及奸淫槍殺而死者。不知凡幾。而余家獨以熟睡。一無驚恐。亦未受有損失。斯誠大士聞聲救苦。悲憫衆生之靈應也。謹出淨資一千八百元印贈萬本。以廣流傳。武昌許靄人謹記。

▲王德福。籍北平。性忠實。事母至孝。篤信佛法。茹素諷經。家貧。服務邯鄲車站路警。所入僅足餬

口稍有餘資。則印送觀音經呪。聞有觀音廟。不計途遠近。必虔拜之。直奉之役。站中員役。逃避一空。獨王德福誓死守之。彈如雨下。屋頂爲穿。則虔誦觀音聖號。及大悲呪。斷炊數日。而身體迄未損傷。公文亦無遺失。底定後。某軍長遍索站長不得。衆以德福死守聞。軍長嘉其誠勇。畀以站長職。未兩月。任爲下級軍官。累遷要職。而施經行善。始終如一云。白青山記。

▲郭永順。直隸任邱縣楊臨河村農人。茹素。早晚誦觀音經不輟。只一子德海。在直軍爲兵。民國九年。直皖之戰。德海身屢中彈。皆無恙。戴聯青記。

▲李萬有。正定人。自幼爲涿縣道元村惠姓傭工。民國九年。直皖兩軍交戰。道元村爲皖軍砲隊陣地。一日。直軍砲彈飛來。正落李前而炸。衆以爲李骨粉矣。迨砲烟散盡。見李滿身塵土。衣皆洞穿。而身體髮膚。無絲毫損。奇之。李探手衣囊。出其前數日所得觀音大士銅像一尊。始知李之不死。大士慈佑之恩也。李由是敬仰益誠。香花供養。日三次頂禮焉。戴聯青記。

▲民國十六年。奉軍圍攻涿縣百日之久。城內砲彈如雨。房屋無一全者。只西北隅方圓三十餘戶。安然無恙。蓋其處有一小廟。內供觀音大士。附近居民常往頂禮。故全城遭難。此處獨免。戴聯青記。

▲胡靖清。名靖。江寧人。前農商部官產處處長。自述云。清光緒庚子。余奉母及兄嫂妹弟。避拳匪亂。由天津入京。行至北通州。路梗。七月十八通州陷。行篋被劫一空。四五日中。聞死於外兵之手者甚衆。余等懼匿牆中。母終日危坐。默誦觀世音經。亦令靖誦。且曰。兒誦千遍。必獲佑出險。此七月二十七日事也。至二十九日午後。誦逾千五百遍。問母曰。果何時可出。母曰。八月朔。及黃昏時。出探消息。遇兄友李某。云東關日本軍隊可保險。吾家女眷已往。靖哀懇偕之。是夜竟得全眷同往。即東關內曹泰發薑店也。次早詢人。始知爲八月朔。蓋七月爲小建。當日午後。由泰發介紹日本武官。偕居日本界。又月餘。日軍以馬隊護送至京。乃得骨肉團聚。又當七月二十六日清晨。二法兵突入室搜索。靖兄弟皆以被蒙首臥。一兵持槍尾擊醒。扭兄辮髮。使隨行。靖力阻。願以身代。不許。哀懇泣下。始扭靖行。連搜十餘家。無所得。最後入一大典肆。北方典肆皆穿堂。二兵入內搜尋。靖得出後門逃匿。然不識途徑。惶懼間。慮兵追及。忽聞空中呼曰。快跑快跑。舉首四望。并無一人。默念應向何方。空中又曰。往東往東。其聲圓而厚。見一衙署棋竿上。日光朗朗。乃向日東奔。才百餘步。便是所居之後巷。急越短垣而入。闔家正相向而哭。不期生還之速也。至今三十年。追思情景。歷歷在目。是時城中巷無居人已久。定是菩薩默佑。不然。何以知靖之居在東乎。戊辰七月

二十七日追述。

▲施德成。保山人。就事江西。民國十七年。父死。聞訃奔喪回滇。臘月初六日。舟抵香港。船觸礁石。同溺者四百餘人。施遇救得生。一身受傷。左手殘廢。養傷於香港中國醫院。稍愈。致書江西胞兄德廣云。溺之前一夕。觀音菩薩示夢。拽其手急走出海上岸。且諭云。因汝稍有孝心。吾故救汝出險。汝復生後。當出家羅浮山。否則後必更有危險。汝當緊記。次日。果船沒得救。現已至羅浮山剃度爲僧矣。顯宗記。

▲張少蓮。爲上海某洋布行買辦。丁卯冬月一日。乘自備汽車出門。突遇綁匪二人。登車挾持駛去。張向不信佛。見家人禮誦。輒詆爲妄。至是急默念觀世音菩薩聖號。意極懇切。迨車行至鬧市。忽聞路人紛集。警笛亂鳴不已。匪大驚。以爲捕已。停車路旁。逸去無蹤。張愕然。繼始知爲無賴糾衆爭鬪故耳。張遂因是安然脫險。感念慈恩。增長信心。求印光法師授三皈依。法師爲余述之如此。慧通記。

▲李斯蓮。江西興國縣東鄉人。家小康。性方正。有同族某。慣行不法。李爲地方除害計。力主捕而置之死。然其徒黨甚多也。時憂報復。劉演真居士教以皈依三寶。長齋念佛。懺悔前業。以期自他

同得解脫。李信受。早晚至誠禮念。合家爲之感化。戊辰春。興國匪衆。稱共產軍。誓欲殲滅李之全家。先一日。李聞耗。略事摒擋。翌晨。舉家奔避。匪衆旋至。盡掠其財物而火其居。縱火三次。火終不燃。匪因捨去。後五六月。聞匪燄稍息。又屆秋收。李單身回鄉。於六月初四日。行經離家不遠之東村墟。恰值鄉人趁墟之期。突來大股匪軍。李方在茶樓小憩。遂爲二匪所搜捕。李自念死期至矣。急提正念。念大悲呪一遍。接念阿彌陀佛。不住口。隨行隨念。甫至樓下。復一匪來。揮手令前二匪曰。不要他。這箇好。乃捨李而捕其所謂好者以去。李竟脫險。德森記。

▲居士蔡仲光。法名眞仁。癸亥年。客秣歸縣公署。夏曆六月初五日。與王書元喬德三李經武三先生。趁渡船往對河窰灣谿。爲郭翁柳溪祝壽。同舟者。男婦老幼共十有一人。時正江流盛漲。行至扁擔石。突遇冷泡。（卽昔所謂屈原三泡）趨避不及。舟竟覆。眞仁既浮沉水中。而默誦大悲呪。觀想大悲大士。拯拔同人。既而此十一人。漂至下游舊州河。同得遇救。無一散亡。亦云奇矣。眞仁年踰五十。氣體極弱。浮沉巨浸中數刻。得救而歸。竟無所苦云。海潮音

▲余父學佛。將十載。棲心淨土。常薰修於離無錫縣城七八里之北茅蓬。卽今之覺聖寺也。民國十三年冬。軍隊蹂躪吾邑。居民相率奔竄。余與伯父亦挈眷遠避。念父甚急。往省之。已先一日行。

矣。父子分散。各不相保。亂離情況。至爲慘悽。余不得已。赴常所聚會之西林菴蓮社中。匿跡朝夕。念佛求佑。余父及全家無恙。不數日。有人自鄉來告。余父已與伯父諸弟等。敍會於開化鄉。余聞之。不勝欣慰。至次年上元。亂平。始先後返家。父爲余述在茅蓬時。曾被亂兵先後搜劫六次。惟有默念阿彌陀佛。觀世音菩薩。不輟。竟不及難。是則始終皆仗佛菩薩加被之力。故得一家今復團聚。有感必應。真實不虛。爰追記之。以爲世勸。凌再生記。

▲史遠峴自述云。幼時常作惡夢。醒多恐怖。慈命虔誦觀音聖號。及白衣觀音咒。奉持年餘。惡夢遂止。十餘年間。未敢或懈。今秋羣盜肆虐。民不聊生。因思世亂時危。不求佛護。則夙業弗銷。禍將孰免。遂與家人持誦聖號。呪語益力。八月十五夜。夢一淡裝善女人告曰。明夕汝家有大難。速避之。晨興。以告家人。而家君之函適至。亦囑全家即日避地。與所夢不謀而合。蓋家君先已避居在外也。午後。卽送老幼至附近族人處。余則率數僱役。守視門戶。至夜分。無他變。方和衣假寐。忽聞門外犬吠聲。又聞犬作跳躍聲。若有人逐之者。繼而屋上瓦響甚烈。急下牀。冀拔門逃。而盜已在院中鳴鎗。欲脫無術。乃攀登牀頂板上。蜷伏不動。瞑目默誦聖號。然床與窗對。盜卽於院中向窗開鎗。彈穿屋椽。不及余者僅寸。自思再開鎗者。必無生理。而竟弗再開。諦聽之。盜撥槍機。似有阻

滯。故不再發也。盜乃捨窗攻門。門倒。盜衆入室。明火執仗。卽擒一僱役。問家主何在。僱役以全家早避對。盜亦不追究。但傾箱倒篋。盡掠所有。然家本薄產。不饜盜欲。疑有祕藏。徧加搜覓。臥牀之中。翻檢數次。是時余與盜僅隔一板而已。驚懼益甚。幸盜忽他顧。而天已微明。盜首乃呼嘯整隊去。噫。非蒙佛菩薩。慈悲加佑。余安能脫此險難哉。濟南蓮社旬刊

▲予家曩居安徽之六安州。幼時。偶檢得觀音白衣咒一卷。謂持誦百日。能消災得福。予遂每日爇香虔誦。甫滿期。忽遭家難。被諸族人囚於本宅。經年不得與外界通消息。先慈設計以密函乞母家援救。予等遂獲往安徽之來安縣。寄居舅家。予每詫何求福反得禍。日久遂亦忘之。其後巨匪白狼擾皖。六安爲墟。時吾舊宅中。惟孀嫂暨其女卽吾姪女翠霞。及其新贅之婿汪君同居。汪卽福建民政長汪聲玲之子也。白狼闖至宅中。殺汪君。翠霞殉之。嫂逃至滬上。旋病歿。予今始悟若當日居六安者。恐同罹此難。予等避居舅家。實福而非禍。予至舅家時。年方十四。則持誦經咒時。當在十二三歲也。呂碧城記。

版存上海游民習勤所如蒙
各 大善士印送不取版費

去年秦槐新先生發起印施新編觀音靈感錄囑本所排印並慨允捐款百元以爲之倡當時本所收容人等聞風興起有捐助款項者有附印者不下四百餘人足見樂善好施之心人各同具本所因印件積壓未卽付印不料秦君仙逝首倡乏人後承秦硯畦先生慨捐二十元囑速完成其願本所卽于本年九月排印工竣初版一萬册所有排工紙版等費一概不計僅收回油墨紙本之費如有續印者亦照此價計算以廣流通茲將捐款及附印者姓名列後以資徵信

●捐印芳名

秦硯畦先生捐洋二十元

本所代秦槐新先生還願捐洋八十元

金智勉居士 喬智如居士 各捐洋五元

慧澤居士捐洋五元爲母求免疾苦

又交來秦硯畦先生贈其先兄洋兩元捐充印費爲先兄求生西方

本所慈惠費項下捐洋八十八元二角七分爲全體收容人敬求消災免難

吳惠元兄弟 捐洋二元

陳阿大 李金榮 姚阿興 陳祖福 姜新民 李林溪 盛金標 潘全根 夏良

陳長林 霍步雲 李有勝 馬重仁 陳友三 周海青 茅慰椿 沈松喬 張阿三

周子貞 張漢卿 沈長根 吳明孝 陳順生 沈毛因 任柏才 顧東泉 胡松清

錢可榮 王自新 錢海白 殷全才 陸維剛 宋海山 張家如 王士林 董阿根

劉子莊 吳珠生 葛志榮 陳家海 陳樹田 曹炳生 吳其昌 王和尙 仲如初

陳光福 衛德芳 張崇德 曹松如 竺桃紅 陳龍才 王紹之 汪老四 王根生

楊邦秀 范阿桃 崔溪廳 汪佐三 鄭志英 周榮發 張文田 秦小龍 聞大富子

顧仁根 孫子為 郭本海 顧小狗 張桂泉 熊洋海 李萬興 蔡小雙 張小阿三

邱花鶴 張花文 王小裕 吳和宜 李銀六 李孟欽 李德生 任阿根 李小二子

王潤生 金振濤 唐錫華 王三山 傅同福 孫金龍 沈子明 周金山 俞小木子

吳德松 陳小雲 楊芝蘭 吳小三 陳金榮 劉光明 錢彭齡 巴開慧 蒲小四子

沈關茂 盛鴻祥 濮瑜 李智民 馮永熙 汪柏生 潘達 姜慶安 張根根

洪萬才 蔡阿鴻 譚其煥 曹阿毛 任雲卿 錢阿火 李立清 朱阿余 蔣懷義

趙雲成 李理齋 王時敏 奚仲英 姚六根 李計生 鄭志誠 唐柏年 趙文奎

王長庚 丁正明 王有卿 沈生發 孫樹田 顧阿炳 周阿心 虞明富 唐小合子

陳兆雲 王清遠 王光海 林金敖 金錫麟 李鑑祥 孫孟德 尹鴻奎 趙瑞生

汪宇生 周永奎 王阿才 洪明珠 吳阿二 桂谷榮 顧晉熙 劉金海 王志賢

王成生 杜小康 管學明 鄭少山 俞再鳴 張阿根 沈仲明 田瑞祥 金小和尙

瞿振康 陳梅生 王阿根 劉珍子 張根 徐有富 言德寶 曹景 李禧培

王步蓮 張菊生

以上一百七十三人每人各捐洋一元

徐鴻林 捐洋七角

張德山 李祥雲 僧蓮如 洪天才 王阿寶 張大鍋子 許小春子

以上七人每人各捐洋六角

郭豫俄 捐洋五角九分 曹潤身 捐洋五角四分

萬炳恆 高開國 張全根 蘇振華 劉杏興 瞿根大 周廷前 周杏生 沈銀才

葉醒民 莊金大 孫義財 倪良才 陳紀生 汪曉初 葉四寶 陸洪雲 張金龍

許鑑生 王阿臣 陳富根 陳小陽 陳克雲 陸文清 王又富 畢義 岳雙登

劉德奎 潘燮昌 朱阿根 劉揚順 王福民 張銀山 朱三根 汪金奎 程贊平

嚴桃桃 僧志海 張錦生 以上三十九名各捐洋五角

僧能慧 姚雲卿 王德生 李祖香 楊財根 趙田芝 周觀菊 朱阿五 周家龍

劉阿俊 羅阿定 包華庭 單永蓮 董鼎榮 湯鴻喜 夏天壽

以上十六人每人各捐洋四角

徐福昌 方永泉 沈一峯 范明生 張才寶 王寶生 陳禮利 王棟蘭 黃麟報

俞玉龍 沈百川

以上十一人每人各捐洋三角

姚樹才

捐洋二角九分

姜啓新

捐洋二角八分

段毛孩

捐洋二角七分

陳福洪

捐洋二角五分

張崇德

捐洋二角四分

穆德福

劉大如 馮彥培

王少卿

陳二 石金安

吳品昌

林芬

楊全龍

陳正祥

劉德標 劉倫彬

徐興生

孫育才

潘家麟

胡慶齡

瞿春裕

于壽生

王正洪

邱小全 張鳳岐

周興發

戴蘭生

張壽寶

沈克元

蔣永康

葉忠心

巢彭福

張福清 陸金海

許全因

錢森林

錢源興

嚴元吉

鮑小毛

孫小根子

蔡明亭

王小金 陳振根

孫阿根

潘三岩

王世根

楊玉根

崔根寶

金連根

常榮

王小功 聶愛

張阿根

王來和

趙崇慶

王佳木

陳在新

劉菊生

蔡阿大

倪再生 錢裕發

李生安

朱紀江

張如

潘其連

唐阿毛

伍洪生

王文崑

應候海 宋者三

朱國有

顧小狗

何長春

姚安仁

董金來

顧小寶子

黃永祥

馮金生 張義華

郭應澤

歐源昌

楊殿臣

周福坤

徐子清

徐小三子

蘇榮鑫

胡少卿

以上八十一人每人各捐洋二角

以上二人每人各捐洋一角六分

胡福元

陸益兒 僧了塵

符正興

石運夫

嚴金中

沈阿泉

吳珊

沈泗金

陳阿大

陳阿福 朱金生

雷海廷

李士賓

王鳳起

王福保

蔣濟榮

姚阿根

馬晉江

李亭遠 忻富貴

楊仁福

沈文進

賈順義

右德

應海候

賴桂生

裘子忠 張長貴 李昌生 徐湧根 殷雨泉 徐公良 鄒雨泉 井義和 王朝義

季治勳 朱二郎 劉子瑤 舒松源 朱康久 金阿二 王漢卿 陸阿四 劉廣玉

劉大華 陳瑞亭 秦連生

以上四十八人每人各捐洋一角

汪雲濂 捐洋八分

鄭阿毛 湯阿海

以上二人每人各捐洋六分

王駿杰 楊錦煜 王蓮生

以上三人每人各捐洋五分

●附印芳名

陳祖福 馬重仁 陳友三 錢阿火 濮瑜 夏良 趙瑞生 顧晉熙

以上八人每人各五十本

錢可榮 胡松清 王自新 霍步雲 朱阿根 譚其煥

以上六人每人各三十本

任柏才 鄭志英 沈松喬 崔溪廳 潘燮昌 姜慶安 王步蓮 戴蘭生 俞小木子

瞿振康 張根 鄭少山 陳梅生 沈仲明

以上十四人每人各二十本

潘全根 姜新明 王福民

以上三人每人各十五本

汪佐三 茅慰椿 楊錦文 張根根 劉揚順 任雲卿 洪萬才 王小裕 劉珍子

徐有富 張菊生 李禧培 任阿根 張文田 孫子爲 王志賢 張德山 周觀菊

汪宇生 王正洪 洪明珠 劉金海 吳阿二 杜小康 張鳳岐 王阿根 金小和尚

周興發 王阿才

以上二十九人每人各十本

李德生 沈關茂 沈百川 陳紀生 邱小全 蔣永康 段毛孩

以上七人每人各五本

統共附印一千二百三十本

新編觀音靈感錄業已出版各地善信如蒙索閱請函上海

漕河涇上海游民習勤所每冊附郵壹分當即寄奉如荷

定印請向本所第三股接洽 上海游民習勤所附啓



A541 212 0018 59608

普爲出資及讀誦受持展轉流通者

回向偈曰

願以此功德

消除宿現業

增長諸福慧

圓成勝善根

所有刀兵劫

及與饑饉等

悉皆盡滅除

人各習禮讓

一切出資者

展轉流通者

現眷咸安樂

先亡獲超昇

風雨常調順

人民悉康甯

法界諸含識

同證無上道

民國二十四年九月一萬冊（每千冊價洋伍拾元）

▲新編觀音靈感錄

編集者 李圓淨居士

流通者 弘化社

蘇州護龍街南段
穿心街報國寺內

印刷者 上海游民習勤所

上海漕河涇鎮
電話六八二六二

藏版者 上海游民習勤所

